

Nasotardago

Sutan Panguraban



rat
an

Departemen Pendidikan dan Kebudayaan

019.324
27
2

NASOTARDAGO



TANGGAL	No. INDUK
19-2-82	95

NASOTARDAGO

Oleh
SUTAN PANGURABAAN

DEPARTEMEN PENDIDIKAN DAN KEBUDAYAAN
PROYEK PENERBITAN BUKU BACAAN DAN SASTRA
INDONESIA DAN DAERAH
Jakarta 1979

Diterbitkan oleh
Proyek Penerbitan Buku Bacaan dan Sastra
Indonesia dan Daerah

Hak pengarang dilindungi undang-undang

KATA PENGANTAR

Bahagiailah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu, di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalan sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahannya pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergalikan dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seiring dengan pertimbangan tersebut di atas, kami sajikan pada kesempatan ini suatu karya sastra daerah Sumatra

Utara, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1979

Proyek Penerbitan Buku Bacaan dan Sastra
Indonesia dan Daerah

NASOTARDAGO

Catatan : Ceritera dalam buku ini digubah dalam bentuk puisi. Bentuknya seperti bentuk pantun. Setiap bait terdiri dari empat baris. Rumus persajakannya ialah abab. Sebahagian bait terdiri atas sampiran dan isi, dan sebahagian lagi hanya terdiri dari isi saja.

Buku ini diterbitkan pada tahun 1940. Sudah kehilangan beberapa halaman yaitu dari halaman 1 sampai dengan halaman 8. Jadi pembuatan sinopsis ceritanya dimulai dari halaman 9.

Sinopsis.

Setelah Jasingkoru anak dari Jasabola menyelesaikan sekolahnya, dia kembali ke kampungnya Huta Balian sambil membantu orang tuanya mengerjakan sawah ladangnya. Sekalipun Jasingkoru sudah berpendidikan dan orang tuanya tergolong orang yang berada, namun dia tidak sombong. Bahkan dia dapat disebut sebagai pemuda teladan di kampungnya. Baik kepada teman sesama muda-mudi maupun terhadap orang-orang tua sikapnya selalu sopan dan hormat. Tidak heran jika banyak anak-anak gadis yang mendambakan Jasingkoru menjadi teman hidupnya. Walaupun demikian, namun ada sesuatu yang merupakan kekurangan dalam diri Jasingkoru. Keadaannya yang masih tetap membujang banyak mengundang tanda tanya bagi masyarakat kampungnya dan menimbulkan keresahan bagi kedua orang tuanya. Apalagi, Jasingkoru adalah anak satu-satunya dari ayah-bundanya.

Suatu kali kedua orang tuanya mendesak anaknya Jasingkoru agar berumah tangga. Sebagai calon istrinya kedua orang tuanya telah memilih "boru tulangnya" (anak gadis saudara laki-laki dari ibunya). Dengan rasa berat Jasingkoru mengatakan kepada ibunya bahwa dia bukan tidak mau menuruti dan menghormati kedua orang tuanya, hanya Jasingkoru tidak merasa

tertarik kepada *boru tulangnya*. Lagipula Jasingkoru masih ingin mengadu nasib di rantau orang dan memanfaatkan ilmu yang diperolehnya di sekolah. Maka Jasingkoru memohon kepada kedua orang tuanya agar dia diberi kebebasan untuk memilih teman hidupnya. Mendengar jawaban Jasingkoru kedua orang tuanya pun terpaksa menyerah kepada kehendak anak tunggalnya.

Sebelum pergi merantau, Jasingkoru sempat berkenalan dengan seorang gadis bernama Nasotardago dari kampung Janji Matogu. Karena keduanya sudah saling mencintai mereka segera mengikat janji. Sebelum berpamitan dengan kekasihnya, Jasingkoru memberitahukan kepada Nasotardago bahwa dia akan pergi mencari pekerjaan ke Deli. Dia berpesan kepada Nasotardago agar tetap sabar menantinya dan jangan lupa mendoakannya.

Setelah tiba saatnya akan pergi merantau, Jasingkoru mohon diri kepada kedua orang tuanya. Karena pada saat itu jalan-jalan belum banyak dibuka oleh pemerintah Belanda, dalam perjalanannya menuju Deli, Jasingkoru harus menempuh jalan setapak melalui hutan dan belukar, bukit dan lembah dengan berjalan kaki. Perjalanan yang ditempuhnya ialah melalui Rantau Prapat, Labuhan Bilik terus ke Asahan. Dari Asahan Jasingkoru naik kapal laut ke Belawan dan dari Belawan terus naik mobil ke kota Medan. Di kota Medan Jasingkoru mendapat pekerjaan sebagai juru tulis di kantor residen. Sebagai pegawai di kantor itu hidupnya senang dan terjamin sebab gajinya besar. Karena merasa hidupnya sudah cukup terjamin, dia berniat pulang ke kampungnya untuk menjemput kekasihnya Nasotardago. Niatnya dikemukakan kepada kepala kantornya seorang konteler. Tuan konteler mengabulkan permohonannya.

Jasingkoru berangkat dengan menaiki kapal menuju pelabuhan Sibolga. Di pelabuhan Sibolga, Jasingkoru bertemu dengan kekasihnya Nasotardago yang kebetulan datang berkunjung ke tempat abangnya. Keduanya sangat berbahagia pada pertemuan yang tidak disangka-sangka itu. Dari Sibolga dia melan-

jutkan perjalanannya menuju kampung halamannya. Alangkah gembiranya kedua orang tuanya melihat kedatangan buah hatinya.

Selang beberapa hari setelah dia puas melepaskan rindunya kepada kedua orang tuanya, Jasingkoru pun mohon kepada ayah bundanya agar diizinkan pergi ke kampung Janji Matogu tempat kekasihnya yang sudah sejak lama menanti kedatangannya. Di samping itu Jasingkoru ingin agar janjinya dengan kekasihnya yang telah lama dipadu dapat segera diwujudkan.

Setelah Jasingkoru tiba di kampung Janji Matogu, dia disambut kekasihnya Nasotardago dan kedua orang tuanya dengan gembira dan sukacita. Lebih-lebih kekasihnya Nasotardago. Tubuhnya yang selama ini kurus kering dan lesu akibat menahan rindu terhadap Jasingkoru, kini tiba-tiba menjadi penuh semangat dan gairah hidup kembali. Demikian juga Jasingkoru. Dengan tidak menunggu-nunggu waktu lagi Jasingkoru langsung mempersembahkan permohonannya untuk melamar Nasotardago kepada orang tuanya. Dengan segala senang hati orang tua Nasotardago menerima lamaran Jasingkoru dan bersedia menerima kedatangan pihak keluarganya kapan saja.

Setelah Jasingkoru pulang kembali ke kampungnya dia memberitahukan kepada kedua orang tuanya bahwa pihak keluarga Nasotardago telah bersedia menerima kedatangan mereka. Beberapa hari kemudian dikirimlah utusan ke kampung Janji Matogu untuk menyampaikan mas kawin Nasotardago berupa pakaian dan perhiasan emas perak. Karena orang tua Jasingkoru seorang kaya, upacara penyerahan mas kawin ini disertai dengan penyembelihan seekor kerbau. Orang-orang utusan kampung Huta Balian pun datanglah menghadap para pemuka adat dan orang tua-tua desa Janji Matogu. Mereka berkumpul dan bermusyawarah di *sopo godang* (= rumah adat). Dalam permusyawaratan itu kedua belah pihak sama-sama menyepakati bahwa pesta pernikahan akan segera dilangsungkan. Sebab segala syarat-syarat yang berhubungan dengan adat istiadat yang berlaku

sudah dipenuhi dengan semestinya. Setelah acara permusyawaratan selesai, para hadirin pun makanlah bersama.

Hari dan tanggal pernikahan pun diumumkan agar kedua belah pihak bersiap-siap menyediakan perlengkapan dan segala kebutuhan yang perlu untuk pesta. Demikian juga perlengkapan pengantin. Nasotardago telah mengemasi segala perlengkapannya seperti pakaian, perhiasan emas perak, barang pusaka, dan kasur beserta tikar bantal.

Tibalah saatnya pihak pengantin laki-laki datang untuk menjemput pengantin perempuan. Rombongan pengantin laki-laki menari dalam tari sembah untuk menghormati pihak *mora* yaitu pihak marga dari pengantin perempuan. Selesai menari pihak pengantin laki-laki memohon agar mempelai wanita diizinkan untuk mereka boyong ke kampungnya. Sekalipun pihak *mora* telah mengizinkan anak gadisnya untuk diboyong, namun mempelai wanita belum boleh pergi begitu saja. Dia masih dihadang dan dihalang-halangi oleh gadis-gadis teman sepermainannya. Barulah setelah gadis-gadis ini diberi uang, mereka mau membebaskan pengantin perempuan untuk dibawa ke tempat pengantin laki-laki.

Di desa Huta Balian mereka disambut dengan *gondang* dan ditaburi beras berkunyit. Begitu tiba di rumah pada kepala mempelai ditaruh sejempit beras. Lalu ditanya apa maksud kedatangannya ke rumah pengantin laki-laki. Apakah hanya sekedar melancong saja. Pihak pengantin perempuan menjawab bahwa kedatangan mereka bukan hanya sekedar melancong akan tetapi adalah mengikuti si jantung hatinya untuk ingin sehidup semati. Selesai tanya jawab, kedua mempelai diberkati dan diberi makan telur ayam rebus dengan garam. Di hadapan orang banyak kedua mempelai diberkati dengan harapan agar badan dan roh keduanya senantiasa berada dalam rumah. Jika rohnya sedang berada di tempat yang jauh, kembalilah. Jika rohnya sedang berada di tengah hutan, atau di padang penggembalaan, atau di tepian permandian pulanglah dengan segera ke dalam rumah. Kemudian di hadapan mereka dihidangkan

santan kelapa (sebagai lambang kesehatan), dan tepung yang dibuat dari beras (sebagai lambang murah rezeki dan panjang umur). Semua yang hadir laki-laki perempuan, tua muda, besar kecil dipersilakan mencicipi santan. Tujuannya ialah agar mereka terhindar dari gangguan setan dan pengaruh roh jahat, sehingga mereka tetap dalam kandungan sehat walafiat. Selesai mencicipi santan, gendang dibunyikan kembali. Semua yang hadir menari. Demikian juga kedua mempelai. Acara ini disudahi dengan makan bersama dengan para undangan lainnya.

Kepada para undangan, tetangga, dan teman sedesa, Jasi-bola, ayah Jasingkoru, sekali lagi mengumumkan bahwa dia ingin mengadakan pesta perayaan pernikahan anaknya. Semoga kiranya para undangan, dan tetangga sudi memberikan bantuannya.

Sesokan harinya menjelang petang, kedua mempelai diarak ke tepian; demikian juga ketika pulang dari tepian. Setelah kedua mempelai dan rombongannya tiba kembali di dalam rumah acara *mangupa* ('mendoakan dan memberkati') kedua mempelai dimulai. Kedua mempelai dipersilakan duduk di atas tikar. Di hadapan mereka dihidangkan nasi yang ditaruh dalam piringan besar disertai dengan ikannya. Kepada kedua mempelai diserukan dan didoakan semoga mereka berbahagia dan beroleh rezeki yang berlimpah-limpah. Senantiasa sehat dan semoga panjang umur. Dan di atas segalanya semoga mereka cepat memperoleh anak yang banyak, laki-laki dan perempuan. Kepada mereka diserukan.

Laklak di ginjang pintu

Singkoru digolom-golom

Maranak sampulu pitu (= 'Beroleh anak laki-laki tujuh belas')

Marboru sampulu onom ('Beroleh anak perempuan enam belas')

Horbo ni Naga Saribu

Manyosop tu ramba tamuse

Marhorbo marribu-ribu ('Punya kerbau beribu-ribu')

Maringgit maruse-use ('Punya uang berlimpah-limpah')

Pada saat kedua mempelai sedang makan hidangan *upa-upa*, acara peramalan mata kerbau yang telah disembelih pun diadakan. Pada acara tersebut mata kerbau yang telah dicungkil itu dipijit. Apabila dari dalamnya memercik air, hal itu merupakan suatu pertanda baik bahwa kedua mempelai akan memperoleh kebahagiaan kelak. Sebaliknya apabila dalam pemijitan mata kerbau itu tidak ada air memercik hal itu merupakan pertanda buruk bagi masa depan hidup mereka.

Selang beberapa hari setelah upacara pesta perkawinan mereka Jasingkoru beserta istrinya Nasotardago pun berangkatlah kembali ke Deli tempatnya bekerja. Setelah mereka tiba kembali di tempat Jasingkoru bekerja, mereka langsung menghadap kepala kantornya dan melaporkan bahwa segala sesuatunya sudah terlaksana dengan baik. Tuan konteler, kepala kantornya, bersenang hati menerima kedatangan mereka. Tuan itu menasihati kedua suami-istri yang muda itu dan berharap semoga cepat memperoleh anak, hidup berbahagia, dan selamat dunia dan akhirat.

NASOTARDAGO

Dung mulak ia tu huta,
Manolongi simatobangna;
Manjalahi sere dohot arta,
Baen pasonangkong ngoluna.

Taringot tu parrohaon,
Masuk na dengan do lagangna;
Songon i tu haposoon,
Dihutkon do donganna.

Adat ni sude jolma,
Mamolus naposo-poso;
I ma dalan na tumama,
Patajom bisuk songon piso.

Dompok iba di na maposo,
Di si ma manjalahi jodo;
Dapot ma tompa dipareso,
Dohot rohana pe didodo.

I ma nagiot botoon
Ni doli-doli Jasingkoru;
Ampot dapot di sada taon,
Dumpang tingki mambut boru.

Adong muse do pe santuho,
Na tama dipabotohon;
Siobanon marlaho-laho,
Laho pasidung haposoon.

Mangihut tu hata ni ende,
Na tama gabe ingoton;
Ulang di pudi gabe dele,
Bo, tangis panguncombopon.

Ulang hamu halut andomang,
Targan poso do game-game;
Ulang hamu halut matobang,
Targan poso da na gumabe

Pago-pago tarugi,
Tubu rimbang di parsopoan;
Namanginjam do di duni,
Diparsidung di haposoan.

Soban ni Baginda Kahar,
Humon si markaruaya;
Sonang pe di padang mahasar,
Ulang diontip di dunia.

I ma aturan ni naposo,
Na ni palua ni na tobang;
Anso ulang mardabu holso,
Songon andung ni anak tambang.

Ia gabe ni na maposo,
Na suntut ma barang di dia;
Na suada so binoto.
Tuk ma hum marria-ria.

Muda tuk timbahoniba,
Butong muse dohot butuha;
Ise halak na songon iba,
Malua diganop hatiha.

Kehe tu jae tu julu,
Mandoli pasidung roha;
Mangombus tulila bulu,
Maruyup-uyup eme saba.

Marsitogol mandosihi,
Manjojori huta sada;
Mangkusipi suhi-suhi,
Songon halak na hurang poda.

Anggo harejo na di huta,
Sanga rabian dibalian;
Nada i dipahata-hata,
Lupa dibaen hadolian.

Sude di tulak tu amana,
Asa doho tu inangna;
Muda buruk ma abitna;
Ro ma paundukkon rohana.

Anggo timbaho dohot pusuk,
Diholoskon tu inangna;
Dipanggar-panggar ulang muruk,
Momo ma mangungkap tanganna.

Muda dapot sauang sagodang,
Pur-pur ma dilala nasida;
Songon na malua di padang,
Nada adong arsak tarida.

Muda manyiak ma bituha,
Ro ma tu bagas manjamai;
Manjalahi panganon sanga aha,
Sude pariuk diungkapi.

Dapot na masak pe tama,
Sanga na matape tupa:
Nada marimbar i dijama,
Lalu markuras mangalompa.

Sude do i tabo sajo,
Anggo dompak na poso-poso;
Muda dapot marsambal lajo,
Sonang ma roha marjo-arjo.

I ma na nidok niandung,
Na dung somal di Tapanuli;
Panganon ni naposo bulung,
Nada pola jabat marpili.

Tulang sapot tulang bane,
Aha na sapot muja dung male;
Haru marlae martunggane,
Disi payak disi gale.

Butong boltok marlaos-laos,
Margiri paogos-ogos;
Muda abit do na malos,
Tu ina ma kehe humolos.

Adong muse dope santuho.
Na tama ditaringotan;
Dompok di na marlaho-laho,
Jotjot patubu parbadaan.

Martenju marranggut martada,
paidahon tumbu ni bitis;
Manjalahi teas dohot bada,
Manguncagahon bahat ni pitis

Manombo dampak na martandang,
Mangumbani boru ni halak;
Jadi amana hona dangdang,
Diuhum di galanggang na bolak.

Songon i pe nada oncit,
Dilanggar do adat martandang;
Manjalahi pangoli do na hancit,
Momo do anggo garar ni dangdang.

Marosros ate-ate,
Pasari-sari haposoan;
Bahat hum na marroha late,
Manambai na so aturan.

Ia halak Jasingkoru,
Anak na lambok oloan;
Nada lupa poda ni guru,
Jago do di parkarejoan.

Nada pola ia marjeng,

Songon doli na duldal doli;
Marsak dibaen ijeng-ijeng,
Lupa marayak dalam muli.

Sanga majungkat paro bada,
Manguncagahon sinadongan;
Jago do dibaen nasida,
Ulang sambar tarjama tangan.

Jasingkoru bayo bangunan,
Na malo sumambut lidung;
Mulai sian na robian,
Na so giot marundung-undung.

Hadolian ni Jasingkoru,
Na so pola masuk tu roha;
Na so ra diarjeng boru,
Songon donganna sahatiha.

Di rohana do dimomos,
Uti-utian ni na poso;
Nada pabaen-baen holos,
Diingot do Tuhan na kuaso.

Homang sude na dua tolu,
Halaklahi dohot dadaboru,
Bonggal ma tu jae tu julu,
Hadolian ni Jasingkoru.

Songon parlungun ni bajunggel,
Baribaan songon na mangan dongdong
Parroha na lobi ganjil,
Harosuanna so adong,

Sude do halak dipardongan,
Kehe tu jae tu julu.

Dihutkon do dengen.
Dohot martulila bulu,

Rohana do na so taranju,
Ganggang dolngos songon durame,
Nada jungada ra martenju,
Tai tongtong giot mardame,

Aturan ni adat na poso,
Marsijalahi na tupa tu ibana,
Tai Jasingkoru hadabuan ni holso,
Taru so dibolus rohana.

Diligi potong ni badanna,
Toktohon hayu andele,
Impol ma roha mangidasa,
Dilangka na gumale-gale.

So mahait so matuda,
Songon pangkur ni saba jae,
Saguman halak na marnida,
Sombu lungun malum nyae.

Halalaho lumindak laut.
Pangambe palapang dalan.
Songon manuk na dipaut,
Jarang jaro do tu balian.

Panaili mangege tobing,
Pangalangka borat satail,
Marsak roha ni bujing-bujing,
Songon ihan na hona hail.

Na lambok na basa oloan,
Amporik taruan mama,
Lomo-lomo ni sitandaan,

Tama sormin tu hita jolma.

Diligi isi ni andorana,
Madung gok parbinotoan,
Na dimamanhon ni guruna,
Arta na so martudosan.

Nada tarsuhat songon eme,
Sanga tartimbang songon gulo,
Tai ummarga sian sere,
Anggo na saulu ni kudo.

I ma na so tarsarihon,
Di roha ni bujing na poso,
Loja nasida paintehon,
Baen hadabuan ni holso.

Tai sangidas pe simata,
Na tama baen susuhon,
Saotik pe suada hata,
Na tama baen ingoton.

Patunda ni marsak ni roha,
Tubu roha ni bujing-bujing,
Angke aha pe suada,
Hobar na tupa ubat mangging,

Dumenggan tabonggakon ende,
Anso maila di rohana,
Muda dumpang hata na pade,
Tasulahi tu ibana.

Tadok dakdanak mangendehon,
Tu ginjang sanga tu toru,
Songon dalan na pabotohon,
Hadolian ni Jasingkoru,

Manuat tu barang toru,
Manangkok tu huta Imbaru,
Ulang songon Jasingkoru,
Na marsak dibaen boru.

Hum diendehon dakdanak,
Tarbege ma tu Jasibola,
Ende na taradop tu anak,
Mambaen tubu hahaila.

Marungutan ama-ama,
Marsigoitan ina-ina,
Di huta bo na di hauma,
Laing hum i ma hobaranna.

Aha na masa na muba,
Baen na tubu ungut-ungut;
Na diombukon ni haba-haba,
Rap homang mardumon ut.

Nada na hurang di perak,
Anggo halak Jasibola;
Bahat do horbona marrerak,
Dipahankon di Angkola.

Tontu adong do i hangalan,
Tu tondi ni Jasingkoru,
I ma aropku gabe dalan,
Anso maol dapotan boru.

Nada ia na sumalin,
Sian dongan na dua tolu;
Suangkon miak dohot lilin,
Denggan sude tu na mangolu.

Songon i ma hobar-hobar,

Na nipararat ni jamita;
Bonggal lalu tu surat kobar,
Ning halak na marbarita.

Ila roha ni Jasibola,
Ungut-ungut di sopo godang;
Dalan mambaen hahaila,
Tu anak na mompas magodang.

So adong dope tarbortik,
Tu roha ni Jasingkoru;
Manyurduhon burangir na nitiktik,
Ambaen panise ni boru.

Ro ma hobar na marragam,
Sian na tobang bo naposo;
Hum luas saratna ngumngam,
Nada jolo dipareso.

Anggo taringot do tu sia,
Ulang pola au disindir;
Adong do boru tulangnia,
Na tau manggana mangukir.

Dompok di na markusari,
Tubu roha ni Jasibola;
Giot manyungkun manyihiri,
Anak lomo ni hula-hula.

Dipio dongan sabagasna,
Martahi patobangkon anakna;
Marragam hobar tu ibana,
So binoto unjur bohangna.

Denggan ma tapabagas,
Anakta na sangkibungi:

Ulang adong be na mangaskas,
Hobar ni halak mangambungi.

Maingol pinggolniba,
Mambege hobar ni halak:
Muda suada hepengniba,
Horbonta i ma hita tulak,

Huida di panglahona,
Na maila do ibana:
Mandokkon giot ni rohana,
Manudu boru hagiotta.

Tadokkon jolo tu nasida,
Hobar na denggan na tama:
Dipabagas ma ibana,
Songon hasomalana ni jolma.

Anggo dung tapajuguk ia,
Tu inganan hatobangan;
Nada be ke ia tu dia,
Paihut-ihutkon dongan.

Anggo tu anak na sangkibung,
Nada pade iba mangkolit,
Dung ia matua bulung,
Sumonang ma roha humolip.

Muda nada tapabagas,
Tontu ke ia tu Doli,
tinggal ma kobun dohot gasgas,
Marmgotngot ma tu holi-holi.

Dompok ibana di lambungta.
Hagiotta tapatupa,
Tabuat boru ni hula-hulanta,

Asa denggan taupa-upa.

Hutimbang giot do ibana,
Ning pamikir ni inangna,
Hara ni denggan ni tompana,
Hona dohot tu parangena.

Muda malua i ancogot,
Marbagas tu halak balian,
Di au ma baya na ngotngot,
Malua na dung nilampinan.

Mangalus Jasibola,
Laho mangapus janggutna,
Tama tupa ma hulala,
Saotik suada salana.

Songon ido adat sian najolo,
Mambuat parumaenna,
Songon hadangan andilo,
Buruk sada adong gontina

Tai bia ma pambaenta,
Anso tarpatupa hita,
Taringot tu parumaenta,
Sanga na giot do anakta.

Muda tumbuk tu sidoli,
Mangoloi hagiotta,
Tonggi ma i songon tangguli,
Sonang paida-idaonta.

Anggo taringot du tu sia,
Ninna dongan sabagasna,
Musti diihutkon ia.
Nada tola gagaanna.

Songon i do poda tu ibana,
Na niadjarkon ni guruna,
Hobar ni simatobangna,
Nada tola gagaanna.

Boti pe da nada pade,
Iba diuhum anakniba,
Anggo sahata he hita sude,
Tunduk songon na hona tuba.

Antong muda na songon i,
Tasapai do ma jolo,
Ulang be dipabuni-buni,
So ulang kehe ia gilo.

Dompok di sada hatiha,
Di langga-langga ni ari,
Saba pe dompak marsuha,
Horbo di padang mamopari.

Dipio ma anak sangkibung,
Tu jolo ni ama inana,
Laho mandok hata ni lidung,
Mangadopkon tu ibana.

Amang sinuan tunas,
Lomo-lomo ni inamu,
Payahan ni perak dohot omas,
Upa ni tondi ni amamu.

Tampak ni tuyung bunga ni poga,
Layang-layang ni siandilo,
Ubat ni lungun lomo ni roha,
Mayam-mayam ni simangido.

Ligi da amang uncok,

Ama inamu murmatobang,
Modom pe so ra sinok,
Holiholi pe malumbang.

Muda sogot hami humolip,
Mangkudukkon tano on,
Tu dia ma ho markolip-kolip,
Pasahatkon sidangolon on?

Dibaen ho amang anak sangkibung.
Songon urat ni ancimun,
Momo ma i ditinggang lidung,
Songon halak na hona samun.

On pe da amang doli,
Mandokkon hata jolo hami,
Marsuru ho anso mangoli,
Dompok targan di ngolu nami.

Taalap ma amang anggimu,
I ma siboru ni tulangmu,
Ampot sogot male boltokmu,
Anso adong pangkolosanmu.

Boti pe ho madung tama,
Madung haruar ngon sikola,
Songon i do da ruhut ni jolma,
Ulang jabat doli-doli Angkola.

Tuk do nian di ho bisuk,
Mamili na tupa di ho,
Hatanku ma jolo paihut,
Anso sidung sasantuho.

Mangkuling Jasibola,
Paujung hata ni parsondukna:

Madung jabat hami maila,
Mambege ungut-ungut ni ina-ina.

Oloi da ulang ho lupa,
Na nidok ni inami;
Bahat do ho dapotan upa.
Mambuat boru ni tulangmi.

Ulang baen songon ulok,
Mamolus di bagasan pāncur:
Sanjurus nada mangeldok,
I ma dalam laho runcur.

Ulang nian pasili-sili,
Songon parkuayam ni hajaran;
Sude ni halak do mangoli,
Dung sidung parsiajaran.

Muda sioloi hata,
Dapotan upa do pematang:
Momo dumpang sudena arta,
Sonang arian dohot potang.

Halak naso manjagit poda,
Jotjot manyosal di bolakang,
Madung bahat conto tarida,
Markancit ia dung matobang.

Halak na marsipaihutan,
Dapotan puji sian halak;
Haru so morhepeng punjutan,
Nada pola dihata halak;

Muda salumpat saindege,
Sapangambe sapanaili;
Rap sonang hita sude,

Suangkon na minum tangguli.

Tulangmu pe denggan rohana,
Bolak muse do rabionna;
Tontu holong do i rohana,
Di sianak baberena.

Huida sahonokna on,
Na denggan basa do ibana;
Muda dapot ujung ni taon,
Laing na ro do siluana.

Sapanjang dok ni halahi,
Songon anak do babere;
Nada ia mamili bohi,
Baen panyahatan ni sere.

I ma da amang hatangku,
Tamba ni hobar ni inangmu;
Arop au nian marlaku,
Sai mangondok tu rohamu.

Muda digagai ho,
I ma ho na mangarsak hami;
Magete ma songon timbaho,
Gabe paponduk umumami.

Unduk sajo ma Jasingkoru,
Laho pasari-sari alus;
Taringot tu na mambuat boru,
Nada podo giot dibolus.

Mangalus anak mancada bulung,
Tu hata ni ama inana;
Mangapus ilu mandok lidung,
Pajojorkon na di rohana.

Taringot tu hata ni dainang,
Dohot di hobar ni damang;
Tigor do songon na nibonang,
Holpu songon dai ni lomang.

Nada i targaga au,
Sanga na huparmuda sayang;
Tai mandali dope au,
Songon na mangargai manyang.

Taringot tu na mangoli,
Mangalap boru ni datulang;
Nada dope taroloi,
Angke haskas bondul mangkalang.

Muda kobun parpisangan,
Buntu-buntu parkacangan;
Muda na kobul pangidoan,
Giot tu Doli do jalangan.

Martaba di balobo,
Mangarabi parhaumaan;
Manandangkon na binoto,
Manjalahi pandaraman.

Sapanjang hata ni gurungku,
Dompok hatiha marsipoda;
Taringot tu sinaloanku,
Nada be dilanglang nasida.

Angkon huoban jolo tandang,
Tu banua na legan;
Manjalahi ringgit dohot hupang,
Hasaya tu ancogot ni andigan.

Taringot tu na marbagas,

Di pudi ma hita hobari;
Anso ulang songon unggas,
Hum na henceng sasadari.

Santuho tu hobar ni halak,
Na mambaen hahaila;
Asok hita pasungsang mulak,
Tasorahon tu Allah Taala.

Adong do ende siingoton,
Na tama ubat ni roha;
Tusi ma ke hita martaon,
Nada be i barang mahua.

Marumbak hayu halak,
Marduduk andor tu rabion;
Marragam hata ni halak,
Apus ogos ulang tangihon.

Taringot tu boru ni tulang,
Disuru langka tu bagasna;
Nada satumbuk tu pematang,
Pasili-sili do di palna.

Sapanjang dok ni bayo datu,
Umpama ni na manikam dadu;
Muda ditikam mata satu,
Haruar do tu mata tolu.

Tongtong do i pasili-sili,
Songon parkuayam ni hajaran;
Nada marnatumbuk tahi,
Laing tong marsigagaan.

Muda tanduk palehang-lehang,
Asa gumbang marsinggaluan;

Gabe unjur mada bohing,
Gabe talaga ma juluan.

Muda sala di pandasoran,
Sala do i tu pambibiran;
Angke nada sapsoran,
Gabe maralo sauduran.

Nada au na mamili,
Di toptopan mauli bulung;
Songon doli na dul dai doli,
Dodas tarsoltu ke tu lobung.

Anggo tompa do ligion,
Pade ma boru ni datulang;
Tingko ni bohi dohot ipon,
Tuk daraham dohot golang.

Nada au manatap tompa,
Sanga na tu sinamoraan;
Damang dainang ulang lupa,
Domu ni tahi hangoluan.

Jeges peda parsondukriba,
Anggo mangarsak ate-ate;
Dos do songon na mangan tuba,
Hancit ngotngot margete-gete.

Anggo di tompa na jeges,
Nada dapot hasonangan;
Hum pakean do dierges,
Lupa ia di hatuanan.

Muda sogot iba marnyae,
Sanga na marun matok ulu;
Nada'nggo dipature-ture,

Kehe do pahae-pahulu.

Dibaen i ale amang!
Manyomba au tu hamu;
Mangido au tu dainang,
Ulang au paksa hamu.

Muda dipaksa hamu,
Tudos ma na marsuru mate;
Mago ma sian jolomunu,
Rap marngotngot ate-ate.

Mangkuling ma inangna,
Laho mangapus iluna;
Ditompohi andorana,
Patorang marsak ni rohana.

Huboto do ho na giot mamili,
Manjalahi hagiotsmu;
Bolkas ma ho songon halihi,
Nada tontu songgopanmu.

Muda na pili-pili tobu,
Tartoktok hayu na ruangan;
Lilian di sanggul ambubu,
Tongon tu boru na lobangon.

Tariongot tu pangidoanmu,
Giot kehe marhuta sada;
Nada diantahi inamu,
Sombanku buat ma nasida.

Aha gunana ho mangomo,
Paimbar tonga ni hasaya;
Tuk do arta lomo-lomo,
Gogo dape hami markaya.

Udan batu di hutaniba,
Udan sere di banua ni halak;
Tumonggi sian air ni loba,
Tumabo sian batu ni salak.

Huboto do mangungkap ruji,
Pasuksuk ringgit partaruan;
Huboto do na mangan gaji,
Songon gogo ni kudo boban.

Pakean do na hurang limus,
Songon parbatu ni ambasang;
Sala saotik tarjarumus,
Nada jungada marnasonang.

Kopi, . . kopi, . . kopi,
Di toru hi dapdap Malayu;
Sugari ulang kopi i,
Nada marabut na imbaru.

Mangkuling Jasingkoru,
Mangapoi simatobangna;
Ingot hamu poda ni guru,
Anso selamat tu ujungna.

Inang na tuabulung,
Amang na lambok marlindung;
Ulang hamu tangis mangandung,
Songon landuk na hona lobung.

Ulang lupa ho inang,
Hata ni ende sipaingot;
Anso dapot roha na sonang,
Pamalum roha na marngotngot.

Ditampul bulung supi,

Diparsaong bulung siala;
Ulang manyolsol tu pudi,
Nada sipaingot suada.

Ia pitua ni guru,
Dohot poda ni tuan doktor;
Muda giot mambuat boru,
Nada denggan dongan sahondor.

Tudos do i na sada mudar,
Mambuat boru ni tulangna;
Tingko songon gulo sanggindar,
Sego ma i tu pomparanna.

Satamana anso tumbuk,
Na juguk di dangka-dangka,
Ulang dihail na salubuk,
Anso marrongga songon songka.

Muda iba giot mangoli,
Anso pabolak parkouman;
Tulang do tulang humani,
Dipatamba parmayanan.

Anggo tali ni pordangku,
Angkon hotang sisada-sada;
Anggo hagiots ni rohangku,
Angkon kehe marhuta sada.

Disusuk ma simata,
Obanon tu Mandalasena;
Aha ma he gundal salana,
Anggo mambaen tu pandena.

Kehe au jolo tu Doli,
Tu tano sabola timur;

Tu pudion ma na mangoli,
Torkis hita manginjang umur.

Dibobok sapu lidi,
Baen sapu-sapu manyogot;
Taringot tu rongkap ni tondi,
Dapot dumpang do i sogot.

Sobar ma damang dainang,
Ulang be marsak sasadari;
Kehe pe au na maminang,
Boru na sadapot ni ari.

Denggan hatamu tu datulang.
Dohot tu simatuangku;
Nada be dong bondul mangkalang,
Pabagas ibot ni tungganengku.

Rere tinggal rere.
Uwat suhat di parkobunan;
Babere tinggal babere,
Ulang sirang parkouman.

Mangalus ma inangna,
Mandokkon hata domu-domu,
Muda tu si ma parpayakna,
Pade jalahi ma giotmu.

Langka ma ho amang martandang,
Manjalahi hagiotsmu;
Boru na sangombas magodang,
Na tama jumbang tudosmu.

Pio ma ale-alemu,
Anso adong dongan donganmu,
Mamili boru hagiotsmu,

Na tama pasonang rohamu.

Ulang ho songon Jasindora,
Na hipas mulak laho muli;
Jago ho ulang tarsigoro,
Sude pamanat panaili.

Ulang pahincat-hincat hadabuan,
Songon parhabang ni hubung;
Nada dapot na niluluan,
Maluntak dalam balobung.

Muda langka hamu sogot,
Kehe paimbar huta sada;
Ingot hamu sibat ni bargot,
Sige sumandangi bonana.

Tontang aek tontang tuba,
Ulang songon teptep tu onggang;
Diligi jumbang tudosniba,
Ulang ro lidung maninggang.

Muda kehe tu huta sada,
Ingot hamu di sipaingot;
Ulang songon na so jungada,
Tardege asar ni piongot.

Marbou ibo di tapian,
Batuk-batuk laho tu bagas;
I ma dalam sidalian,
Ingoton ni halak na ringgas.

Ulang marjomak so marburi,
Songon danak naso marama,
Jumolo dongan dihombari,
Ulang bulus jama-jama.

Huik kuik kalihi,
Malamun salak di bonana,
Dipaunduk panaili,
Halak na mian di hutana.

Lambok simarkulasi.
Jarumbunan bio-bio,
Lambok iba markukuhasi,
Anso dapotan na mangido.

Ditiptip jolo sanggar,
Ambaen huru-huruan,
Disapaan jolo marga,
Anso binoto partuturan.

Dung dapot partuturan,
Malo ma iba mandok hata,
Bo di huta di pagaran,
Nada be dong haskas ni mata.

Muda dung dapot na nitanda,
I ma gonti ni ama ina,
Dipasahat tu nasida,
Sian pangkal dohot ujungna.

I ma amang sipaingotku,
Tu hamu na laho langka.
Manopot huta ni ibotku,
Barang na tu tano Malaka.

Mangunduk Jasingkoru,
Mandok hata mauiliate,
Denggan songon poda ni guru,
Huingot lopus au mate.

Tapasirpang jolo hata,

Taringot tu boru ni tulang,
Bujing na gartip marhata,
Na tinggal di alang-alang.

Pandokkon ni namboruna,
Na so tola ia marbagas,
Anggo nada tu anakna,
Hutipul-tipul hupargas.

Bujing Nai Alo Bona Raja,
I ma goar ni boru enggan
Na so muntul di halaloja,
Toptopan na uli na denggan.

Ngolngolan peintehon hata,
Sian halak Jasingkoru,
Hape kehe paimbar huta,
Manjalak-jalahi boru.

Dung tarbege tu ibana,
Hobar ni halak Jasingkoru,
Didok ma tu ama inana,
Kehe paimbarkon namboru.

Lalu mandok hata salamat,
Tu bayo angin Jasingkoru;
Torkis diborkati Muhammad,
Lopus denggan dapotan boru.

Anggo hodong na so indot,
Rere ho talpokkon pahu,
Anggo ho do na so giot,
Kehe ho tinggalkon au.

Anggo hodong na so indot,
Pusuk sayur mandua bulung;

Anggo ho do na so giot,
Rap sayur matu bulung.

Anggo hodong na so indot.
Sibarebe ni Simangambat;
Anggo ho do na so giot,
Dalananmi nada huambat.

Anggo hodong na so indot,
Hutampul bona ni sitata;
Anggo ho do na so giot,
Sae au di sapata.

Balik-balik angin,
Na di pabalik-balik ni alogo;
Anggo rohamu na marbalik,
Tu ise ho mardabu holso.

Aut ni sopo roba,
Na tu bagasan tu balian;
Muda na so tumbuk ni roha,
Na bahat hata sidalian.

Hambeng ni Mandurana,
Na maranakkon andurian,
Sai danggan di mulana,
Diparsayang di hapudian.

Huboto do ulungku,
Na so tibalán ni kupia;
Huboto do untungku,
Na so masuk bagi tu dia.

Haluang di tomboman,
Sipetang di pangarambangan;
Malua ho di parpadanan,

Dapot do ho bagi andigan.

Teret ni so pala hodong,
Adong dope salak pambarbaran;
Teret ni so pala ho do,
Adong dope halak pangimbaran.

Rere ho tusi,
So bagi ho bintang bintuju;
Kehe ho tusi,
So bagi ho donganku tubu.

Lombu ni Salagundi,
Na mangite di sibatangi;
Mate au nangkong ligi,
Mangolu pe nangkong tunjung.

Ombur ma i sogot,
Bètak marjagar ria-ria;
Hutondur ma i sogot,
Betak tu boru ni kuria.

Dialusi Jasingkoru,
Hata ni siboru ni tulang;
Ulang ho mangandung mandoru,
Denggan do dalam hupalapang.

Buruk batang buruk,
Na payak dilombang-lombang;
Ulang ho pola sai muruk,
Ulang tibu badan matobang.

Anggo taringot tu untungta,
Ulang honggi mardabu holso;
Nada na sala di inanta,
Tangkas-tangkas jolo pareso.

Na so martumbuk do di palta,
Ning datu bonggur ni aji;
Tu pudi jat paruntunganta,
Ro panyosalan na jaji.

Denggan ma topot toptonmu,
Izin dunia dot akhirat;
Ulang pola enek rohamu,
Na dung jumolo do tarsurat.

Anggo taringot tu angkamu,
Na momo do ubat lungunna;
Asal ma izinkan rohamu,
Denggan do dalam bolusonna.

Rere gondong songka,
Ro do i gonjong simata;
Muda kehe na denggan tompa,
Ro do i impol ni mata.

Muda ro gonjong simata,
Dapot ma gonjong sambilan;
Muda ro impol ni mata,
Marsuo ma buatan ganjilan.

Dung marsialusan hata,
Dohot marsipasalosean;
Taulahi ma jolo barita,
Manuju dalam tu aluan.

Dompok di sada ari,
Tubu roha ni Jasingkoru;
Kehe mambuang-buang diri,
Laho manjalahi boru.

Dipio dongan siadosanna,

Doli-doli Jagurese;
Manjalahi tumbuk ni rohāna,
Boru na tama nissime.

Keta anggi marrao-rao,
Mai lulut rongkon timborang;
Keta anggi marlaho-laho,
Manjalahi dongan matobang.

Dung dapot lulut rongkon timborang,
Di toru ni podom-podom;
Dung dapot dongan matobang,
Betak suminok mata modom.

Anggo so dapot lomo ni roha,
Na tama dongan tu hauma;
Tatuntut barang na tu dia,
Nada pola barang mahua.

Mangalus Jagurese,
Doli-doli hundangan podang;
Laho mamulos-mulos mise,
Paidahon tajom ni podang.

Tama tupa ma i kahang,
Hata na nidokkonmi;
Manjalahi boru baen dangkang,
Mangihutkon ma da hami,

Anggo na sa taralo gogo,
Kehe hita manjalahi;
Haru pe dibusbus alogo,
Nada pola manyincal tahi.

Muda tarsuo di rohamu,
Boru na sadapot di ari;

Songon dia do pandokmu,
Kehe hita mangarayari.

Muda tibo tu hasusaan,
Ampot adong na mangambati;
Anggimu gabe partaonan,
Donganmu sahidup samati.

Barani mati haram tola,
Nada mulak mangalo musu;
Marjanji tu Allah taala,
Dohot bontar ni pusu-pusu.

He, he ning Jasingkoru,
Paidahon pos ni rohana;
Ingot ma ho poda ni guru,
Anso salamat tu ujungna.

Songon i ma da tama dokkonon,
Langka ma naposobulung;
Manjalahi manuk pahanon,
Baen dongan matuabulung.

Kehe ma patantan simanjojak,
Pagayung alang simangido;
Margiri margonjak-gonjak,
Songon pandu ni kudo,

Manangkok gumale-gale,
Manuat jumomba-jomba;
Haru pe manguas male,
Ringga do langka tu bariba.

Dompok di sada hatiha,
Bolkas tu balian ni huta;
Tarpaida tu nasida,

Bujing na margonjong simata.

Manangkok sian aek muli,
Sorat mangkadang panguhatan;
Jongjong manaili-naili,
Suangkon na dapot-dapotan.

Marbou Jasingkoru,
Laho mandapothon tapian;
Tarbege ma tu anak boru,
Jongjong ia maradian.

Diida dua doli-doli,
Maniop gendong-gendongan;
Adop ibana manaili,
Tarsongon na alang-alangan.

Gumadobuk taroktokna,
Lalu jongjong maradian;
Ampot na tumopotkon ibana
Aha ma hata sidalian?

Hata ro hata alusan,
Ning pamikir i rohana;
Ampot male ia nguasan,
Hulehen pe daon ubatna.

Taringot tu doli-doli,
Mangkatai marungutan;
Boru ni ise dehe i,
Na muli sian parduhatan.

Keta bo hita topotkon,
Taalo mangecet mangkobar;
Na dangolta taandungkon,
Ulang disincal begu abar.

Sapanjang dok ni bayo datu,
On ma da langka na denggan;
Na diparhatutu-hatutu,
Muda boru ni bayo enggan.

Halak na muli sian aek,
Sorat maroban panguhatan.
Tama ma i dielek-elek,
Baen dongon saparkancitan,

Mangalus halak Jagurese,
Martata holos-holosan
Pade ma i keta tasise,
Ampot tama do pargalasan.

Muda taralo mangkobari
Tabaen ma gurindam Aceh;
Laho manyungkun manyihiri,
Baen onding-onding parince.

Manangkok nasida tu dolok,
Topot bujing na maradian;
Tigor nada mamelok-melok,
Lopus marsuo maradopan.

Huta dia dehe on koum,
Na donok tu tapian on;
Marsapa hami dohot uhum,
Tola dehe bayo tuson?

Mangalus bujing na jop basa,
Markusor laho martata;
Jalop hata dialusisa,
Laho mandok goar ni huta,

Huta on Janji Matogu,

Huta ni raja na matua;
Ulang pola hamu ganggu.
Nada adong na mangkahua.

Antong ale parkouman,
Bujing na lambok marlidung;
Hami halak na mardalanan,
Anak na madangol di andung.

Mambarbari hita jolo,
Sidalian laho manjomur;
Mangkatai hita jolo,
Sidalian laho martutur.

Ramba dia rambamunu,
Rio-rio ramba na poso;
Marga dia margamunu,
Hami on naso umboto.

Mangalus bujing na jop basa,
Padua ungut na so piga;
Maol sajo do dilalasa,
Pajojorkon goar ni marga.

Ia ramba ni simanare,
Di topi ni harang-karangan,
Ia marga ni simanare,
Dapot do di huling-kulingan.

Raja na so adong ripena,
Tinggal di tonga ni harangan;
Muda tarida indegena,
Angkon dihandang-kandangan.

I ma so diboto hamu.
Dongan samarga ni amanta;

Aha muse do margamunu,
Ninna mangujungi hata.

Mangalus Jasingkoru,
Tarsonggang bo lalu tarkalak;
Anggo marga ni siparboru,
Torang ma da Siregar Salak.

Ia anggo rambanami,
Ramba na poso di suanan;
Ia anggo marganami,
Dapot do di torkan-torkanan.

Iung-iung ni Parupuk,
Madungdung bulu tu alaman;
Habiaran ni sopo na buruk,
Lungun ni bujing pardalanan.
Angin
Ning bujing i jalop,
Laho paunduk panaili,
Martata marolop-olop,
Laho mandok keta bo muli,

Antong ale silaklak ni randorung,
Sirege-rege ni ampang;
Sianak ni namboru,
Anak babere ni damang.

Kehe ma hita tu huta,
Tumopot bagas ni amanta;
Ulang di son hita marhata,
Ulang simbil di ida mata.

Mangalus Jasingkoru,
Mikim manuk tata hambeng;
Marsuo na nidok ni guru,

Ninna ma laho manyerbeng.

Situmbur ni dulang,
Sibotohon ni langge;
Siboru ni tulang,
Siiboto ni tunggane.

Parjolo ma hamu tu huta,
Ro pe hami sian pudi;
Borngin do ma padumpang hita,
Kehe hami jolo maridi.

Na denggan tagan bulu,
Na nitiptip ni Jagumorga,
Na nihilim ni Jatarumun;
Na denggan hutamunu,
Paradianan ni na loja,
Panatapan ni na malungun.

He, he ning bujing i

Muda denggan do porda bulu,
Rahut dohot andor baliang,
Rompu dohot mare-mare;
Muda denggan di matamunu,
Ro hamunu maradian,
Inte do badan simanare.

Muli bujing i tu huta,
Tinggal bayo di balian;
Nada be mago sian mata,
Bayo na dumpang di adian.

Tinggal ma halak Jasingkoru,
Markusari di balian;
Ise dehe kehe tasuru,

Mandokkon hata partalian.

Adat ni ganop-ganop huta,
Marraja do na poso-poso;
Tusi ma tapasahat hita,
Ulang hita ditingang dorso.

Muda Siregar gabe raja,
Adong anak ni bayo-bayo;
Tu si tadokkon halaloja,
Mangido dayo dohot upayo.

I ma tatopot saonnari,
Ulang hita songon panangko;
Tusi hita manyorah diri,
Tasurdui dohot timbako.

Muda dumpang asa dapot,
Sae ma hita di sapata;
Marjurus ma na hita topot,
Dumpang ma na nisolong mata.

Nada adong be na mangaskas,
Sanga na manggarang manggoring;
Sude ma hata tarpabolkas.
Jojo sude hita pararing.

Na poso pe sanga na tobang,
Pangisi ni huta on;
Diantan ma jala ditimbang,
Hatana taholoskonon.

Pulu pokat dohot tahi,
Langka na dua simanjung;
Mardalan laho manjalahi,
Di tonga ni dalan balobung.

Lalu tu alaman na bolak,
Tu alaman silangse utang;
Marragoi ma da halak,
Palingkas-lingkaskon pamatang.

Di jolo ni bagas na godang,
Bagas ni raja pamusuk;
Di siambirang sopo godang,
Pitu tanggana laho masuk.

Jongjong halahi santongkin,
Songon na manginte riapan;
Tar paida ma bujing nangkin,
Juguk dilambung partingkapan.

Manindo manatap-natap,
Tu alaman silangse utang;
Manondur topap dohot surak,
Laho marayak ari potang.

Tarsuo muse ma tu matana,
Bayo na dumpang na rianan;
Jongjong manatap tu ibana,
Songon na sulon-sulonan.

Didokkon halak Jasingkoru,
Tu dongan siadosanna;
Nada i boru ni partoru,
Tai na mora do amangna.

Tama tupa asa danggan,
Suang monci magulang tu dahanon;
Tutu ma i siboru enggan,
Na tama paoban-obanon.

Obanon tu hangoluan,

Obanon tu hamatean;
Muda dapot na niluluan,
Tulus ma dumpang hagabean.

Bur ning tabu kotu magorib,
Mantak marrago doli-doli;
Loja marsurak matungarip,
Langka sude maradu muli,

Mamolus di tonga ni dalam
Laho marsionjar-onjaran;
Padumpang dohot halak Balian,
Bayo na dua sauduran,

Lalu disise disapaan,
Bayo na ro sian Balian;
Giot tu dia pardalanan,
Tu bagas nise parbornginan.

Mangalus Jasingkoru,
Laho menyurduhon timbako;
Hita na padumpang di toru,
Hurang saotik tapatingko.

Hami halak na mardalanan,
Na ro sian Huta Balian;
Manjalahi parbornginan,
Dohot dongan sahaposan.

Marganami bayo angin,
Marhula dongan na so piga;
Di huta on gior marborngin,
Manjalahi dongan samarga.

Ise do sian hamu,
Sitiptip sanggar di adian;

Baen palu-palu ni gordang,
Di tonga porlak parsongtian.

Ise do sian hamu,
Dongan samarga sabagian;
Dongan sangombas magodang,
Pangkolosan ni pardangolan.

Nada hum tu dongan samarga,
Sude do dohot parkouman;
Umpama ni na morboniaga,
Marsitumbuk di alaman.

Na ganggang hita pasolkot,
Na solkot hita pasada;
Anso margogo songon tungkot.
Patorang dalam so tarida.

Mangalus halak huta i,
Dung sidung marsisurduan;
Tu bagas hita mangkatai.
Ulang matondik na ngalian.

Boti hurang do tamana,
Martutur di tonga ni dalam;
Songon on ma bo golapna,
Umpe hum marsipaidaan.

Boti hamu pe madung loja,
Na mardalan sadari on;
Sian manyogot tu na sonja,
Tontu male ma sihubeon.

Langka halahi tu bagas,
Dipahembang lage juguhan;
Songgop tu asar songon unggas,

Painte-intehon indahan.

Mangkuling ma na poso-poso,
Bayo nampuna bagas i;
Sada-sada ma dipareso,
Songon na laho manangkasi.

Ning hamu sada ina,
Hamu anak ni bayo angin;
Au ma na tama donganna,
Mardalani borngin-borngin.

Goar ni badan Jakulabu,
Parroha na so tarlabu;
Ubat ni nguas songon tobu,
Ale-ale ni dongan tubu.

Hami ma da di huta on,
Songon goruk-goruk hapinis;
Tahanan ni sude baenon,
Biar maropuk songon monis.

Sandokkon na masa na muba,
Adat ni naposo-poso;
Dipasahat ma tu iba,
Obanon na margoso-goso.

Amanta tungkot di na landit,
Suru on di ari golap;
Bope margondang sikudidit,
Sipalu gordang alap-alap.

Bayo-bayo orang kaya,
Sitiop gantang pangururi;
Sitambai na so sadia,
Sihorus na hurang lobi.

Antong dongan sabutuha,
Ning doli-doli Jasingkoru;
Dumpang hita sada hatiha,
Tuhanta i do na marsuru.

Pandokkon ni inanta sian hami,
Bahat do koum tondongnami;
Mangihutkon tu pandokmi,
Kahanggi ma hamu tu hami.

Dongan sarugi salabo,
Dongan salumpat saindege;
I ma gunana martarombo,
Martutur di ginjang ni lage.

Mangkuling inangna sian dapur,
Tarsonggot mardongan na homang;
Ro tu tingkap marsipurpur,
Patangi-tangi na marmangmang.

Juguk ia marois-ois,
Songon na mangaldo-aldoi;
Dipasolkot dipadais,
Mangunduk mangolo-oloi.

Amang na poso bulung,
Tubu ni dongan samarga;
Lilian au di lambok ni lidung,
Di hata na torop so piga.

Mambege hata dohot tutur,
Na nipajojo munu on;
Tama tupa sude maratur,
Saotik suada goraon.

Muda anak ma tutu;

Numma i gabe tambatu,
Tutu ma ninna hatutu,
Pade ma i ning bayo datu.

Au ma da inamunu,
Pangkolosan ni na male;
Ulang alangan be hamunu,
Ulang male gale-gale.

Mangalus Jasingkoru,
Laho manyurduhon timbaho;
Anggo di hamu dadaboru,
Momo do tumbuk pangalaho.

On pe da inang tobang,
Bope ho amangtua;
Parsuoan na so niambang-ambang,
Sai bahat maroban tua.

Madung dapot siadosanku,
Asa dumpang simatobanku;
Nada be adong habiaranku,
Sonang ma di ate-atengku,

Ia simanare on,
Hum au do anak sangkibung;
Dung marsuo dohot angka on,
Puraga ma pajojor lidung.

Anggo saidanna on,
Sulon-sulonan simanare;
Manyarihon sidangolon,
Manangihon hata ni ende.

Landit dalan tu timur,
Sabur minyak sada galangan,

Hancit anak sangkibung,
Mamunjung-munjung sadalanan.

Sannari siganda sigandua,
Na landit batu ni ampolu;
Na sada gabe dua,
Sumonang ma roha mangolu.

Nada be hum sada manunggal,
Songon parurat ni ancimun;
Adong ma dongan mebat munggal,
Mangalo halak sipanyamun.

Dongan merungut-ungut.
Songon gompul marbagi bonbon;
Tarpulos ma ujung sisungut,
Laku ma arga ni bon.

Ah, mangan jolo hamu uncok,
Male hamu sadari on;
Borgo naron gabe nganyok,
Gule na nipatian on.

Keta hita mangan mangere,
Ale dongan sada ina;
Naron ma tapature-ture,
Anso maroban tu sonangna.

Mangan ma halahi sude,
Rap aum-aum sibangke;
Salaku marindabe-indabe,
Songon parbutong ni toke.

Sidung mangan dohot minum,
Dipayakkon partimbahoan;
Diligi tu ambirang siamun,

Rap sonang di pamidaan.

Mangkuling Jagurese,
Marhata ni aling-alingan;
Songon sidalian manyise,
Sarruas tu partandangan.

Godang de hutamunu on,
Keta jolo tahaliangi;
Laho pahiang-hiang hodohon,
Pasonang pinggol simanangi,

Mangalus Jakulabu,
Pade ma i siadosan;
Keta ma hita tapatibu,
Denggan do parlaos-laosan.

Boti denggan rondang ni bulan,
Tarida dalam kulilingna;
Sonang ma i mardalan-dalan,
Nada adong abat janggalna.

Mijur ma na dua tolu,
Mamolus di dalam balobung;
Kehe tu jae tu julu,
Anak ni na mauli bulung.

Denggan rame ni huta on,
Sude pade marbanjar-banjar;
Inganan marsiriaon,
Dibujing-bujing marajar.

Songon on denggan ni huta,
Lupa do iba sidangolon;
Bahat di son impol ni mata,
Na tama parale-aleon.

Marpikir Jakulabu,
Marsigoitan dohot dongan;
Antan hamu hata madabu,
Ulang hamu hum marngangangan.

Muda iba na poso-poso,
Litopot dongan doli-doli;
Nangkon be sai dipareso,
Diligi ma bujing na uli.

Dipatama partandangan,
Tu bujing na so parbasoan;
I ma utangta adop dongan,
Dompak iba dihaposoan.

Tapamasuk halahi sannari,
Tu bagas na godangan;
I ma dipasari-sari,
Ulang be hum mangampu tangan.

Kehe hamunu mangidohon,
Tu boru ni raja i;
Hata na denggan disombahon,
Mandokkon pangidoan i.

Langka ma halahi tu bagas,
Manopotkon boru namora;
Lalu ma suruan na ringgas,
Manyombahon simora-mora.

Dung lalu halahi tu bagas,
Lalu mandok hata na denggan;
Songon somba ni na mangido gasgas.
Diholoskon tu boru enggan.

O lembu-lombu,

Lombu tolong;
O na marbaju. (1)
Hami on mangido tolong.

Muda adong alu ni roha,
Anso ke hami mangalap;
Nada be tarajaha-jaha,
Tinggal dongan di'golap-golap.

Partolongan tu na poso,
Giot pamasuk na martandang;
I ma na hami pauso,
Tu boru ni bagas na godang.

Mangalus bujing-bujingi,
Tarsonggot marsipanotnotan;
Mamikirkon hata ni lidungi,
Dokdok nada dapot diantan.

Dung sangombas dipikiri,
Dohot donganna sapodoman;
Nada tarjagit hobari,
Pamasuk bayo na di alam.

Biasi tuson hamu manduruk.
Giot pamasuk na martandang;
Diboto hamu do siparmuruk,
Nampuna bagas na godang.

Haru pe hami bujing-bujing,
Nada torus rohanami;
Gonan ma pasedep pangkuling,
Mangidohon tu amanami.

Tai anggo di bagasan roha,
Madung mandokon mangoloi;

(1) na marbaju = bujing-bujing

Tai nada bulus dibuka,
Ulang didok na manjoloi.

Dokkon hamu ma tu amanta,
Nada hami na mayompiti;
Muda denggan do dapot hata,
Nada pola hami ambati.

Kehe ma bayo suruan,
Tumopotkon nampuna bagas;
Dung disurduhon partimbahoan,
Mangkuling ma bayo na ringgas.

O ompung raja bolon.
Mangidup hita nian jolo;
Dipaula-ula songon na sulon,
Songon halak na so malo.

Marsapa ma raja na tobang,
Laho mamalun pangidupan;
Dijarka dipatimbang-timbang,
Aha hobar nangkan adopan.

Aha do di hamu sannari,
Baen na ro hamu tu son;
Songon on potang ni ari,
Boti maol dalam boluson.

He, he! Binoto ma hami dakdanak,
Na so umboto na ngalut;
Dipajinak so tarpajinak,
Mangalandit songon bolut.

Songon gayo na so hasaputan,
Res pahae res pahulu;
Nada mamboto parkancitan,

Anggo hum marun matok ulu.

Giot martandang doli-doli,
Sareto mangido napuran;
Bujing-bujing nada mangoloi,
Marbiar nasida digusaran.

Adong ro kahangginami,
Sian kampung Huta Balian;
I ma na pamasuhonnami,
Muda na kobul pangidoan.

I dehe antolismu,
Baen na ro ho saonnari;
Inda na oto ma hamu,
Ra hamu dipambiar-biari.

Hamu do na umboto i,
Talak do pintu bolusonmu,
Nada adong na mangorai,
Baen ma na sagiotmu.

Langka ma ho mangalapsa,
Bayo na mangido martandang;
Nada adong na manggorasa,
Ro ma tu bagas na godang.

Mulak doli-doli suruan,
Mamulos-mulos sisungutna;
Mandokkon kobul pangidoan,
Na nipasahat tu ibana.

Didokkon ma tu bujing-bujing;
Anso denggan pahembang lage;
Malo-malo hamu mangkuling,
Ulang adong na jat tarbege.

Hualap jolo halahi;
Anso ro tu bagas on;
Laho patandahon bohi,
Marsiap ma hamu di son.

Didokkon ma tu Jasingkoru,
Taringot tu pokat doho tahi;
Na dung kehe na nisuru,
Mangido patandahon bohi,

Martandang tu boru na mora,
Sareto mangido napuran;
Nada adong be na manggora,
Madung dijagit pangidoan.

Di son dope anso tambatu;
Ning roha ni Jagurese;
Nada pola mangungkit batu,
Madung butong mangan lamase.

Tai, dibaen songon hura-hura,
Mangkudukkon por ni rohana;
Didok ma boru ni namora,
Nada iba jumbang alona.

Hami halak sian na dao,
Na tandang marepal-epal;
Songon na ruar sian guo,
Na oto na hurang marakal.

Na so mamboto adat ugari,
Na tama patutongaon;
I ma na hami habiari,
Hum pabahat bahat jahaon.

Ulang mabiar hamu di si,

Hata ro hata alusan;
Nada hita na maneasi,
Tabolus sajo dalam pintasan,

Gor Siharangkarang,
Huta ni Jalenggai;
Ise na puluk mangararang,
Na danggan na tabaeni.

Mangalus Jasingkoru,
Laho paujung parkobaran;
Baen madung tarsung disuru,
Nada adong be habiaran.

Muda hita na so malo,
Halahi do mangajari;
Nada tarbaen be so olo,
Keta hita parsiajari.

Langka ma hita manaek,
Tu bagas ni moranta on;
Dayuk hatanta songon aek,
Mangido angka sipangidoon.

Batuk-batuk ma Jasingkoru,
Songon pitua ni inangna;
Didegehon tangga partoru,
Laho patelengkon segarna.

Dung di ginjang halahi,
Madung hembang amak lampisan,
Diligi sabola tu suhi,
Marbaris juguk pangidoan.

Longang nasida manotnoti,
Tu bujing na rianan i;

Nada be on muba markoti,
On ma na niluluan i.

Marsiligian bujing-bujing,
Laho marsigoit-goitan;
Homa parjolo mangkuling,
Ho do tibalán sahatan.

Tu tonga on ma hamu juguk,
Tu amak na marlampis on;
Ulang tu duru mangincugut,
Hum samo hita do di son.

Juguk na dua simanjungung,
Didongani nampuna huta,
Sian suhi-suhi parujung,
Painte geleran ni hata,

Mangkuling Jakulabu,
Pasahatkan bayo na ro;
Hobarna pe asok didabu,
Tonggi songon dai ni ngiro.

I ma da boru ni morangku,
Baen na ro hami tu son;
Maroban anak ni kahanggiku,
Patandahon tu isi bagas on.

Sareto mangido burangir,
sanga timbaho siidupon;
Pasahat utang dohot singir,
Mangido pargogo sitiopon.

Mangalus bujing-bujing i,
Laho mangaranga-ranga i;
Surduhon do burangirta i,
Tu anak ni hula dongan i.

Disurduhon simanggurak,
Di bagasan parsalipian;
Di salapa gumba perak,
Buatan ni halak na robian.

Tanda ni burangir tombak,
Rait hamu so hudungdungkon;
Tanda ni denggan ni roha,
Jagit hamu so husurduhon.

Burangir sirara huduk,
Na bontar marpamalos;
Sabulan so ra busuk,
Sampulu taon sora malos.

Na nitiktik ni tangan siamun,
Na nilipet ni tangan siambirang;
Daon ubat ni na malungun,
Pamokmok sibuk na marnyang.

Mangalus Jagurese,
Laho manjama-jama sakunia;
Markusor gumarse-garse,
Laho patamahon hobarna.

Marburangir hita jolo,
Sanga bia dai ni soda;
mangkatai hita jolo,
Sanga bia pangalahona.

Timbako janggut ni jaung,
Masopak dangka ni halosi;
Ginjang baya tangan manjagit,
Na so malo do mamalosi.

Di son timbakonami,
Timbako akun-marakun;

Jalang tajalangkon,
Sian i ma i dalam marhalulungun.

Rere hami jolo,
Silalat on silalat hian;
Kehe hami jolo,
Salamat on selamat tinggal.

Silalat on silalat hian,
Hadang-hadangan ma di hami;
Salamat on selamat tinggal;
Salamat jalan ma di hami.

Mijur bayo na martandang,
Kehe modom pahirbang ulos;
Tumopotkon dongan magodang,
Lambok lute humolos-molos.

Lalu tu sopo podoman,
Nada tarpodom Jasingkoru;
Manyarohon tompa oroman,
Dohot jogi ni anak boru.

Modom so ra tarpodom,
Kehe juguk tu talaga;
Mangombus tulila na ni aldom,
Uti-utian ni dongan samarga.

Dipistik diparhalilian,
Digoit tu toru tu ginjang;
Songon lehu-lehu di harangan,
Sora ni imbo gagang na godang.

Tarbege tu boru na mora,
Sora ni tulila bulu;
Diapus mata na marrara.

Juguk tondo mangkayo ulu.

Dipatangkas ditangihon,
Tulila na tangis mangandung;
Ditungkir laho ditailihon,
Tondo ia marundung-undung.

Poncoduhur ho Jasingkoru,
Anak ni dongan samarga;
Ulang diarsak dadaboru,
Songon lagang ni manuk rangga.

Juguk ia marois-ois,
Tondo ia humolos-kolos;
Boti marjeng tumangis-tangis,
Songon ngot-ngot ni na dipulos

O am!

Tuat ho ursa,
Inda'dong padang gagatonmu;
Modom ho mata,
Inda'dong padan ingotonmu.

Bele-bele markusari,
Torang ma sidumadang ari;
Manuk pe runkar mangambur,
Halak ribuan mangkobari,

Ia halak Jasingkoru,
Dohot dongan siadosanna,
Mijur ma halahi tu toru,
Haruar sian podomanna.

Kehe pahulu tu tapian,
Marsuap sanga na maridi;

Diligi diparhalilian,
Betak ruar rongkat ni tondi.

Dung sidung na maridi,
Muli ma halahi tu huta;
Nada adong be na tarpudi,
Bayo sanga hula donganta.

Dung di bagas halahi,
Lalu di pandangan payogon;
Nada adong harut ni bohi
Na mangan bo na mardahankon,

Dung sidung mangan sasude,
Mandokkon hata Jasingkoru,
Dipabajan dipapade,
Adop na tobang dadaboru.

Didokkon ma mauliate,
Tu loja ni namardahan;
Dohot bontar ni ate-ate,
Tibu ma ditumpahi Tuhan.

Muda lalu tu hutanami,
Marjamita do i hami;
Tu ama bo tu inanami,
Taringot tu pardalanannami.

Torkis ma da inang tobang,
Bo pe ho amantua;
Hipas gogo ulang tarlubang,
Pengpeng hamu laho matua.

Adop tu halak angka i,
Bayo angin Jakulabu;
Tontang tu halalojami.

Payak do i di ginjang ulu.

Muda adong sada hatiha,
Ro do ho tu hamian;
Songon indok ni gorihaha,
Laho manungkir hamiskinan.

Songon i do da adatna,
Di hita na poso-poso;
Diebati do huta ni donganna,
Laho paago-ago holso.

Muda pahulu simanggurak,
Angkon pahae sitimpulon;
Ulang iba lalat di perak,
Ditungkir dongan sasidangolon.

Tama ma i sada ina,
Ning doli-doli Jakulabu;
Muda so dong janggal abatna,
Pahulu pe hami tibu.

Antong langka hami jolo,
Mulak tu Huta Balian;
Tolong ligi padulo-dulo,
Bunga ni pancur paridian.

Kehe ma halahi mardalan,
Mamolus tor mangarobaen,
Salamba lolot di dalan,
Langka na hipas do dibaen.

Di hos guling mata ni ari,
Lalu ma tu huta Balian;
Inangna juguk markusari,
Painte ro na mardalanan.

Na so niambang-ambang,
Ro ma da sinuan tunas;
Horas torkis nada tarlubang
Limus nada marginas-ginas.

Diompot martanak manggule.
Baen panganon ni anakna;
Ampot na manguas male,
Anso adong ubat lojana.

Dompok na manggarai api,
Disungkun aha do jamita;
Adong do na tumbuk tu nipi.
Boru na disolong ni mata.

Mangkuling Jagurese,
Marsianyang martata;
Dapot ma da sanga ise,
Anggo na nisolong ni mata.

Di huta Janji Matogu,
Huta ni raja na martua;
Hamuntulan ni abar dohot begu,
Na sangap jana na badia.

Adong boruna sada bujing,
Na margoar Na So Tardago;
Na lambok na gartip mangkuling,
Panguhalan ni bisuk dohot gogo.

Toptopan mauli bulung,
Saotik suada salana;
Na lambok manyambut lidung.
Hona ginjang dohot godangna.

Na pistak marsitijur,

Jana na ganjing marpayogon ;
Na lingkas manaek-mijur,
Na lo patupa sidohonon.

Parbisuk manjuluk tano,
Na laos mangite di gadu;
Marsitampar lanok di laut siborang,
Dibotosa jantan boru-boru.

Parsanggul sangkumpal bonang,
Parsisilon taji ni manuk ranga;
Na pande maronang-onang,
Lungun ni hami na samarga.

Rimpur ni jari-jarina,
Songon sigulandak na poso;
Hum panyerbeng ni matana,
Sude halak mardabu holso.

Panaili manggege tobing,
Halalaho lumondut tano;
Songon lagang ni boru hombing,
Sisunggul mata nono.

Na bahat ma huta hubolus,
Anggo di na saluat on;
Nada adong be na lumimus,
Sian bujing na sada on.

Mangalus ma inangna i,
Laho mandok ois da ois;
Jumeges do parumaenki,
Apus ogos inda mardais.

Haram tola haramboja,
Ning jagurese mangalusi;

Biar pe dalan maltik loja,
Nada nggo dapot tardosdosi.
O . . . am! ning inangna laho mandok;
O le kotuk,
Langkop ni abal-abal;
Tu dia ho so tuk,
Bayo parabang-abang.

Mangkuling Jasingkoru,
Mangalanggan-langgan inangna;
Ulang songon Raja pangiburu,
Diarsak tuhor ni serena.

Tangihon da inang denggan,
So hupajojor sada dalan;
Ulang mandele buragan,
Pikir jolo marpalan-palan.

Faringot tu sinadenggan,
Dohot tu sinajogian;
Kehe iba tu pardosdosa,
Ulang mago tu haliluan.

Asing do jambak Toba,
Sian parjambak di Angkola;
Haru di denggan di mataniba,
Nada tardok denggan di huta.

Ulang iba lupa-lupaan,
Di ende ni halak parjolo,
Ulang ditinggang hailaan,
Mago borngin kehe gilo.

Salak-salak na mata,
I ma salak na tumonggi;
Muda dung disolong mata,

I ma halak na jumogi.

Marumbak ma sitata,
Tu lombangni Sidalu-dalu;
Muda dapot na nisolong ni mata,
Salamat tu jae tu julu.

Nada baen bontar gorsingna,
Sanga baen ginjang godangna;
Ato baen hamoraanna,
Baen na bonggal baritana.

Sugari adong boru ni halak,
Tumbuk hagirot ni rohangku;
Nada pade inang ditulak,
Ulang pabahat na gatauku.

Langge da inang, na tubu di porlakta i,
Haru so langge pe inang;
Buatonku langgengki,
Magabe da inang, sibuat lomona i,
Haru so gabe pe inang,
Buatonku lomongki

Ah nada huboto mangalusi,
Roha-rohamu ma tu si;
Inamu nada mangaskasi,
Asal dapot dongan sakongsi,

Mangan ma hamu amang,
Malo hamu sadari on;
Ulang pola be ho gamang,
Dung na i ma palaluon.

Dung sidung butong mangan,
Mandokkon lidung Jasingkoru,

Taringot tu boru tunangan,
Nada nggo boru ni partoru,

Dilanggam-langgam ma inangna,
Anso dapot sonang ni roha;
Taringot tu boru ni ibotna,
Nangkong be dipajaha-jaha.

Inang na tuabulung,
Ning Jasingkoru mangulahi;
Nada au na gumagai lidung,
Sanga na pili-pili bohi.

Dompok na tandang mepal-epal,
Madung dumpang impol ni mata;
Na satumbuk dohot pal.
Boru na gabe ning jamita.

Madung hualo mangkatai,
Layak dapot do huida;
Anggo so adong na mangambati,
Na tibu olo do nasida.

Mulai hami padumpang,
Muli ia sian aek;
Panguhatan do dihadang,
Gok aek marbelek-belek.

Dipaintesa hami ro,
Dibaen songon sidalian;
Dipaula markiro-kiro,
Lalu marsipangkulingan.

Jumolo do hami martutur,
Manyapai marga ni nasida;
Hami pabajan hami atur,

Lopus dapot tanda-tanda,

Dung dapot hobar na denggan,

Dipio do hami tu huta;

I ma adat ni boru enggan,

Mambaen dalam impol ni mata.

Hami pajolo ma ibana,

Di pudi hami marikhtiar;

Songon dia akal bisukna,

Palalu hata sian ruar.

Dung lalu hami tu huta,

Hami jalahi dongannami;

I ma dongan samarganta,

Na patama-tamahon hami.

Anak ni Bandaharo orang kaya,

Sitiop gantang pangururi;

Sitambai na so sadia,

Sihorus na hurang lobi.

Dipature dipatama,

Aha na tumbuk tu hami;

Dipatandahon do tu ama,

Dohot tu inang tobangnami,

Denggan do hami dipature,

Songon dongan sada inana;

Nada songon siparsere,

Bahat na jais tu donganna.

Tata sude ama inana,

Mangalehen sipanganon;

Haru pe hurang di daina,

Tabo songon ursa na bolon.

Rasipan ni boru Dairi,
Jomuran ni boru Angkola.
Na pasundat-sundat panaili.
Na paulak-ulak hosa.

He, he, sambut saluangi bo kele,
Timbako ni anak ni hula i;
Manguas iba so male,
Pambahen ni logu sikola i.

Nada i marimbar sira,
Sodang sira sian Barumun;
Nada i marimbar dia,
Sodangna sombu halulungun.

Lambok bulung ni botik,
Na lambok dung ditapusan;
Marbalos burangir na nitiktik,
Hata madung marsialusan.

Anak ni hula dongan,
Manyungkun hami manyapai;
Di dia do huta inganan,
Anso binoto mangkatai.

Marumbak hayu hapur,
Bulungna i pade tultulan;
Dibaen na mancecet dopur,
Lupa manyungkun partuturan.

Laho tu dia do hamu,
Na tandang merepal-epal;
Ise do na nitopotmunu,
Songon labuan ni kopal.

Humusor Jasingkoru,
Sareto mangalusi hata;

Diingot do poda ni guru,
Mangido maaf di nampuna huta.

Boru ni morangku,
Boru ni tiang nagori;
Taringot tu langka-langkaku,
Giot mambuang-buang diri,

Hami halak sian na dao,
Na langka tandang mepal-epal;
Ise na mangontang marpio,
Tu si ma labuan ni kopal.

Halak na tarkabang dingding,
Na so markoum so marbiak;
Manjalahi onding-onding,
Pangkolosan ni na manyiak,

Diimbuskon aloge simarangin-angin,
Tu tano rura banua on;
Tuani ma torkis madingin,
Lalu tu parsuoan on.

Songon bulung ni timba laut,
Na malos so dipahiang;
Nada marpiso marraut,
Borngin modom tu liang-liang.

Habang so tarboto-boto on,
Songgop so tarida-ida on;
Male so dipandung payogon,
Manguas, so minum aek sipongkihon.

Songon manuk si Simaninggir julu,
Potang ari so diparaga,
Torang ari so dipatuduk;
Kehe tu jae tu julu,

Dipogasi manuk rangga,
So dong be ina na mangkurtuk.

Na bahat do nian sipagol,
Sipagol ni Janji Lobi;
Na bahat do halak na dangol,
Di hami ma na sumurung lumobi.

Sanjongkal dope pahu,
Madung ditinggang pangaritan;
Sanjongkal dope au,
Madung ditinggang parkancitan.

Nada salak songon pahu,
Na mamanjang di Pangarongan;
Nada halak songon au,
Na mamanjang di pardangolan.

Ois, tali sipatali-tali,
Tali on do markunetnet;
Muda di jaha dipasari-sari,
Ilu pe ro simbur manetek.

Tai dihahuai tinoto,
Batu ni sabi jarumbunan;
Dihahuai binoto,
Dapot ni ari paruntungan.

I ma na hami andungkon,
Tu hamu boru ni mora;
Ampot ra do manjarahon,
Na tama pasonangkon roha.

Ois i le anak ni hula dongan.
Ning bujing i mangalus;
Dompak tinggal di hasiangan,

Ragam bage dalan dibolus.

Tai da

Hum na pasundur-sundur bulu do hamu,
Manyarsar asar ni si pagol;
Hum na pasunggul-sunggul lungun do hamu
Mangarkari sude ni na dangol.

Andilo na hinanan,
Hadang-kadangan saonnari;
Pangidoan na hinanan,
Mananggung badan saonnari.

Sangkabong abit biru,
ruhut do parsuong-saongan;
Anggo di hita sibaharu,
Ragam bage do siboluson.

Soban di parapi,
Sagadon na melus-elus;
Na sobar do na jadi,
Anggo mandele nada tulus.

Hami pe da siadosan,
Bayo angin haba-haba;
Pananggunganna so martudosan,
Di joman na maruba-uba.

Tu Tuhan tapasahat,
Anso dipangidohon nobi;
Horas hita sehat walafiat,
Dapot untung marganda lobi.

Mangalus Jasingkoru,
Marpantun saro Malayu;

Uluna dipagaru-garu,
Abitna dipapuyu-puyu.

Mangkail-kail di ginjang bondul,
Na marompan sipeleh udang;
Hala sakitnyo dagang mamolus,
Na manumpang di ranto urang.

Dirontang-rontang tali saging,
Dirontang diruntun tidoh;
Ditontang-tontang aer masin,
Ditontang diminum tidoh.

Dialusi bujing-bujing,
Pantun ende saro Malayu;
Dipalaing dipaganjing,
Songon na mangite di hayu.

Ursa balari di harangan,
Mati ditembak anak rajo;
Jangan dikonang paruntungan,
Ulang kito jadi binaso.

Anak unggas songgop di tarup.
Tiga saranting bio-bio;
Kalo sakit jangan merajuk,
Kami pun baitu itu juo.

Ngangang anak ni huta i,
Songon singgip na hurang onyak;
Nada dohot mangakatai,
Homang lalu payak-payak.

Diidup timbako simarpolom,
Saparopat arga saperak,
Diidup tarpodom-podom,

Lambok luta nada margorak.

Diungkap jandela dipaganggang,
Hara ni hodok madung mumbang;
Disi ma ia jongjong singgang,
Suangkon na hona pitonggang.

Kecet marsialus-alusan,
Lopus tu na satonga borngin;
Holos marsipangkolosan,
Lupa mulak sibayo angin.

Anggo roha ni Jasingkoru,
Nada be na main-main;
Suang songon indok ni guru,
Juguk di surgo jannatunnain.

Maruhuak manuk parjolo,
Baru diingot ari potang;
Didokkon mulak hamu jolo,
Modom pogalehon pamatang.

Diumpat podom-podom,
Tubu di paya do da poring;
Kehe hamu jolo modom.
Tumpuk ni mata do da borngin.

Inkop ma i jolo,
Pisang siholot tabarbari,
Mulak hamu jolo,
Saulak nari taulahi.

Disalong bulung kopi,
Ditalpokkon mali-mali;
Ulang hamu losi,
Ro hamu saulak nari.

Muda rere hamu sogot,
Tabaen situmbur ni tolong;
Muda kehe hamu sogot,
Tabaen sisunggul na modom.

Laung-laung ni pining,
Laung-laung ari manyogot;
Horasma da tondi madingin,
Muli mardomu do i sogot,

Muda mandurung ho di pahu,
Talpokkon simardulang-dulang;
Muda malungun ho di au,
Tatap sirumondang bulan.

Hamu marbabo lupak,
Hami marbabo sibatangi;
Ulang hamu lupa,
Di badan simanarenami.

Pege ni Japandaloan,
Sitata urat ni galunggung;
Endemunu parmanoan,
Tatamunu ubat lungun.

Burangir ni Jaburangir,
Karako ni Jakarako;
Partata ni sibayo angin,
Tu Moka tuk baen balanjo.

He, he! ning Jasingkoru,
Laho pajop partimbahoan;
Muda mijur hami tu toru,
Ulang pola hamu agoan.

Haruaya ni Barumun,

Tubuan simareme-eme;
Diambang na pasombu lungun,
Hepengan na marsuru kehe.

Sanggar na mait-mait,
I ma na padungdung-dungdungkon;
Muda dʉng padais-dais,
I ma na palungun-lungunkon.

Bia ma he pambaen lupak,
Sibatangi ni saba julu;
Biama he pambaen lupa,
Baen lambak ni lidungmunu.

Lai-lai ni lelan,
Ditangkap bayo sipandurung;
Partata ni siboru enggan,
Daun ni nyae ubat lungun.

Bia ma pambaen tu kopi,
Ari poken di Silindung;
Bia ma he pambaen losi,
Manyarohon lambok nilidung.

Muda lupa ho di pahu,
Lupa ma ho di laklak ni singkoru;
Muda lupa ho di au,
Lupa ma ho maranak marboru.

Topik-topik ni pinggan,
Muhut-muhut ni singgolom;
Salamat di hamu na tinggal,
Tole tangan jausolom.

Jala tajalahon,
Jala ni tobing Barumun;

Na menek do nian bagasna,
Tai na dengen toptopanna;
Sanga sadia ro bayona,
Lapang runggar sude rohana.

Partalaga na so hiang,
Parjambur sitare bohi;
Tama sandaran songon tiang,
Jana na ringgas manumpahi.

Nada-da na tarpajojor,
Jana na tarpasari-sari;
Tongtong do jongjong di na tigor,
Nada'nggo pargonjak pargiri.

Nada da inang tarbalos,
Sasude pambaenanna;
Hum pagodang-godang holos,
Jalahi ma tumbas balosna.

Muda langka hami sogot,
Topot tumunjungi ibana;
Ulang lupa ho marningot,
Manongos sonang ni rohana.

Baen alame dohot wajit,
Sanga sasagun pe tama;
Songon jokat ni na wajib,
Mangihut tu rukun na lima.

Mangalus ma inangna,
Mangunduk marois-ois;
Mambege jamita ni anakna,
Langka ma ia tuas tais.

Aha ma tumbas balosna,

Na tama pasonang roha;
Tongoson tu dongan samargana.
Rohana dipajaha-jaha.

Disapai ma anakna,
Sanga andigan kehe tandang;
Anso dipasingkop obanonna,
Na tama dihadang-kadang.

Mangalus ma anakna,
Na tibu langka do ibana;
Tumopot boru tunaganna,
Manyaboi halalungunna.

Tibu ma atur pasalose,
Anso langka au sogot;
dohot anggingku Jagurese,
Songon na manyonggot-nyonggot.

Ia boti ale dongan,
Taringot tu halak Jasingkoru;
Nada martontu be na mangan,
madung diarsak dadaboru.

Modom so ra tarpodom,
Ngot songon na mondok-ondok;
Songon borong-borong na nialdom,
Pultong hosa ulu madokdok.

Kehe tu sopo podoman,
Palimus-limuskon sisungut;
Tarsingot ma tu parmayaman.
Malua ende ungut-ungut.

Landit ni na mandurung,
Manguak jantung di balobo;

Baen hancit ni na malungun,
Manetek ilu so binoto.

Sitarak dumaol-daol,
Sitottot na dumundung bulu;
Marsarak padao-dao,
Alogo na sumunggul lungun.

Songon on ma na mandurung,
Sude soban saparapi;
Songon on ma na malungun,
Marsak roha sasadari.

Nada hum soda na mata,
Dohot do soda binoyom;
Nada hum roha na marsak,
Dohot do mata so tarpodom.

Lancat ni Sialogo.
Dipaurdot urdot sarudung;
Muda na tarsunggul modom,
Sumurung lobi halalungun,

Sajari urat ni bira,
Dua jari urat ni antaladan;
Sadari inda huida,
Dua ari mardandi mangan.

Tanda ni kotu luhur,
Manningkos mata ni ari;
Tanda ni siparlungun,
Mardandi mangan sasadari,

Bargot na mumba boru,
Jolo sitanggis podom podom;
Muda na so mambuat boru,

Jolo tangis anso modom.

Tintin hupartintin,
Golang hupargolang-golang;
Muda dung tumbuk ni nipi,
Na menek hupagodang-godang.

Muda buruk bajungki,
Angkon na hubolang-bolang;
Muda tumbuk ni rohangki,
Angkon na huoban-oban.

Gariang tano bosar,
Dalan tu Mandalasena;
Bolkas ma da ditinggang hobar,
Hara ni bumopkop nasida.

Marumbak ma rambutan,
Marumbak tu sopo na denggan;
Padiar marutang sambutan,
Sodangna marsiboru enggan.

Dompok hatiha songon i,
Ro inangna sian bagas;
Jumolo dipatangi-tangi,
Songon na manyisipi unggas,

Oh, oh! Ning rohana di bagasan,
Manangihon hata ni ende;
Lupa male ia nguasan,
Manyarohon lontik ni konde.

Ra ma on mambaen nyae,
Sanga na marun matok ulu;
Mambaen ate-ate magete,
Mangarsak jolma na mangolu.

Mangan pe nada tabo,
Modom pe so ra tarsinok;
Ngot songon na habo-habo,
Langkana pe donok-donok.

Manguas ia so male,
Male ia inda manguas;
Pamatang madung gale-gale.
Songon leto na hona pias.

Dompok di arian raya,
Martaktahuak manuk rangga;
Mangantor tu pusu-pusunia,
Lalu kehe juguk tu tangga.

Ise pe so adong mamulus,
Sanga na juguk mangkobari;
Dipio dongan nada mangalus,
Ro ma lungun na mangarkari.

Marende au dengganan,
Marende marungut-ungut;
Ampot ro na sian dalanan,
Anso hupaihut-ihut.

Lundu-lundu arirang,
Magulang unte tu sampuran;
Ois lungun lungun arian,
Manetek ilu tu ampuan.

Harias ni Panobasan,
Talpokkonon ni na mandurung;
Arian so habolasan,
Potang ari marhalulungun.

Sangging do na nidurung,

Dipadao ma santongkin,
Batuk-batuk ma laho ro;
Ulang tarboto johir batin,
Dipaula ma marsiloro.

O Jasingkoru,
Anak bangunan ninamu;
Ulang ho mangandung mandoru,
Madung inte boru tulangmu.

Ngot ia hayo-hayo,
Songon halak na boru modom;
Tarida sibunian ni bayo,
Muap uap ni na niboyom.

Mangambur ia ruar,
Sian sopo parate hodong;
Dipaula siar-siar,
Disunggul ho halak na modom. (1)

Mangan markobas halahi,
Inangna pasingkop silua;
Disapai diulahi,
Dia ma na tu amantua.

Sidung na markobas,
Langka ma na mardalanan;
Hum sangombas dua ngombas,
Tinggal ma huta inganan.

Tatungkir jolo le dongan,
Taringot tu Na So Tardago;
Dung do na marsijalangan.
Dohot bayo angin alogo.

- 1) Perahu sama perahu,
Jangan ditukar kemudinya;
Jikalau tahu sama tahu,
Jangan dibuka rahasianya.

Panyaputina bulung bira;
Tangking do au na malungun,
Malo-malo manghira-hira.

Basaen rahi dua,
Undung-undung tu sikola;
Muda hombar hita na dua,
Nada huingot na suada.

Unte-unte galunggung,
Unte-unte mardagul-dagul;
Muda panombo ni lungun,
Ilungku pe marsabur-sabur.

Tonuntonun kori,
Tonun kori undung-undungku;
Muda tolu ari tolu borngin,
Tongos daon lungunku.

Nado naso ra mandurung,
Incor do naso ra sirohot;
Nada naso ra malungun,
Hamu do naso ra dumonok.

Dung do hita arirang,
Jolo sitanggis podom-podom;
Jung do hita marsirang,
Jolo tangis anso modom.

Hutatap ombun di langit,
Manonga sabun tu Barumun;
Tu aha so tumangis-tangis,
Dibaen panombo ni lungun

Tu aha ma so marpar roba,
Laing so sidung do rabion;

Tu aha ma so marsak roha,
Marragam pasari-sarion.

Tandiang marompu ijuk,
Pangintean tu sidoho-doho;
Marnyang markondursibuk,
Hape na malungun di ho do,

Ulang ale manjaring loba,
Tu sialang gonting Barumun;
Ulang ale mangadang roha,
Ulang marngotngot halulungun.

Marumbak ma tarutung,
Magulang batu tu robaen;
Muda panombo ni lungun,
Bia-bia na so hubahen.

Por udan di Sitatarang,
Di si ma manoktok undung-undung;
Muda marayak sundut mata ni ari,
Di si ma manostos halalungun.

Denggan toluk Sibolga,
Tambatan ni paraunami;
Anggo na so maradu loja.
Nada sombu lungun nami.

Gonan ma au langge,
Ulang mandurung tu Singali;
Gonan ma au mate,
Ulang malungun sasadari.

Sumbayang angkon sumbayang,
Sumbayang di kotu luhur;
Nada tarbaen sumbayang,
Baen hancit ni na malungun.

Magodang aek Sosa,
Nada tarorom so mandurung;
Haru pagodang-godang dosa,
Nada tarorom so malungun.

Ulang au pandurungkon,
Anggo mandurung pahae;
Ulang au parlungunkon,
Anggo maroban nyae.

Ulang au pandurungkon.
Anggo di jae ni alaan;
Ulang au parlungunkon,
Anggo pajongjong hailaan.

Nangkon au pandurungkon,
Saratna ho hupandorangkon;
Nangkon au halungunkon,
Saratna ho hupardondamkon.

Manggolap Lubuk Raya,
Sabun-sabunon na mandurung;
Anggo na langlang di antara,
Gonan digotap na malungun.

Dibasbas hajaran,
Di adian sisunggul-lungun;
Tapadiar tapajalang,
Sanga ise parjolo malungun.

Anso ulang au marjeng,
Ulang marun matok ulu;
Loja marsak marijeng-ijeng,
Manyusa jolma na mangolu.

Tibu ho ro Jasingkoru,

Bayo Angin Bayo Alogo;
Muda giot mambuat boru.
Alap bujing Nasotardago.

Kakak
Ning sada bujing sian pudi,
Mambege na marende i;
Keta le hita maridi,
Aha do na niungutkonmi?

Ditampar andorana,
Songon na sura-suraan;
Maila mangida donganna,
Madung tarida sibunian.

Pancoduhur ho kele,
Anak boru panyisipi;
Ulang dokkon di ale-ale.
Angkanta na dapot di nipi.

Keta ma hita tu aek,
Tu pancur paridian an;
Nangkon be ho sai manaek,
Huoban pe mangkuk parpangiran.

Madung guling mataniari,
Kotu asar do ma on;
Di dalan i ma tahobari,
Taringot tu halulungun on.

Manuat ma da halahi,
Laho tu pancur paridian;
Tarsingot ma ia mangulahi,
Di parsuoan na onian.

Di son ma da hami padumpang,

Dohot bayo bangunan i;
Jabat dope luai sampang,
Songon na joloan i.

Di son do ma papotang ari,
Mangagoagohon sidangolon;
Ampot ro ia saulak nari,
Anso binoto paintehon.

Margiri margonjak-gonjak,
Na manyabun mamalaui;
Jongjong juguk nada jojak,
Lalu marende mangulahi.

Kotek-kotek rangka balian,
Maningkos di arian raya;
Ilu manetek marsaburan,
Ise do na sumalung roha.

Las ni ari on,
Manonga sabun tu Barumun;
Sayang ni siriaon,
Ditinggalkon ho marjeng malungun.

Andigan so halumpang,
Di balik ni sidingding ari;
Andigan so padumpang,
Ganop sirpang huingani.

Joring halumpang,
Simapil-apil Sabungan;
Andigan-do hita padumpang,
Di poken Sidimpuan an.

Sipilit silinjuang,
Jagar-jagar ni na mandurung;

Muda lopus poken Sidimpuan,
Didabu tombom na malungun.

Dung lusut sidumadang ari,
Taringot ma muli tu huta;
Di jarka dipasari-sari,
Rohana dipahata-hata.

Ampot hum iba do na marjeng,
Halak nada barang mahua;
Dipupu na marijeng-ijeng,
Bayo indada ro di dia.

Dompok ia marhobas-hobas,
Tarbege ma sora ni jolma;
Dipainte ma sangombas;
Dipaula jama-jama.

Tarbege tu supingna,
Sora ni halak na marende;
Dipatangkas ma hatana,
Hapengan lidung na pade.

Didok di hata ni endena,
Songon na di toru on;
Hara ni sinadengganna,
Jongjong ia paintehon.

Na denggan odang-odang,
Odang-odang ni na mandurung;
Na denggan tor na godang,
Pangatapan ni na malungun.

Por udan di dolok,
Tubu sijungkat digariang;
Por roha giot dumonok,

Disundati untung bagian,

Ditaba hayun dolok,
Bulungna i lumapat-lapat;
Dung so tola dumonok,
Jongjong hami manatap-natap.

Rupana halak Jasingkoru,
Di siborang maradian;
Laho manuat mijur tu toru,
Tarida bujing na joloan.

Nada ilip nada hoti,
I do bujing na onian;
Ditatap, dipanotnoti,
Nada sala diparnidaan.

Songon na dung dibotosa,
Na ro hita sadari on;
I ma anso dipaintesa,
Di na saandos potang on.

Tibu do halahi nangkin,
Sidung na marpangir maridi;
Dipaintesa do santongkin,
Lopus ro hita ngon pudi.

Ehem ninna laho marbou,
Pajago halak na maridi;
Siborang hami jolo lalu,
Nada be dong halak di puci.

Tarsonggot Na So Tardago,
Matana pe rango-rango;
Diambang halak sipangago,
Mambege sora na lingo-lingo.

Diligi dipatangkas,
Hapengan halak Jasingkoru;
Di si ma roha na humaskas,
Lalu manyambil ke tu duru.

Boti maila boti moga,
Nada diboto be langkana;
Dibaen songon manuk rangga,
Na mameper-meper alona.

Mangkuling halak Jasingkoru,
Muli hamu mapotang ari;
Biasi ke hamu tu duru,
Jago hamu dirait duri.

Lalu didokkon ma hatana.
Songon-songon parsianjangan;
Ampot nada tumbuk tu rohana.
Ulang mambaen hasegoan.

Tanda ni sipandurung,
Bontar-bontar jari-jarina;
Tanda ni siparlungun,
Dao-dao panailina.

Tanda ni sipandurung,
Jumotjot do dapot-dapotan;
Tanda ni siparlungan,
Dipaula na halimponan.

Mangkail sipandurung.
Manyulangat sipandoran;
Tanda ni halak siparlungun,
Manjalahi na so agoan.

Mikim Nasotardago,

Dumaret det ilu ni mata;
Huambang do hamu pangago,
Hape babere ni amanta.

Sibat do da i di tobing,
Ganop mangalangka mangaloting;
Muda mangadang di na gonting,
Dapot sambotik do haruting.

Keta hita maradu muli,
Madung samon ari bo;
Naron ma dipatali-tali,
Lungun na maribo-ibo.

He, he! ning Jagurese,
Dongan ni halak Jasingkoru;
Giot lupa ma simanare,
Na nitongos ni namboru.

Saotik itak gabur-gabur,
Na nilompa diompot-ompot;
Nada marcampur-marbaur,
Hum na saon dope na dapot.

Ois na malo ma hamu,
Ning bujing Nasotardago;
Manggana mandomu-domu,
Pajongjong pancang pago-pago.

Sodong halak na hutandai,
Isé ma na marningot au;
Nada he ho na mamadai,
Mambaen hancit ni rohangku?

Jagit ma danggi tu si,
Tongosan ni inantai;

Nada ho pola hami gabusi,
Tutu do hata ni anggintai,

Situntun ni porda do da i,
Nada anggo gondang lumayang;
Situtu ni roha do da i.
Nada anggo gonjak sianyang.

Tare tangan manjagit,
Ning Nasotardago mangalusi;
Tai ulang sumarita di ringgit,
Na so malo do mamalosi.

Dung sangombas dua ngombas,
Lalu ma donok tu huta;
Di bagas ma naron hutumbas,
Tongos-tongosan ni inanta.

Dung marsirang halahi,
Manyambil halak Jasingkoru;
Topot pareban mangulahi,
Tu bagas ni halak Jakulabu.

Manaek halahi tu bagas,
Tongon di si inang tobangna;
Na baru muli sian gasgas,
Pahiang-hiang hodokna,

Boh ma ro hamu amang doli,
Juguk hamu tu tonga i;
Huompot jolo hupauli,
Indahan na di dapur i.

Madung male hamu aropku,
Na manangkok manuat i;
Tai hamu nada mangoku,
Manyarihon lojangki.

Tutu ma da inang tobang,
Hata na dipardokkonmi;
Di son tongosan ni dainang,
Pareban dongan samargami.

Dilehen ma tongos-tongosan,
Alame dohot sasagun;
Daparuar sian bungkusan.
Bahat doma marturgun-turgun.

Maroih-oih ma ibana,
Mandokkon hata lomo-lomo;
Dibohai ma sudena,
Nada de dipasimo-simo.

Dung dijagit na nitongos,
Didokkon mangan hamu jolo;
Madung lupa au lolos,
Baen alame na margulo.

Butong mangan na male,
Lalu mangidup mangkatai;
Adong modom gumale-gale,
Deba hum juguk mamatai,

Honyaman Jagurese,
Dipaula hodok-hodohan;
Jongjong juguk busa-base,
Songon na dong tinggal ulahan.

Mangarti halak Jakulabu,
Lalu dipio kehe modom,
Tu sopo parate bulu,
Mangombus tulila na nialdom.

Lalu halahi tu ruar,

Dihusipkon ma tu Jakulabu;
Taulahi jolo marikhtiar,
Mangido martandang tu jabu. (bagas)

Tu bujing-bujing naonian,
Na di bagas na godangan;
Mangago-agohon na ngalian,
Dompok di tonga ni jalangan.

Pade ma i sada ina,
Ning bayo angin Jakulabu;
Hudokkon jolo tu ibana,
Na dung ro na so tarlabu,

Kehe ma halak Jakulabu,
Manopotkon bujing-bujing;
Masuk tu bagasan jabu,
Mardingkat gumanjing-ganjing.

O Jakulabu,
Parroha na so tarlabu,
Aha giotmu ro tu jabu,
Dokkon ma tibu-tibu.

Biasi haruar gunting jas,
Di potang na saborngin on;
Lokot jagar-jagar hapias,
Dia on na muba on?

He, he! Aha ma he giot toktohon,
Lain sian panampul tolong;
Aha ma he giot dokkonon,
Di balik ni na mangido tolong.

Adong anggo tolong galoga,
Tai ulang tolong ranggitgit;

Adong anggo tolongan roha,
Tai ulang sumarita di ringgit.

Ro bayongku dua halak,
Ning Jakulabu mangalusi;
I ma bayo na saulak,
Dapot de mangido parmisi?

Giot marsuo manguhahi,
Dohot hamu-na sapedoman;
I ma na hugalas tahi,
Ulang marturnguk di alaman.

Ho da'ntong Jakulabu,
Na so adong do kiro-kiro;
Ganop manguas got manohu,
Bia ma padapot ni ngiro?

Sarihon hami sasaulak,
Tatap do pardangolannami;
Ulang layas roha ni halak,
Dohot tu ama inanami.

Dipaulak ho naron,
Diambang ho momo ni roha;
Ligi ma sidangolon on,
Gok sude nada tarjaha.

Ipe muda na songon i,
Satimbanganmu do ma da;
Muda ditulak pangidoanmi,
Ujungna ro hata ni bada.

Antong muda angkon jagiton,
Bayo na nidokmunu i;
Alap ma tu si tu son,

Anso nialo mangkatai.

Jumolo au mandok hata,
Mauliate tu hamu;
Torang do i diida mata,
Di pudi dokkon hagiotmu.

Hualap jolo halahi,
Pahembang hamu lage juguhan;
Anso tu son pasuo bohi,
Denggan ma dijagahon Tuhan.

Muda ro mambobok soban,
Ujung ni jari-jari botohonmu;
Muda ro mandokkon hobar,
Pasarisari dohonmu.

Pade ni bujing i mangalus,
Laho patamahon juguhan;
Mangarti do halahi bulus,
Baso bayo na saulahan.

Manaek ma bayo tu ginjang,
Marsantabi laho juguk;
Nada be pola angkon dijajang,
Bulus ma kecet songon pongguk.

Hudon do kuwali,
Parau sampan tu Barumun;
Ois hudokkon do luai,
Tangis dondam ni na malungun.

Habang ambaroba hurlang,
Na malapat bayon ade;
Malungun di boru ni tulang,
Mangarosrosi ate-ate,

Salolot arsam do sobanku,
Suhul ni gupak hupadenggan;
Na lolot marsak ma rohangku,
Anggo so dumpang boru enggan.

Juguk mangkail sulum.
Jongjong mangkail simardera-dera;
Muda panombo ni lungun,
Bulung botik mardai mera.

Siholot pisang na mata,
Na nilompa di hudon layang;
Na lolot ma disolong mata,
Baen dongan angkup mangodang.

Muda huida porda bulu,
Di topi kobun partayoman;
Muda huida rohamunu,
Tupa ma pagar partaonan.

Banggua-banggua,
Hodong do ditoktok porda,
Betak salundang abang-abang;
Malua ho malua,
Ho do na nitodo ni roha,
Betak tarbuang do sogot pamatang.

Mangkail tu Siabu,
Dapot sajo ihan lamase;
Tona ni inanta namborumu.
Angkon ho do dongan mate.

Anggo ninna pordangku,
Angkon salundang abang-abang;
Anggo ninna rohangku,
Angkon ho dongan matobang.

La . . lekong golap budi manonga borngin,

Ning Nasotardago,
Manyambut hobar ni Jasingkoru;
Ulang baen dalam hamamago,
Na oto do hami dadaboru.

So siala songon i,
Siala na manobangi;
So jungada songon i,
Mandokkon dia ma luai?

Nada i tarpopo hami,
Sabi na di lobu i;
Nada i tarolo i hami,
Hatana nidokmunu i.

Pusuk ni hotang hotari,
Duangkaranbar sabotohon;
Bisuk ni halak saonnari,
Na malo paoto-otohon.

Ditampul ma sanduduk,
Binoto mumbang do gotana;
Muda dung pahuduk-huduk,
Binoto muba do rohana.

Manuat tu Mompang,
Gumarunteng garigit labu;
Nada i na tarpatompang,
Tu badan simanaremunu.

Ditiptip suling bulu,
Anso adong ombus-ombuson;
Aha tatap jolingtonmunu,
Tompa suada pe lignon.

Durame pe suada,
Na tama baen tutungon;
Di parange pe suada,
Na tama patutongaon.

Mangalus Jasingkoru,
Nada au mungkir di padan;
Na bahat ma huida boru,
Tu ho do tarsora ni badan,

Pangkat jae pangkat julu,
Siborang aek parmaldoan;
Gok di jae gok di julu,
Ho do na lambok pangidoan.

Hodong do na hudungdungkon,
Ulang hodong marpora-pora;
Ho do na huhalungunkon,
Ulang ho marsuada ni roha.

Manuat tu Sitandiang,
Na manangkok laho tu kopi;
Ho do gonti ni dainang,
Baen panyahatan ni tondi.

Diungkap ma salapa,
Dohot jari situmudu;
Nada au manatap tompa,
Tuk ma holong ni rohamunu.

Bargot na marrongkap,
Agaton na marila-ila;
Muda dung tondi sarongkap,
Nada tarbaen na maila.

Sip Nasotardago.

Songon halak na tarkatos;
Mago roha dohot gogo,
Nada'nggo baen na margotos.

Mangkuling Jasingkoru,
Mangido balosan ni hata;
Ulang mago-mago tu duru,
Songon dia do janjinta.

Anggo na sian rohangku,
Muda na tumbuk tu rohamu;
Ampot diambang ho gonjakku,
Tabaen padan sagiotmu.

Mare hita marbulan, (1)
Ulang adong ganggu ni roha;
Songon on ma sada dalan,
Na so tola diuba-uba.

Mangalus Nasotardago,
Hum songon na mubit-ubit;
Maila mandokkon gogo,
Tai tanganna ro manyibit.

Janji sian Jasingkoru;

Saripuyu ayup-ayup,
Na marandor laklak ni tuba;
Mate punu mate mayup,
Sapiri marhata na muba. (2)

Janji sian Nasotardago:

Muda parjolo tu gasgas,
Singgalak bulung ni labu;

- (1) Marbulan: artina sada janji ni naposo-poso na so tola ubaon, sanga ise parjolo mungkir, hona sumpa.
- (2) Madung makorastu i, naposobulung! Ingot pangapudian.

Muda parjolo marbagas,
Singalak mate madabu, (2)

Dung togu janji dipudun,
Dibuat ma parsalipian;
Dipayakkon abit sadun,
Gabe barang parnipian.

Barang ni halak Jasingkoru,
Tintin dohot pangkatirna;
Sada horis na imbaru,
I ma dipayakkon ibana.

Dung marjanji mario-io.
Mandokkon lidung Jasingkoru;
Tano Doli gogo marpio;
Rade ho dohot marsuru?

Ia angkamu au on,
Na dung tomat do sikolana;
Giot hucubo hujajahon,
Sanga tu dia payahanna.

Ning rohangku giot tu Doli,
Mangaligi pandaraman;
Manjalahi harejo na uli,
Na tama baen hangoluan.

Hubege sian jamitana,
Baru dope tu si Gomponi,
Halak na pistar do giotna,
Digaji manjadi krani.

Nada nian sai poran,
Hamiskinan ni amanta;

- (2) Madung makorastu i, naposobulung !
Ingot pangapudian.

Tai sayang ma parsiajaran,
Anggo na tinggal di hutanta.

Muda dapot sada harejo,
Tibu pe ho bulus hualap;
Anggo taringot tu balanjo,
Bahat do horbo mangalaplal.

Di si ma dumpang hasonangan,
Samangkuk sapanginuman;
Bope sapinggan sapanganan,
Jana sahuta sajalangan.

Tarsonggot boru enggan,
Mambege barita ni bayo,
Nada dipikir diagan,
Halak na pistar boti kayo.

Tarsuo na huangan-angan,
Salolot au mangolu;
Paimbarkon tano jalangan,
Tu Doli sanga tu Kuwalu.

Tulus ma au markobayak,
Markancing paun Unggoris;
Biar male boltok manyiak,
Asal marante na marriris.

Anggon Jasingkoru,
Ning bujing Nasotardago;
Dohot ma au na marsuru,
Tai togu baen parjago.

Diungkap juluanna,
Dipaula manampar rongit;
Lalu manyurduhon tanganna,
Di son balanjo sada ringgit.

Nada nian pola suada,
Balanjo di tongan dalam;
Tai tandana na dung sada,
Gonti ni indahan sahopolitan.

Dirintak hosur-hosur,
Dilombang ni Batu na dua;
Muda dibaen na marrosu,
Pat ni siapor dipardua.

Habang ma sileset,
Anakna i martumbur habong;
Muda tulus hamu kehe,
Ihut do mata simanyolong.

Muda tulus Jambur Koling,
Tinggal ma jambur Sigalangan;
Muda tulus na mamuntoling,
Tinggal ma alaman parmanyaman.

Muda tulus na mangkanji,
Dahanon dibagasan eme;
Muda tulus na jalang rari,
Marsipamunan laho kehe.

Rere ho so tardungdungkon,
Sibarebe ni Simangambat;
Kehe ho so tarihutkon.
Dalanannami na so tarambat.

Pisang ni Jalaut,
Na mata mosok mambariba;
Muda dung lanjar tu laut,
Marombun na so niida.

Dobur-dobur ombak ni laut,

Langkitang na sumege-sege;
Dibaen ho lanjar tu laut,
Jamita hupabege-bege.

Manjomur di alaman,
Disonggopi siruma-ruma;
Salolot ho dipardalanan,
Ulang nian bagi mahua.

Mangalus Jasingkoru,
Dung manjagit sada ringgit;
Iluna mabaor tu toru,
Songon aek sian garigit.

Porkis di galunggung,
Pahembang rere di alaman,
Martorkis na malungun,
Dapotan sere na mardalanan.

Haru pe sirao-rao,
Dirambás hodong do lidina;
haru pe padao-dao,
Dihombar modom do tondina.

Siala urdung dolok,
So siala urdung balian;
Muda denggan untungta sogot,
Tu tano Doli do jalangan.

Mangkuling Nasotardago,
Laho paundukkon uluna;
Tai nada sadia gogo,
Mandok satumbuk tu rohana.

Tali do na togu,
Pangihot ni tali tadoan;

Tahi do na togu,
Ulang hita marsiagoan.

Sijungkat di robaen,
Ampapaga di na hornop;
Sungkot suada jamaon,
Baga-baga do na honok.

Porkis ni Sigalangan,
marasar di tonga ni saba;
Muda torkis na mardalanan,
Di pudi pe huupa-upa,

Huupa ho huupa au,
Anso rap torkis mandingin;
Pir tondimu ingot au,
Arian bo tonga borngin.

Olo da upa ni tondi,
Hutiop pe janjinta i;
Ulang nian muba markoti,
Tulus na di rohanta i.

Mangkuling pukul tolu,
Na mangedet marungut-ungut;
Mulak ma hami ke pahulu,
Torkis hamu sude lagut.

Dung dapot ari habubuat,
Sanga andigan na pade;
Nada be au ro manuat,
Sidung di son ma sasude.

Muda dung mardalan au,
Hudokkon pe tu Jakulabu;
Palaluhon kirim solomku,
Sudena tu hamu sajabu.

Muda tarbege ma di ho,
Na dung langka simanare;
Kehe ho marlaho-laho,
Jakulabu sungkun sise,

Muda dung dapot jamita,
Tolong doahon ma tu Tuhan;
Tibu dumpang hangoluanta,
Di tano sihadaoan.

Antong horas ma da na tinggal,
Torkis au di pardalanan;
Nada be au mebat munggal,
Ingot ma ho di parpadanan.

Mulak ma halahi sude,
Kehe tu sopo podoman;
Mondok-ondok munde-unde,
Mamolus di tonga ni dalan.

Dipapayak ma pamatang,
Taru sinok nada manggulot;
Mamuntong songon sada batang,
Nada ngalian matudotdot.

Dung torang sidumadangari,
Ro na manyunggul na modom;
Angke ma hatorangan ari,
Halak runkar maridom-idom.

Kehe ma hamu tu aek,
Na dung ginjang ma bo ari;
Tibu hamu naron manaek,
Ulang be lalat mangkobari.

Mulak na sian tapian,

Kehe ma mangan tu bagas;
Didok ma di parhalilian.
Songon ende-ende ni unggas.

Lolot do ma inang tobang,
Anso ro au tu son;
Kehe jolo tu siborang,
Mambuung untung bagian on.

Dipaondok sidohonon,
Mangido izin do ma ia;
Mulak do ma na niporluhon,
Manahihon tu inangnia.

Dung lalu halahi tu huta,
Didok ma tu ama inana;
Palagut ma sude koumta,
Anso hudokkon maksudna.

Dibaen au giot langka,
Manjalahi pandaraman;
Tu Doli sanga tu Malaka,
Paimbar tonga ni alaman.

Ligi hamu ari na denggan,
Na tama langkahanonkon;
Ulang be marancogot ni andigan,
Ulang janggal pardalanankon.

Dapot ma di hatihana,
Pardalanan ni Jasingkoru;
Nada be diambat inangna,
Denggan do ma kehe disuru.

Di sogot ni sada ari,
Kehe ma langka Jasingkoru

Dohot dongan suat ni ari,
Dongan marsiajar saguru.

Di hatiha dompak i,
Jalan tu Doli Padang Bolak;
Dalan na manangkok manungki,
Jarang jaro dibolus halak.

Marudan marlas ni ari,
Marombun di tonga ni dalan;
Mamolus padang dohot ri,
Di golap bo di torang bulan.

Mamolus dalan na nirambas,
Parbornginan pe ranggo-ranggo;
Manombo dapot masuk bagas,
Tarkadang dibusbus alogo.

Diligi indege ni babiat,
Gamang iba humonci-honci;
Dalan pe manangkok manuat,
Songon bahal-bahal ni monci.

Salpu padang ro harangan,
Margonti dohot rodang-rodang;
Jotjot mamolus tariparan,
Siborang di aek na godang.

Boti limatok maturamang,
Lintu taru mangguloti;
Di si ma ate-ate gamang,
Dohot pat pe mangurdoti.

Boti rongit matungenggeng,
Mangaraori mata modom;
Sora ni babiat do pe ngung-ngeng,

Singit-singit do ma so pidom.

Dapot ma aek na godang,
Habaoran ni Batang Pane;
Ro ma parau na godang,
Mangalayarkan laho pahae.

Buaya pahahe-pahulu.
Manjalahi panganonna;
Taru manyogar do imbulu,
Hum paida-ida bahatna.

Oih humitir iba panyogiton,
Pasari-sari pardalanan;
Tama tupa mantong ingoton,
Dalan tu Doli na hinanan.

Panganon pe nada martontu,
Salolot di pardalanan;
Omping sasagun ganop kotu,
Mamolus dibagasan tolonan.

Tarsung pe dapotan indahan,
madung dibaur dohot jegang;
Adong ma nian gule ihan,
Tai hum na nibolgang-bolgang.

Nada adong na so marnyiang,
Salolot di dalan i;
Abit pe nada marnahiang,
Di na satonga bulan i.

Lalu tu ranto Parapat,
Pahae tu Labuan Bilik;
Humolang ma mardalan pat,
Malum ma pat na mangkaliklik.

Sian i ma tu Asahan,
Manompang di parau layar;
Panganon pe dapot ma indahan.
Iba pe nada be mabiar.

Dungi lalu tu Asahan,
Anso humosa sasaotik;
maradian marondohan,
Songon kudo na so margitik.

Di si ma paintehon kopal,
Na laho kehe tu Belawan,
Dalan tandang marepal-epal,
Laut ma na nangkan layaran.

Adong do dua tolu ari,
Na paintehon kopal api;
Adong na gamang mamikiri,
Bahat dongan tarnipi-nipi.

Mabiar mabuk di tonga laut,
Dalan na so unjung ditampu;
Betak ro ombak na jorbut,
Untung ni badan na magopu.

Na so niambang-ambang,
Tarbege sora ni "fluit;"
Ro ma kopal songon na habang,
Na poso pe gumait-gait.

Dung marlabu kopal api,
Adong ma na manaek mijur;
Kehe tu darat minum kopi,
Angke madung manyapot ijur.

Kopal marlabu di labuan,

Dung torang ari pe so langka;
Marlayar kehe tu Belawan,
Mamolus laut Selat Malaka.

Marlayar halahi sude,
Manompang tu kopal Brouwer;
Dipukul diombuskon bade,
Taru mandohuk matuperper.

Aluan manuju tu Belawan,
Siborang di Selat Malaka;
Ombak marbalun dialuan,
Marsingki soluk manyaraka.

Opat ari opat borngin,
Na nirege ni ombak i;
Horas do nian tondi madingin,
Lopus marlabu halahi.

Lalu ma kopal tu Belawan.
Marlabu ma tu "boom" na ginjang;
Haruar halak marmijuran,
Mangamburi songon hijang (hije).

Torus ma kehe tu tangsiun, (station)
Paintehon kareta api;
Na marpoko marpulu milliun,
Parsambungan ni kopal api.

Kereta api ro dobos,
Tu tangsiun maradian;
Mangeruk-ngeruk matubosbos,
Songon sora ni urang bunian.

Manaek tu kareta api,
Marsipatama juguhanna;

Adong deba manyipi-nyipi;
Baen hurang parbinotoanna.

Salaku na lobi ribut,
Nada tontu marbanjaran;
Marsirintak marsirobut,
Songon siri-siri di panjomuran.

Mangkuling lonceng tolu,
Kareta api pe mardalan;
Maroban dongan na dua tolu,
Nada adong na hatinggalan.

Ro ma kondektur marsapa,
Laho tudia topotanna;
Jojor sudena nada lupa.
Dohot mangguntingi karcisna.

Marlojong ma kareta api,
Salaku na lobi hipas;
Sude tangsiun diganopi,
Paijur muatan melpas-elpas.

Lalu tu ''station'' Medan,
Tu huta sitopotonna;
Nada pola be marege badan,
Sonang do halahi sudena.

Kehe ma tu bagas topotan,
Marborngin dua tolu ari;
Pamalum pat na marngalutan,
Sanga na nirait ni duri.

Dietong parlolotna,
Dua pulu lima ari halahi di dalan;
Songon i ma baritana,

Di tempo na hurang sabulan.

Nada songon saonnari,
Donok do ma dalam tu Doli;
Lalu ma dua tolu ari,
Nada marege holi-holi.

Mulai buat sian huta,
Nada be marloja pat;
Mari-arina bahat arta,
Satongkin i do ma dilumpat.

Madung denggan dalam boluson,
Nada adong be na martalko;
Motor na godang sanga Hudson,
Salamat nada martilako.

Sudena dalam ma denggan,
Dipahornop *Locale werken*;
Nada adong na mangkatorgan,
Sonang sude dohot parpoken.

Mulai sian Sidimpuan,
Lalu tu pasisir timur;
Nada adong be habiaran,
Madung denggan sude purpur.

Dohur-dohur motor Gomponi,
Dohot motor ni pareman;
Tu si ma halak manompangi,
Nada adong be parmaraan.

Di son saotik tasolotkon,
Barita ni dalam Sibolga;
Na so tola dihalupahon;
Na pamajuhon boniaga,

I ma dalan na songon ulok,
Manangkok lalu tu Bonan dolok;
Mangulilit mangeldok-eldok,
Mangurereng di dolok-dolok.

Dalan na so mukin di akal,
Dapot tarpatupa halak;
Angke mulai sian pangkal,
Tobing martano batu mamak.

Tai baen sobar ni roha,
Puraga do tuan Bergamin; (1)
Mambungkar manga'oha-loha,
Lopus denggan sude dijamin.

Haru bahat hepeng haruar,
Nada be pola nisosalan;
Di pudi dapot do digarar,
Sian hepeng belasting dalan.

Tai godang tarimo kasi,
Diucapkon tu ibana;
Sonang sude na komisi,
Baen denggan ni harejona.

Sian dalan na denggan i,
Sonang mantap tu Sibolga;
Dohot tu Labuan Tapanuli,
Inangan ni kopal ni singga.

Taringot tu huta Sibolga,
Huta sabungan ni Tapanuli;
Parluhutan ni boniaga,
Na parohon untung na uli.

- (1) Tuan Bergamin i ma goar ni Opzichter na mambaen dalan i.

Salpu na manangkok manuat,
Dapot ma dalan na datar;
Manjojori sudena luat,
Lalu tu tano Siantar.

Nada adong be na mabiar,
Sonang do ma dilala halak;
Momo ma hepeng diparuar,
Laho kehe dohot na mulak.

Taringot tu parbornginan,
Madung jojo paradanaan;
Salolot di pardalanan,
Denggan sude bagas inganan,

Tuk sudena sipanganon,
Sanga na aha giotniba;
Bope manobusi dahanon,
Momo do ma di tano Toba.

Dung lalu tu Siantar,
Madung inte kareta api;
Mamolu di dalan na datar,
Sudena luat diganopi.

Lalu ma sadari i,
Sanga tu dia giotniba;
Nada adong na mangambati,
Madung dao joman maruba.

Nada be songon na jolo,
Susa ni halak na tu Doli;
Muda iba na hurang malo,
Jerkot ma i dibobok tali.

Angke polisi sulang sali,

Manjagohon halak na rari;
Muda so dong pas Tapanuli,
Torus ma i bulus digari.

Nada songon saonnari,
Halak na ke tu tano Doli;
Songon topot ama sandiri,
Purpur do mata manaili.

Res pahae res pahulu,
Manjalahi harejona;
Muda marun matok ulu,
Madung adong patut ubatna,

Bia ma hatiha na jolo,
Na nitandaan pe suada;
Muda iba na hurang malo,
Sude dongan alo marbada.

Halak na haloat marlidung,
Mangkobar pe saro Malayu;
Adong songon akal ni dung-dung,
Mamolus laho mamuyu.

Anggo na hurang-hurang api,
Ulang iba giot tu Doli;
Gonan ma i ba ke tu kopi,
Mangarege holi-holi.

Sai ma jolo caritona,
Santuhu tu na tu Doli;
Tapaujung jolo baritana,
Untung ni bayo doli-doli.

Ia halak Jasingkoru,
Na tinggal di tano Doli;

Dipio ma dongan jara-juru,
Bulus harejo diakali.

Kehe tu kantor na sada,
Asa tu kantor na asing;
Tu parkarejoan ni Bolanda,
Sanga tu bangso na asing.

Digasak pahae-pahulu,
Marsude ringgit dohot suku;
Laing so dumpang dope lalu,
Harejo na manjama buku.

Sude mahepeng balanjona,
Tinggal hum ringgit sada nari;
Na nilehon ni tu tunanganna,
I ma giot ditukari.

Tai nada sampe rohania,
Lalu kehe tu toru hayu;
Marsitogol ma da ia,
Asa tangis margaya-guyu.

Nada i na so salongon,
Bulung botik di roba-roba;
Nada i na so taonon,
Muda pangarjeng ni roha.

Ummolat simartulan,
Sian dangka ni simartolu;
Ummolat bayo paruntungan,
Sian dongan na dua tolu.

Matondik na maridi,
Di pancur ni huta Sipirok;
Madabu holso di tondi,
Badan na so tarpaingot,

Dipalu gordang sambilan,
Matapor ogung ni Singali;
Diroha giot tu ginjang,
Disundati dapot ni ari.

Tanda ni sanggar padang,
Mate sajo so nirapuan;
Tanda baya ni anak dagang,
Mate sajo so niandungan.

Anggo porda na nigete,
Hurabot tinggal di salean;
Anggo roha na nigete,
Nada marimbar hamatean.

Magodang aek godang,
Tu dia pandan mambuung durina;
Magodang aek parkatimbangan,
Tu dia badan mambuung dirina.

Harambir ni Singkuang,
Sada bangkar tolu dagulan;
Hatiha ni badan tarbuang,
Simanjojok marontang jalan.

Mate matombom goring-goring,
Mandera na mamarat-marat;
Mate matombom tano Doli,
Habuangan ni dagang malarat.

Aek ni na bundong,
Na marbinanga tu gariang;
Pamalik baya ni na butong,
Uba ma he so rap marnyang.

Sipuntung di rodang,

Siroken manopi-nopi;
Untung baya maradu godang,
Halak tu poken iba manopi.

Loja ia na marende,
Nada adong na manggorasa;
Modom ia tardede-dede,
Ibo ma roha mangidasa.

Dihatiha songon i,
Mamolus sada "*Controleur*,"
I ma wakil ni gomponi,
Paidahon dalan na tiur.

Tarpaidasa ma bayo na modom,
Lambok lute gumale-gale;
Diambang halak na dung pidom,
Hape na manguas male.

Ning roha ni Konteler i,
Bayo i kuli kontrak;
Sian harejo ia lari;
Ampot na hona labarak,

Maradian tuan i,
Marngoti bayo na sinok;
Biasi di son ho martabuni,
Ninna marmonok-monok.

Ngot bayo lalu mangambur;
Mamasang kudo-kudo langka tigo;
Mangalumpat lalu manyombur,
Jongjong patoguhon parjago.

Diucapkon guru-guruan,
Martahan di tonga ni baris;

Baen golap ni parnidaan,
Bulus disintak ma da horis.

Bismillah
Laklak ni pajar pijor,
Na singgalak marpora-pora;
Anggo na jongjong di tigor,
Batu mamak diandora.

Maradian tuan "*Controleur*,"
Mabiar di ujung ni horis;
Mangalangka ia mundur,
Hodokna pe madung maniris.

Dipainte ma sangombas,
Bayo na habo-haboon;
Songon i do ma dibaen tabas,
Ubat ni na biraraon.

Dung tarhalak Jasingkoru,
Dioban rondo ma langkana;
Manaili tu topi duru,
Hape ulando di jolona.

Ditabi do ma tuan i,
Dohot pantunna ditopotkon;
Madung sala tu Gomponi,
Mangido maaf ma didokkon.

Huambang do nangkin pangago,
Nagiot ro mambinasohon;
I ma so ruar langka tigo,
Horis pe giot huoloskon.

Mangkuling tuan i,
Marsapa tu bayo na ngot;

Biasi di son ho martabuni,
I do na giot hupaingot.

Sian kobun dia do ho lari,
Baen na modom ho di son;
Songon on ma las ni ari,
Boti dope porkis-porkison.

Mangalus Jasingkoru,
Manorangkon tu tuan i;
Nada au na lari hona buru,
Tai rayat ni Gomponi.

Di son do bo adong suratku,
Dohot pas laho tu Doli;
Manjalajahi harejongku,
Nada au kontrak kuli.

Baen na modom badan on,
Na loja ma i sirorongan;
Madung sude bohal dahanon,
I ma so modom di harangan.

Humoteng-hoteng tuan i,
Marnida surat hatorangan;
Asok ma ia disungkuni,
Anso ulang alang-alangan.

Diligi suratan ni bayo,
Songon na nijama ni begu;
Mereng pade jong-jong pe iyo,
Denggan sajo martogu-togu.

Dung diida songon i,
Ibo roha ni tuan i;
Ra do ho jadi krani,
Baen siangkup ni Gomponi.

Dilehen pe di ho balanjo,
Sabulan tolupulu rupia;
Ulang gonan ho marjo-arjo,
Mampal tu dia tu dia.

Muda pade do harejomu,
Bahat dope untung na asing;
Ambaen tamba ni gajimu,
Sere omas sigumorsing.

I ma da Jasingkoru,
Pade ihutkon ma da hami;
Banua on negeri baru,
Payahan ni sinaloanmi.

Mayomba Jasingkoru,
Manjagit holong ni roha;
Uluna dipaunduk tu toru,
Terima kasih yang maha mulia.

Antong manaek ho tu son,
Anso rap hita marbendi;
Ulang ingani be di son,
Ulang ro mali ni tondi.

Manaek Jasingkoru,
Juguk di ambirang ni tuan;
Dipake ma pakean baru,
Denggan do ma di parnidaan.

Lalu ma tu huta Doli,
Di si ma kantor ni Gomponi;
Mijur anak ni na mauli,
Manjagit harejo karani.

Dung dijagit karejona,
Disuru mulak ma ibana,
Pature bagas inganna,
Dohot sude pinggan mangkukna.

Ancogot ma hita mulai,
Manjama harejo ni Gomponi;
Asok-asok alai-alai,
Ulang be ho margani-gani.

Dung torang sidumadang ari,
Dijama ma harejo i;
Jumolo ia diajari,
Patorangkon sibaenon i.

Mupir-upir do ma tuan,
Paida-ida panjama;
Saotik pe so marhasalaan,
Sonang do ma di rohania.

Songon i ma da tama dokkonon,
Panjama ni Jasingkoru;
Nada adong di sia baenon,
Na hum mago-mago tu duru.

Di hatiha na dung salpu,
Taun saribu sambilan ratus tolu;
Musohor Doli tano na napu,
Tarbuka kobun marpulu-pulu.

Ringgit ni halak Unggoris,
I do na laku dompahi;
Bo Ulando sanga Paris,
I do dipake halahi.

Hepeng hupang dohot duit,

Dorang-dorang do ma di si;
Saotik pe harejo digoit,
Madung gok saku marisi.

Ia halak Jasingkoru,
Mandurung ma ia di si;
Dapot di tonga bo di duru,
Nada adong na mangaskasi.

Dibaen songon akal ni Jailanduk,
Lagak Daret gurindam Barus;
Pohom do ia munduk-unduk,
Na menek na godang pe dihorus.

Sipak kanan sipak kiri,
Sude tama do mangonai;
Nada adong na manyihiri,
Sanga na ro manangi-nangi.

Sude do halak songon i,
Anggo di joman kutiko i;
Nada disihiri Gomponi,
Asal malo ma marsibuni.

Ia Jasingkoru ondi,
Dapotan ma ia disi;
Hepeng madung marpundi-pundi,
Pakean gok poti marisi.

Taringot tu haramean,
Na masa di tano Doli;
Cukup ma di parnidaan,
Lobi-lobi di doli-doli.

Muda hatiha andospotang,
Rungkar ma na dua tolu;

Parintak-rintakkon pematang,
Kehe tu jae tu julu.

Dohur-dohur sora ni bendi,
Mareosan na mamolus;
Di kota Medan Paris Indi,
Songon ane-ane na bubus,

Diligi gaya dohot eong,
Lenggang ni koum boru Jawa;
Mata madabu meong-eong,
Songon na manotnoti dewa.

Lontik ni potongan Bandung,
Sambut tu lasam kain batik;
I ma mangarait mandungdung,
Tu ate-ate sasaotik.

Payung surto na marbunga,
Sambut tu potongan kebaya;
Anggo na so marroha dua satonga,
Lalu ma malantuk magaya.

I ma anso bahat tarkobar,
Halak na hurang-kurang iman;
Bahat na hona begu abar,
Marobur tu toru tanoman.

Lilian lolosan Jasingkoru,
Mangida gerbang ni kobayak;
Jotjot ia giot kaliru,
Giot tu si ma diparayak.

Untung do da ia tarsingot,
Tu bujing Nasotardago;
I ma dalanna nada bongot,
Kehe tu dalam hamamago.

Di son dope ia tarsunggul,
Di padan janji na togu;
Lilian di perper ni sanggul,
Lolos patangi-tangi logu.

Ditampar andorana,
Mardabu holso tu bagian;
Manyosali parrohaonna,
Lupa di padan parjanjian.

Sadia ambasang sigombus,
Na busuk dipangan burbur;
Sadia pe sanggul na limus,
Nada i angkup dongan marobur.

Haru marurus unte tonggi,
Na niombuskon ni alogo;
Haru pe sisambilan jogi,
Nada songon Nasotardago.

Songon i ma di rohana,
Pasari-sari na dung lau;
Dietong mardosa ma ibana,
Tu dongan na dua tolu.

Dibuat harotes dohot tinta,
Mambaen surat tu amana;
Mandokkon laho marjamita,
Na dung dumpang hangoluanna.

Dipabajan dipatupa,
Taringot tu dalan-dalanna;
Umpe saotik ia lupa,
Sian pangkal rasa ujungna.

Madung dapot hagioku,
Gabe pangula ni Gomponi;

Torkis sonang do pingkiranku,
Nada au margani-gani.

Tolong ma doahon hamu,
Anso torkis sayur matua;
Tu pudion do ma mardomu,
Asal ulang barang mahua.

Sidung surat tu amana,
Dibaen muse tu tunanganna;
Tu Jagurese adresna,
Palaluhon tu ibana.

Sada surat tu Jagurese,
Palaluhon tu Nasotardago;
Nada tola halak manyise,
So ulang tubu hamamago.

Surat na tu Nasotardago,
Di toru on ma tapabanjar,
Ulang au nian didorgo,
Ato disincal sipangajar.

Ia bo alogo simarangin-angin, paihut patompang do ma jolo lungun na manostosi on tu halak angginta boru enggan Nasotardago. Sombahon tu nasida, salaho markuhuasi mandokkon lidung :

Anggi layang-layang hadungdung,
Lumba-lumba ni podang;
Ayam-ayam ubat lungun,
Lumba-lumba ni badan magodang.

Hutostos suhat sada,
Obanon tu Siborong-borong;
Ois hutongos surat sada,
Gonti ni tangan jawet solom.

Tanggingkon so hutoskon,
Tali dondam tu Barumun;
Tangihon baya so hudokkon,
Tangis dondam ni na malungun.

Dung do hita arirang,
Jolo sitanggis podom-podom;
Dung do hita na sirang,
Jolo tangis anso modom.

Landitna do porkotna,
Na dung rimbur gabe romunan.
Na dung dongdong gabe siala;
Hancit na do ngotngotna,
Na dung ribur gabe lungunan,
Na dung adong gabe suada.

Satarak satapolan,
Lobi-lobi ni ampang jual;
Marsarak baia rongkon dongan,
Lobi-lobi ni paruntungan.

Salak do saluli,
Salak ni huta imbaru;
Sudena halak marsauli,
Dibaen sajo holso madabu.

Jarunjung obur-obur,
Pasak sanggul ni simanjung;
Anggo na so mate marobur
Nada tarantak na malungun.

Tor dolok gongonan,
Jaena i Sihadabuan;
Ulang ho jabat ngolngolan,
Painte panggorak ni Tuhan.

Mago-mago bulan,
Ulang mago mataniari;
Mago-mago sabulan,
Ulang mago pangarohai.

Aek ni Sigiring-giring,
Batu na bontar do horsikna;
Ulang ho tarkirim-kirim,
Painte dapot hatihana.

Amporik ni saba kopi,
Na markulkulan maroncitan;
Nada be songon narobi,
Ganop juguk marsigoitan.

Nadai lulunan doran,
Jongjong jauran di tobing;
Nada i luluan roha,
Laing tong do i songon narobi.

Harambir na masak layu,
Na madabu tu ogar-ogar;
Haru tu Batak tu Malayu,
Angkon ho dongan sagoar.

Anggi na jop basa,
Upa ni tondi ni badan;
Ulang ho ra diarsak susa,
Huingot do hata ni padan.

Madung dapot lomo ni roha,
pandaraman na pade;
Ulang be da pajaha-jaha,
Hupasingkop pe sude.

Pasonang ma rohamu,

Ulang be marsak sasadari;
Dokkon aha hagiotu,
Huban di pudi ni ari.

Adong do sialo-aloon,
Ubat lungun na tumatangis;
Tintin sanga parabiton,
Ato kotuk paun Unggoris.

Baju batis na nibordur,
Sanga sutora cita galas;
Dohot salendang na nitabur,
Undung-undung di ari las.

Dongan sapaasang sasetelan,
Huboli kain Samarinda;
Pakean di rondang ni bulan,
Angkup ni baju na marrenda,

Sutora awan-berawan,
Pasang ni salendang gulo-gulo;
Adong ma anggi huoban,
Pasang ni batik kain Solo.

Kain palikat Batu Bara,
Pasang ni kapalo nago;
Kancingna potong Singapura,
Tama tu Nasotardago,

Antong pasonang ma pasonang,
Ulang be ho diarjeng marsak;
Muda dompak maronang-onang,
Ingot indahan na so masak.

Sambut salungi bo anggi,
Lungun ni bayo angin on;

Umma laho paligi-ligi,
Gambar na hutongoskon on.

Asap-asap ni portibi,
Manggolap tu Padang Baruas;
Tontang ulang ligi,
Pangkulingkon ulang luas.

Kirim solom sarobeta,
Kirim salom marpio beta;
Ulang be mago sian mata,
Halilianmu laho martata.

Sirpang dalan tu Malea,
Sambirang dalan tu Malinu;
Siamun marpio beta,
Ambirang mangapus ilu.

Ditutup ma da surat,
Dimasukkon tu sarungna;
Ditongos ma tu Barat,
Tu Jagurese adresna.

Songon i ma da dongan,
Hobar ni surat tongosan;
Didok sude huta inganan,
Sareto mangido balosan.

Ia boti na mamasa,
Tapasirpang jolo mangulahi;
Sanga aha do na masa,
Dung marsirang halahi.

Taringot tu Nasotardago,
Tarsunggul mangulahi jolo;
Anso ulang gabe mago,
Barita sian mulo-mulo.

Dung do halahi marsirang,
Nada tontu harejona;
Pamatang numma songon rangrang.
Patunda ni sinalungunna.

Ia lungun ni bujing-bujing,
Taradop tu doli-doli;
Nada dapot diparkujajing,
Mangantor do tu holi-holi.

Lupa mangan dohot maridi,
Suang na marnyae pasang;
Inda sumo ia mardandi,
Juguk tondo martungkol isang.

Ama ina nada diingot,
Dohot porlak parsanggulan;
Lungun do manyiak marngotngot,
Lumobi di torang ni bulan.

Sai dan ma sai lolot,
Jarang jaro do ia ruar;
Muda tarsung ia manggulot,
Laing tong ma na siar-siar.

Dapot di sada hatiha,
Manjomur ia di alaman;
Nada binoto sanga aha,
Dipatalak bilik podoman.

Dompok di na manjago jomur,
Dipupu na maronang-onang;
Tarsingot ma ia tu timur,
Jomur nada haru dironang.

Oih onang, onang, onang,

Mago tu dia ma innon;
Angkanta bayo angin i.
Ubat ni halalungun i.

Hudokkon hian do . di ho,
Paihut patompang badan on;
Tu luat ni tano Doli i,
Tu pancadian ni halalungun i.

Onang, onang, onang,
Onang onang onang da baya;
Onang onang onang Jakorda,
Na tama ubat ni roha.

Mangkuling inangna sian ginjang,
Laho mangosikkon manuk;
Na poran ma da ho inang,
Lobas ho hum mungut-ungut.

Ligi ma ma sude jomur,
Disosop manuk poncoduhur.
Haliang do ma marsabur-sabur,
Dihaiskon laho mangambur.

Na poran ma da ho kele,
Unjung do hami bujing-bujing;
Diingot do boltok na male,
Nada jabat hami mangging.

Maila ma Nasotardago,
Lalu kehe modoim mamusur;
Haru pe diombus alogo,
Mungkup modom di ginjang hasur.

Goring-goring matombuk,
Parasaran ni ambaroba;

Haru dianyang diorbuk,
Di son ma na pasada roha.

Madung guling mataniari,
Laing mamuntang dope ia;
Inangna do ma mangorai,
Jomur na nirerakkonna.

Anggo inangna madung muruk,
Marnida lagang ni bujingi;
Tai mabiar ia oruk,
Dipaidarsa songon i.

Didaek jomur dipasimpan,
Lalu kehe sumbayang luhur;
Ditungkir tu jandela papan,
Juguk boruna marsipurpur.

Na so niambang-ambang,
Tarpaida Jagurese;
Manangkok ia sian lombang,
Songon na mopop manguncese.

Aha na masa na muba,
Ro halak Huta Balian;
Adong ke na tumopot iba,
Anso diligi parapian.

I do na somal ro tu son,
Dongan ni halak Jasingkoru;
Tontu adong porlu uruson,
Taringot tu hata ni boru.

Ditatap dipaligi-ligi,
Mamolus tu bagas na godang;
Adong ke jamita na tonggi,

Silua na nihadang-kadang.

Hum maralimos Jagurese,
Tarsonggot ma Nasotardago;
Iluna pe maruse-use,
Sorana pe gogo-gogo.

Nandigan do ho ro,
Aha do na nitopotmu?
Ditompuhi mardamoro,
Dia do hobar jamitamu?

Biasi lolot ho anso ro,
Tumopot simanarenami;
Taru so adong be kiro-kiro,
Manyaboi lungunnam.

Mangalus halak Jagurese,
Manghayo-hayo uluna;
Dijamitahon ma muse,
Potpot duru ni haumana.

Salang on ma bo baya,
Baen perluna do indon;
Hum sada au do markaya,
Manjalahi lompakon ni hudon.

Tai ro surat ni dongan,
Sian tano pangarantoan;
Paboahon huta inganan,
Dohot na dumpang pangomoan.

Lalu manyurduhon surat,
Tu tangan ni Nasotardago;
Dompok di na kecet rarat,
Dibuka ma jago-jago.

Ditarik ma surat tu ruar,
Mangihut ma sangkibung gambar;
Dibaluk dohot surat kobar,
Diholting dohot bonang kasar.

Diungkap ma asok-asok,
Songon na hoji tikam dadu;
Tarida ma bohi ni siuncok,
Disirik dipatudu-tudu.

Lokot segar koto godang,
Di ulu ni halak Jasingkoru,
Bajuna sian lakan gudang,
Sisamping bugis sian toru.

Saraor pintolun na bontar,
Sipatu potongan Bolanda;
Dipajongjong dipasandar,
Songon Rajo Datuk Baginda.

Raja nan asal usalli,
Tuanku Laras Kota Gadang;
Songon i ma tongam ni sidoli,
Mikim ia songon na songgang.

Malum nyae sombu lungun,
So didaoni dohot ubat;
Diulahi dipasusun.
Laho manyapai hata ni surat.

Aha do barita,
Na dibagasan surat i;
Adong do moga ni rohanta,
Na nipararingnia i?

Ho ma da Jagurese,

Manyise surat na tu au;
Nada tarbaen au manise,
Nada dison sormin matangku.

Tai sise sapetona,
Ulang baen gaham-gaham;
Huboto do naron salana,
Muda sala titik santiham (santulduk).

Mikim Jagurese,
Lalu pahirbangkon surat;
Gogo-gogo ma da disise,
Anso masuk tu urat-urat.

Disise dilogu-loguhon,
Songon na nambaco syair;
Suang na dibulu-buluhon,
Sorana dipagair-gair.

Manombo mangunduk manggeleng,
Tangauna main manampari;
Na mambege pe ma meleng-eleng
Mur harkar lungun mamikiri,

Disi ibo lungun ni roha,
Panotorkon ni Jagurese;
Sip do ma manjaha-jaha,
Manangihon surat na nisise.

Matondo ma Nasotardago,
Manangihon hata ni surat;
Songon na nipaago-ago,
Roha tu Doli madung rarat.

Jop ni roha inda boti,
Mambege jamita hangoluan;

Dapot ringgit isi ni poti,
Boti marpangkat hatuanan.

Dung sidung surat disise.
Ditampar tot ni Jagurese,
Dibuat kopi dipause,
Rap juguk gumarse-garse.

Mauliate da di ho,
Jagurese haholongan;
Mangidup ho di son timbako,
Painte ro marpio mangan.

Mangalus Jagurese,
Songon na holos-holosan;
Muda sonang hamu muse,
Au tinggal male nguasan.

Hum landit na ma di pahu,
Tinggal godol malua dungdung;
Hum hancitna ma di au,
Halak sonang mauli bulung.

Sungkon Ama ni Mogol,
Na palanja-lanja parira;
Iba loja mogol-ogol,
Halak do umboto daina.

Ulang songon i anggi,
Ning bujing Nasotardago;
Muda dumpang aek ma tonggi,
Nada lupa au di gogo.

Diboto ho do parrohangku,
Dung hita marsitandaan;
Sanga ise na giot topot au,
Angkon marsipadaan.

Husarihon do lojamu,
Ulang ho jabat mandele;
Dipudi pili hagiotsmu,
Tanda ni dongan ale-ale.

Sannari hupangido,
Tabalos jolo surat on;
Manyungkun songon na mandodo,
Andigan ro ia tu son.

Ho ma da anggi manyurat,
Au mandokkoni hatana;
Anso tumibu tapabuat,
Kehe tumopotkon ibana.

Tama angkang na lan bohi,
Ning Jagurese manguduti;
Disirup kopi mangulahi,
Dongkon mangkang so husurati.

Tangihon hamu bo pamasa,
Hata ni surat tongosanna;
Jumolo hita umbegesa,
Sian bayo sitopotonna.

Ia bo suhat boyoman,
Talpokkon simardingin-dingin;
Ia bo surat tongosan,
Langka bo ho tumopot bayo angin.

Ois tanggingkon su hutostos,
Tali panambat layang-layang;
Tangihon so hudokkon,
Tangis ni na marjeng-marnyiang.

Handis ni Barumun,

Sirohot ni banua tonga;
Baen bancit ni na malungun,
Surat on pabolkas tona.

Huik-kuik halihi,
Manguak jantung di balobo;
Martona au di halihi,
Sai dipabolkas alogo.

Maburkat balik-balik angin,
Di rura dia ma luai;
Marlidung sibayo angin,
Di huta dia ma luai.

Ciok-ciok anak ni onggang,
Dijae julu ni parbostangan;
Pio-pio so bolkas tona,
Hiap-hiap marloja tangan.

Gari pordangku taparporda;
Sarisir lambak ni pisang;
Gari rohangku taparroha.
Satapak so jadi sirang.

Porkon siang da udan,
Mayup ho pangintean;
Soban au soban,
Obanon tu Batu na dua;

Hudokkon hian do di ho,
Dipainte badan magodang
Anso oban au oban,
Anso rap-rap hita na dua.

Harangan ni Sigalangan,
Bahat tubuan podom-podom;

Salolot ho di pardalanan,
Mata pe so haru tarpodom.

Landit ni na mandurung,
Gari tamboung abang-abang;
Baen hancit ni na malungun,
Gari mahabong numma habang.

Laing di hodong do pordanguku,
Goring-goring mali-mali;
Laing di ho do da rohangku,
Sasaborngin sasadari.

Gari tarbaen songon batu,
Manangkok tu adian batang;
Gari tarbaen songon baju,
Ulang sirang sian pamatang.

Randorong sangkinae,
Parau sampan tu Barumun;
Mandorun rongkon nyae,
Patunda ni na marhalalungun.

Haru landit marpangir unte,
Lumandit do pangir ampolu;
Haru hancit na sirang mate,
Humancit do na sirang mangolu.

Matolbak tobing bange,
Horu aek tu barumun;
Anggo nada sirang mate,
Nada tarantak na malungun.

Malamun ma tarutung,
Na malamun so ra matonggi;
Marosros halulungun,
Paninggalkon ni na tu Doli.

Salak ni Jatarumun,
Sirimbor na langlang jataon;
Marsak au diarjeng lungun,
Panningalkonmu ma na dangol.

Rontang-rontang tali,
Bulung hompa bulung ni pege;
Muda potang sidumadang ari.
Songon soramu ma hubege.

Rontang-rontang tali,
Bulung hompa bulung parira;
Muda torang sidumadang ari,
Songon tompamu ma huida.

Manggual di haltona,
Manganggun di mange-mangena;
Malungun di tompana,
Dipasuang di pangambena.

Dirintak hotang-hotang,
Mangihut simarimbulu-imbulu;
Huida salimpotpot potang,
Huambang pangidupanmunu;

Dirintak hotang-hotang,
Mangihut simarbulu-bulu;
Huida hilap andos potang,
Huambang hilap ni tanganmunu.

Mangkuling tungtung bulu,
Di hauma ni Jamarangin;
Marnipi au ro hamunu,
Dompok di na satonga borngin.

Madabu unte tonggi,

Tu toru ni podom-podom;
Madabu holso di nipi,
Na paoto-oto na modom.

Haru dilabu pe da porda,
Di toru ni podom-podom;
Haru dilabu pe da roha,
Lain so ra do mata modom.

Tape ni Jagalangan,
Na ditungkus di bulung suhat;
Dibaen ho na mardalanan,
Jumotjot ho manongos surat.

Jotjot hamu manoto,
Tu tombak simarunte-unte;
Jotjot hamu manongos,
Ulang hudokkon na dung mate.

Dung so salonggi siroken,
Pinomat salonggi sadulang;
Dung so sanoli sapoken,
Pinomat sanoli sabulan.

Dung so salonggi sadulang,
Pinomat salonggi salaon;
Dung so sanoli sabulan.
Pinomat sanoli sataon.

Hapur-hapur langkitang.
Lumpatan na mogos-ogos;
Haru di balik ni Sihitang,
Ulang lupa hamu manongos.

Haru diungkit batu godang,
Nada tarorom so mandurung;

Haru dibaik tor na godang,
Nada tarorom so malungun.

Porda unang masuak,
Hurabot unang mabebe;
Rohamu unang muba,
Jamita hupabege-bege.

Sarindan hupopoi,
Sarung ni raut hubarbari;
Tu ginjang husigei,
Taripar laut hurayari.

Ambe-ambe ambolung.
Masopak dangka ni parira;
Muda na mangambe mamolus.
Malo-malo manghira-hira.

Saba-saba gariang,
Dibaen ho marbondar tonga;
Iba madung marjeng marnyang,
Dibaen ho martona-tona.

Dao ni bulan an,
Batu ni sabi madungdung;
Parhuta na dao an.
Mata ni ari ubat lungun,

Simbur hamu na turak,
Somaringkon ulang galunggung;
Ois tumibu hamu mulak,
Sumaringkon ulang malungun.

Nangkon sai marminyak hamonyan,
Sodang marminyak Sigalangan;
Nangkon sai maroban-oban.
Sodang mulak na mardalan.

Anggo pakean dohot sere,
Nada i pasonang roha;
Hamu do lungun ni simanare,
Nada marguna bagi aha.

Barang na dipardokkonmi,
Nada mambaen ling pinggolku;
Sada do hagiotnami,
I ma siangkup ni tondingku.

Magodang aek Sigiring-giring,
Mangayupkon parsamean;
Godang do da roha mangkirim,
Tibu mulak na mardalanan.

Haporas ni Sitorbis,
Boyomon ni na mandurung;
Horas hamu nian matorkis,
Sarihon au na malungun.

Muda na manguak manggotil.
Gatalan so mangoran bira;
Muda na marjanji satongkin,
Malo-malo manghira-hira.

Bulung ni sihondung na malos,
Madabu tu bona ni indot;
Sanga lupa sanga lolos,
Padan janji angkang paingot-ingot.

Janji lobi hasahatan,
Padang Bolak ni Sipiongot;
Lupa nobi marningot Tuhan,
Haram, anggo ho laing huingot.

Habang hatutu roba,

Songgop tu ranting ni bulu;
Muda na situtu ni roha,
Tibu alap laoskon au.

Ambasang ni Jasinggolom,
Mutik ni tuyung dohot poga;
Jagit hamu bo jawet solom,
Ubat ni lungun lomo ni roha.

Sise jolo saulaknari,
Ning bujing Nasotardago;
Anso hupatangi-tangi,
Tai ulang haru gogo.

Diloguhon Jagurese,
Dipabajan dipalaing;
Sidung surat sude disise,
Nasotardago sambut mangkuling.

Sotik pe suada sala,
Tama sajo ma hubege;
Bungkus ma da pola sapola,
Nada be i sai tarlage.

Di son hepeng sada rupia,
Panobusi ni parangkona;
Jago ma ho ulang mahua,
Anso lalu tu topotanna.

Mangalus Jagorese,
Laho manjoloji rupia;
Lobina on kehe tu ise?
Ampot mago songon dia?

Tonga dua uwang do ongnosna.
Sarupia dilehen ho;

Tontu bahat ma i lobina,
Nada omoan on tu ho.

Mangalus Nasotardago,
Mikim laho mopeng-openg;
Nada i labu tumbas ni gogo,
Taringot tu lobi ni hepeng.

Anggo lobi ni pitis i,
Nangkon be sai paulak;
Tabuskon ma danggi tu si,
Tu timbaho Padang Bolak.

Hum nasa i ulang dikiro,
Tu dongan-dongan sahabat;
Baen deba panuhor ngiro,
Pasombu nguas songon ubat.

Ah, nada le tarjagit upa,
Ning Jagorese mangalusi;
Tai nada ia lupa,
Jalop do rupia dimomosi.

Tai anggo di rohania,
Langka siamun badanon;
Lalu na tu sia,
Marisi saku ni bajungkon.

Dibaen songon Jahura-hura,
Mangkududukkon por ni rohana;
Na so giot do ning roha,
Hape digomak do sudena.

Antong mangan jolo hita,
Butuha on madung male;
Dipupu na marhata-hata,
Badan madung gale-gale.

Dung sidung hita mangan,
Anso langka au mulak;
Mabiar au hagolapan,
Donganku umpe sada halak.

Ancogot doma hudabu,
Surat on tu kantor pos;
Gonan ma dipatibu-tibu,
Anso ulang iba lolos.

Pade ma i Jagurese,
Ning bujing Nasotardago;
Boti madung mangkuling sese,
Jago-jago ho di pangago.

Mabiar de ho lakna,
Mangida babiat balemun?
Sanga ulok na lubangna,
Ato diambat panyamun?

Ha, ha ning Jagurese,
Laho pabudiar matana;
Diboto ho do au sanga ise,
Naso mangimbang di alona.

Ise ma na taon,
Manjagit sipak ruhamon?
Ampot ma da patunyanyaon,
Songon danak na panyahiton.

Dung sidung nasida mangan,
Nada be ia markuhasi;
Torus do ma marsijalangan,
Asa mandok tarimo kasi.

Langka ia munde-unde,

Mamolus tor mangarobaen;
Dipupu na marende-ende,
Marundung-undung basaen.

Salolot ni na mardalanan,
Lalu ma ia tu hutana;
Pamatang pe ma marngalutan,
Dibaen sinalojana.

Horas do halak Jagurese,
Nada adong na mangambati;
Sanga na manggorak manyise,
Asok-asok do dinunuti.

Sanga na aha parkobaran,
Diboyom do hata sude;
Mabiar ia digusaran,
Ampot ro na so pade.

Tapasirpang jolo hata,
Taringot tu Jasibola;
Dung dapot hobar jamita,
Anso diboto hula-hula.

Bo koum dohot kahanggi,
Bope namora sasude;
Ulang hamu nian magigi,
Tatangihon ma pade.

Dung dijagit surat i,
Disise ma denggan-denggan;
Sada-sada ma diartii.
Anso baru tu na legan.

Dung torang ma di rohana,
Lalu dipio parsondukna;

Dipatot ma sudena,
Dohot moga ni rohana.

Ia langka ni anakta,
Madung lalu tu tano Doli;
Di son suratna ro tu hita,
Maroban jamita na uli.

Ia madung jadi karani,
Gabe siangkup ni Gomponi;
Di torangkon do itu dan ini,
Nada'nggo dipabuni-buni.

Gajina gonop-gonop bulan,
Dapot tolu pulu rupia;
Dung i bahat dope tampalan,
Marroan sian dia-dia.

Dison bo sada gambarnia,
Dompok juguk mangadop meja;
Sonang ma ia di dunia,
Songon hangoluan ni raja.

Binoto ma na mangan gaji,
Anggo di kantor ni Gomponi;
Tajom hatana songon taji,
Sude halak mandokkon lani.

Hepeng pe dapot momo,
Silua ni na dua tolu;
Tibu ma himpal na niomo,
Pasonang iba na mangolu.

Tarsampak ma da i tu hita,
Riak ni ombak laut i;
Hum di bongal ni jamita,
Madung lobi na mangkauti.

Aha be na taarsakkon,
Hita tardok do na maradong;
Ia ma da taumpamahon,
Gonti ni bintang sidongdong.

Adong dope dilala ho,
Na hurang sanga na gailta;
Muda giot marlaho-laho,
Cukup do hepeng balanjonta.

Mangalus dongan sabagasna,
Martata humolos-kolos;
Pade ma hubege sudena,
Antong tibu ma hita balos.

Hata ni suratnia i,
Godang do roha manjagitsa;
Taringot tu pangkatna i,
Denggan-denggan ma dijagosa,

Saotik do sak ni rohangku,
Mambege jamita sian Doli;
Diboto ho do i aropku,
Tajom ni mata manaili.

Bahat di si na limus bohi,
Nona Cino nona Jopan;
Panyoro suangkon halihi,
Di tonga dalam mareapan.

Mangalenggang mangeongi,
Ganop-ganop di andos patang;
Nada adong na mandongani,
Angke na so umboto pantang.

Muda hurang imanniba,

Lalu ma iba masuk garjab;
Masuk narako ma da iba,
Diumban begu manungkayap.

Pot tung hona tu anakta,
Parbuatan na songon i;
Angke holip sian matanta,
Malua karejo ni Gomponi.

Aha dope na dijongjongkon,
Di ginjang ni portibi on;
Ia do na taparagakkon,
Manean sinadongan on.

Anggo ninna pikiranku,
Tapabagas ma ibana;
Ia pe sonang ma i ropku,
Diolo-oloi parsondukna.

Sanga ise giotnia,
Tama tibu hita tangkasi;
Ulang tu hita holsonia.
Di pudi nada taralusi.

Baen ma di surat i,
Pangidoan ni hita sabagas;
Anso ulang nian markoti,
Porlu ma ia dipabagas.

Mulak ma ia santongkin,
Anggo dapotan do parmisi;
Dibaen aha i nangkin,
Adat matobang got diisi.

Mangkuling Jagurese,
Sian pudi mandohoti;

Tabaen akal ni Jamanyise,
Padannia tadok markoti.

Muda nada ia ro,
Di bagasan ni bulan on;
Adong ma halihi manyoro,
Mangalojongkon tunanganmon.

Muda jabat songon i,
Haputpat ma ia mardalan;
Nada parduli di Gomponi,
Parmisi ma ia sabulan.

Ah, ulang pola songon i,
Ninna halak Jasibola;
Malua harejo ni Gomponi,
Murmartamba hahaila.

Tai ido pagarniba,
Dompok di hasiangan on;
Anggo mulak do parsaba,
Dos ma songon hita on.

Nada sala na mangido,
Tai denggan maribo-ibo;
Na basa do halak Ulando,
Bolas antong jolo dicubo.

Antong pade ning halahi,
Lalu disurat ma da surat;
Dibaen sian lan ni bohi,
Mangihutkon tu hukum syarat.

Didokkon ma sude sosot.
Di bagasan ni surat i;
Lopus gok sudena pursot,
Harotes na sangkayu i.

Dung sidung surat disurat,
Dipamasuk tu ampolopna;
Ditongos tu pos na sian barat,
Tu Jasingkoru adresna.

Sa i ma jolo jamitana.
Na masa di huta Balian;
Tapasirpang jolo tu ujungna,
Tu tano pangarantoan.

Taringot tu Jasingkoru,
Na mian di sabola timur;
Na mangarjeng dadaboru,
Dompok di na manjago jomur.

Dipupu ma na markarejo,
Na manyurat markiro-kiro;
Nada di sia marjo-arjo,
Sanga marsiloro-siloro.

Diingot do hata ni umpama,
Sapaingot ni parjolo;
Diboto do na hurang tama,
Pantang di sia na maralo.

Pantun dalam hangoluan
Teas mambaen hamatean;
Muda dibaen parbadaan,
Nada dumpang parsaulian.

Dibaen i ma da dongan,
Na denggan do baritania;
Nada pola halak alangan,
Ro tumopotkon ibana

Na denggan do adat basona.

Na ra marbaur dohot halak;
Manghem do di harorona,
Marsantabi laho mulak.

Sude do halak tondongnia,
Tulang sanga amang boruna;
Na tobang gabe ompunia,
Na menek didokkon anggina.

Nada songon na deba i,
Muda dung dapotan pangkat;
Na saotik ditambahi,
Pardalanna pe mardingkat.

Natobang dohot dakdanak,
Dosdos do di parnidaanna;
Aha panganon na lumunak,
I ma dihaut tu jolona.

Juguk sai tu juluan,
Songon raja nampuna huta;
Ibana ma ninna uluan,
Wakil ni Debata.

Dipupu hum na martata,
Mangan pe hum sarat mamondut;
Muda dielpasan hata,
Marpesol-pesol mangindudut

Humenjel-henjel ma ibana,
Songon gayo na dumpang labo;
Dibonduti ma sudena,
Juhut dohot tabo-tabo

Anggo di joman saonnari,
Ulang dibaen songon i;

Lalu ma iba digusari,
Disimbilkon dongan i.

Maruluan do alaan,
Martalaga do juluan;
Ise na patut siangkaan,
Ulang dibaen sianggian.

Songon i ma da santuho,
Rarat ni hobaran on;
Tapasirpang jolo laho,
Tu ujung ni barita on.

Salamba lolot ni ari,
Lalu ma da surat tu Doli;
Di hos guling mataniari,
Besteller mardalan sulang sali.

Dua surat na sian barat,
Taradres tu Jasingkoru;
I ma di ampolop tarsurat;
Afzenderna sian toru.

Di son surat bo di hita,
Na ro sian Tapanuli;
Surat ni halak amanta,
Dohot sian dongan sajoli,

Sada sian Nasotardago,
Laing tar adresna tu hita;
Tajagit ma so ulang mago,
Tapajopi tu sakunta.

Tata unyom ma Jasingkoru,
Laho manjagit surat i;
Otik do ma anso kaliru,
Pambaen ni na maroban i.

Teng, teng ninna pukul dua,
Mulak ma ia sian kantor;
Dipasang ambe lua-lua,
Taru mandohuk songon motor.

Hum lalu ia tu bagas,
Gulung ma tu karosi panjang;
Diligi di patangkas-tangkas,
On ma surat na sian damang,

Diompot ma dibuka,
Surat na ro sian amana;
Disise dipajarka-jarka,
Hata taringot tu ibana.

Dung mandok hata selamat,
Dapot ma sabola tu toru;
Di bagasan sada kalimat,
Mandok ia mambuat boru.

Hasaya ni na marsaripe,
Pasonang iba na mangolu;
Maroban tua hagagabe,
Songon dongan na dua tolu.

Manyarihon boltokniba,
Dohot sude bagas inganan;
Onding-onding ni haba-haba,
Manjago iba na sapanganan.

Halak na so marripean,
Nada martondi ingananna;
Songon kopal na so maraluan,
Mampal-ampal ma ibana.

Mopeng-openg Jasingkoru,
Mangantor tu pusu-pusuna;

Kehe tu ginjang tu toru,
Lupa surat ni tunanganna.
Tarsingot ia tu pangidupan,
Dijama saku ni bajuna;
Hape adong na hugugupan,
I ma surat ni tunanganna.
Diulahi dipagulung,
Tu ginjang ni karosi hotang,
Marbismillah ma naposo bulung,
Mambuka surat na baru datang (na baru ro)

Tor kotok-kotok,
Tor sosot-sosot;
Ulang iba mopop-mopop,
Dumenggan na asok-asok. (1)

Songon i ma da na tubu,
Tu roha ni Jasingkoru;
Tai dilabu so tarlabu,
Lalu ma mangandung mandoru.

Hum mangida tanda tangan,
Tekenan ni Nasotardago;
Maralitan marurdengan,
Songon bintang di ari logo.

Itak pandalona,
Bulung ni gumbot panungkusna;
Ma songon i pangalahona,
Dipararing ma isina.

Disise diungut-ungutkon,
Hata ni siguriton i;
Murmagingang ditotorkon,
Ilu pe ro ma manetehi.

- (1) Olo, muda mopop tartuktuk,
muda lambat adong na nipaintena,

Dihahua dope i,
Diputuskon ma tu si;
Madung sude koum tumahi,
Dicubo ma gonan parmisi.

Ancogot ma hucubo-cubo,
Mangido tu na sangap i;
Muda malang ma na tibo,
Tarida ma sambor ni nipi.

Muda dapot na denggan,
Dilehen na sangap i;
Ima tua ni boru enggan,
Na dipangolohon ni nipi.

Dua bulan pe nian,
Tuk ma tempo pulang balik;
Ulang dibolus na robian,
Dalan sian Labuan Bilik.

Dalan laut ma dibolus,
Sian Belawan tu Sibolga;
Sian i ma iba tulus,
Nadabe be i marsingga-singga.

Huetong parlotlotna,
Tuk ma dua puluh ari;
Baen saido biasona,
Lalu ma halak tu nagori.

Harana nada songon bendi,
Naditarik ni kudo bolang;
Bulus do tu lautan Indi,
Ditulak-tulakkon galombang.

Sian i ma tu Sibolga,

Sian Sibolga tu nagori;
Salamat ma lalu tu tangga,
Nada adong mangaraori.

Dung lalu tu huta Balian.
Diligi ma ari na denggan;
Anso disunggul parnipian,
Dohot halak siboru enggan.

Putus ma di Jasingkoru,
Partama dohot partupana;
Parmisi giot mangalap boru,
Dipangidohon ma tu *chefna*. (tuanna).

Disombahon pangidoan,
Dohot pantunna mandok lidung;
Tu adopan ni paduka tuan,
Parmisi giot matua bulung.

Madung huetong parlolotna,
Tuk ma tempo dua bulan;
Laho kehe dohot mulakna,
Muda so dong abat di dalan,

Pandok ni ama dohot ina,
Porlu sajo do angkon mulak;
Muda sili di arina,
Malua ma boru ni halak.

Badan on madung walang,
Saneto marjanji na togu;
Nada be sobar boru tulang,
Angke na lolot ma martanggu.

Muda nada au ro,
Kehe ma ia marbagas;

Tubu ma dalan parkaro,
Marloja hami na sabagas,

Harana janji ma dung putus,
Madung marsilehenan barang;
Tempo di bulan Augustus,
Marsaksi marsitorang-torang.

Dibaen i ale tuan,
Sayang ibo jolo rohamu;
Dung dapot na diluluan,
Marharejo au sagiotmu.

Painte so sidung harejonta,
Hujama pe hatiha borngin;
Ulang adong hata humata,
Tu anak ni bayo angin.

Tamonong ma na sangap i,
Manimbang pangidoan ni bayo,
Dipahusor nada tarpasipi,
Unduk do ma hayo-hayo.

Marpikir ma ia sangombas,
Manimbangi pangidoan;
Hodokna madung mulbas-ulbas,
Manyarohon na dua bulan.

Ise huboto wakilna,
Painte so ro ia tu son;
Harejo on ma bo bahatna,
Parkaro pe bahat putuson.

Tai bia dope binaen,
Dilehen ma tu si parmisi;
Didok ma tu kantor residen
Anso dilehen deklarasi.

Pade talehen parmisimu,
Ninna mandok Jasingkoru;
Kehe mangalap parsondukmu,
Dohot ma au marsuru.

Salamat ho nian di darat,
Torkis gogo di tonga laut;
Lopus tu sabola barat,
Sude hajatmu sai saut.

Di ari lima ma ho kehe,
Di si do kapal na tu barat;
Ulang be marmuhe-muhe,
Sonang ma di laut di darat.

Tama ning Jasingkoru,
Laho mandok mauiate;
Tulus ma na mambuat boru,
Sumonang ma di ate-ate.

Di pasingkop ma sude,
Aha barang siobanon;
Sude silua na pade,
Ambaen silehen-lehenon.

Di isi ma kalandan Doli,
Kain Lasam kain palikat;
Abit surto bo mastuli,
Dilipet ma martirkat-tirkat.

Adong dope sakopor nai,
Abit sutra Batu Baro:
Kain batik minyak kasturi,
Bahat nada tarkiro-kiro.

Sapasang ringgit Inggiris,
Tolu sanrante gabe kancing;

Golang rante marbaris-baris,
Boti dope parmato cincin.

Ambaen di Nasotardago,
Dihorja markaroan on;
Anso majeges mur badago,
Bunga-bunga ni hasianganon.

Dapot ma hatiha borkat,
Diketok telegram mandokkon;
Jasingkoru madung marangkat,
Kopal Sibolga mendayungkon.

Pasiap ma di si sudena,
Aha do na tama baenon;
Muda dapot di hatihana,
Ulang dipatanda na haleon.

Marlayar ma sian Belawan,
Manuju haluan tu Sabang;
Nada be maradian-adian,
Torus songon unggas na habang.

Dos arian dohot borngin,
Nada adong be maradian;
Haru dihalingsungsungkon angin,
Laing hipas do tu aluan.

Singga ma di Olehle,
Panompang pe manaek mijur;
Mandaoni halalute,
Mangagohon sapot ni ijur.

Sian i kehe tu Singkil,
Sian Singkil kehe tu Barus;
Manetek ilu martangkil-tangkil,
Gamang di ombak dohot arus.

Binoto ma laut Hindia,
Marbinanga tu laut sikutoro;
Sanga ise mamolus ia,
Dipukul ombak badoro-doro.

Ia halak Jasingkoru,
Madung mabuk matok ulu;
Kehe tu ginjang tu toru,
Mangido urup ni na dua tolu.

Sambang ma simanare on,
Mate di tonga laut on;
Muda marpupu songon on,
Lalu ma na manyuruk tano on.

Hum bujing Nasotardago,
Didokkon di orong-orongna;
Piohon ma gogo-gogo,
Anso ro manolong ibana.

Anggo bolak ni laut Indi,
Nada be diboto ia;
Lambok songon na malitondi,
Gogo pe nada be sadia.

Ro do nian *stuurman* kopal,
Mangalehon ubat tu ibana;
Dibalut dohot ulos na hapal,
Anso ro mulak gogona.

Aluan diputar sian Barus,
Lalu tu Gunung Sitoli;
Ditulak-tulakkon arus,
Dibusbus angin na ngali.

Lalu tu Gunung Sitoli,

Torus pajurkon muatan;
Sian i tu labuan Tapanuli,
Manuju tu tano daratan.

Labuan na so margalombang,
Diondingi pulo-pulo;
Tu si ma kopal mumbang-umbang.
Marroan halak mangalo-alo.

Dung marlabu kopal api,
Lalu pajurkon muatan;
Halak pe ro ma sian topi,
Manaruisa tu daratan.

Ia halak Jasingkoru,
Dipaupahon ma barangna;
Mijur ma ia tu toru,
Baen madung mulak gogona.

Manaek ia tu sampan kota,
Na didayungkon dohot gogo;
Nada be ra muta-uta.
Mamago diombus alogo,

Tapaimbar jolo barita,
Taringot tu Nasotardago;
Naron ma tapaujung hata,
Sidalian mangalap gogo.

Dompok di ari na langga,
Ro surat tu Janji Matogu;
Surat ni anakna kan Sibolga,
Paboahon anakna baru tubu.

Marpingkir Raja Na Matua,
Marsuru manungkir na sorang;

Kehe manaruhon silua,
Panganon dohot barang-barang.

Mandurung hamu deba,
Anso ke au manjala;
Panganon pasahat hoba-hoba, (parompa)
Ulos ni siuncok mula-mula.

Denggan ma holati hamu,
Udang dohot incor tali;
Dilompa dipadomu-domu,
Dijorankon tu kualii.

Anggo mera na hujala,
Binaen ma gabe parlaslas;
Songon tulak-tulak ni bala,
Laho manjama na milas.

Dibaen indahan sangaum,
Songon sialo-aloon;
Ampot marroan koum-koum,
Adong ma patama-tamaon.

Dipatamba dung di si,
Ulang susa oban-obanon;
Denggan hamu markuhuhasi,
Baen dao dalam boluson.

Oban hamu Nasotardago,
Songon na mangaligi laut;
Tai jage hamu pangago,
Ulang lupa maroban raut

Pendek ni hata dohonon,
Langka ma na tu Sibolga;
Moroban sioban-obanon,
Laho palalu baga-baga.

Sude do halahi marbendi,
Anso hipas di pardalanan;
Nada marnajolo marnapudi,
Lopus tu huta inganan.

Lalu halahi tu Sibolga,
Madung pendek mata ni ari;
Marroan hula dongan marga,
Songon adat suat ni ari.

Ro bujing-bujing ni hutai,
Dipio ma Nasotardago;
Keta tu toru mangkatai,
So dapot diombus alogo.

Adong mandok keta tu *boom*,
Mangaligi kopal api;
Ulang milas hona bombom,
Songon salean diparapi.

Indu di topi laut an,
Riburan halak marsampani;
Marbungkar manaru muatan,
Masuk tu gudang ni Gomponi.

Kehe ma halahi tu si,
Mamolus sian tonga pasar;
Marratus halak mamolus,
Songon tahuru na nisarsar.

Jongjong halahi di topi,
Manondur na pahae-pahulu;
Na mijur sian kopal api,
I ma dongan na dua tolu.

Ditailihon laut Indi,

Ditindo tu Sibolga Julu;
Margorak badan dohot tondi,
Manyogar muse dohot imbulu.

Tarpaida di sada sampan,
Sada bayo marbaju udan;
Di uluna topi Jopan,
Songon halak na sian Medan.

Dipatangkas Nasotardago,
Songon sitanda-tandaan;
Langan tarsongon hotang sogo,
Ro tu darat maradian.

Gumadobuk taroktokna,
Suangkon na hona pitonggang;
Nanggo hoti i ibana,
Ning rohana jongjong singgang.

Diligi tu ginjang tu toru,
Bayo na mijur sian sampan;
Didok ibana Jasingkoru,
Tai songon tompa ni Jopan.

Dipupu dipaligi-ligi,
Tai maila manyapai;
Ampot tarpangko tarsuligi,
Gonggong ma halak martatai.

Ia halak Jasingkoru,
Na juguk di bagasan sampan;
Manaili do tu duru,
Adop bujing na mareapan.

Diligi tu topi duru,
Ditatap dipamanat-manat;

Songon raja pangiburu,
Marjeng dibaen simanat,

Manombo giot dipiohon,
Tai maila mida halak;
Lalu dipohom disipsipkon,
Holosan di laut na bolak.

Na bahat halak na sarupa,
Diginjang ni portibi on;
Nada be ditegor disapa,
Diligi sajo dalam boluson.

Keta le Nasotardago,
Ning dongan marpio mulak;
Mur mangali ma alogo,
Maila iba mida halak.

Eh, ning halak Jasingkoru,
Laho padonok tu nasida;
Digoitkon ma tanggoru,
Songon-songon na so diida.

Manaili Nasotardago,
Tu na manggoit sian pudi;
Ho dehe i bayo alogo,
Na ro sian lautan Indi?

Olo da upa ni tondi,
Angkamu ma na di son i;
Na ro sian lautan Indi,
Dioban kopal ni Gomponi.

Biasi tinggal ho di son,
Ise na ditopotkonmu;
Songon kontrak sigadison,
Madung he dong na nisondukmu?

Ulang iba dongan targora,
Manggoit jolma ni halak;
Ro uhuman ni namora,
Ditenju iba manyinggalak,

Anggo marbagas ma ho saut,
Nangkon be ke au pahulu;
Tai huambur ma tu laut,
Aha guna ni na mangolu.

He, he ning Nasotardago,
Mangalusi hata i;
Ulang dokkon gogo-gogo,
Na bahat halak mamatai.

Tali papaut,
Tali panggongan;
Taripar laut,
Ditanda do rupa ni dongan,

Nada na matua bulung,
Baen na ro au tu son;
Ato tarayak tarinjulung,
Songon kontrak sigadison.

Na hum tandang marlaho-laho,
Manungkir anak ni boto;
Hape marsuo dohot ho,
Homang iba songon na oto.

Keta hita muli,
Tu bagas ni ibotonta an;
Indahan masingkop dipauli,
Boti laho marsitandaan.

Ah, ulang songon i ale,

Di pudi ma marsitandaan;
Anggo butuha na male,
Bahat do koum pangidoan,

Tai adong do di son lopo,
Jambur ni Japandalian;
Nada i pola magopo,
Torang do i di parnidaan.

Oban ma jolo indon,
Salendang kuwe dohot abit,
Halilian manutung sagadon,
Asa panjangki ambit-ambit.

Diungkap ma kalandan Doli,
Diela ma salendang batik;
Ulos ni siuncok di na ngali'
Burangir nada be tartiktik.

Denggan ma pasahat hamu.
Silua na songon dia;
Ulang patar baen hamu,
Iba halak na hurang roha,

Torus do au ancogot mulak,
Tumopot huta hasorangan;
Ulang ngolngolan sude halak,
Painte na ro sian jalangan.

Dung salose harejomu,
Tibu ho mulak sian on;
Dokkon denggan baga-bagamu,
Pasahat na hulehen on.

Marsijalangan halahi,
Bope dohot dongan na asing;

Ria sude dohot di bohi,
Laho mangalangka humosing,

Homang roha ni donganna,
Marnida halak na dua i;
Adong ke anak namboruna,
Na ro sian na dao i?

Na rosu ma kele nasida,
Songon halak na marsaripe;
Impol roha mata marnida,
Holpu songon na mangan tape.

Disungkun ma Nasotardago,
Sanga ise do bayo nangkin;
Nada he i halak pangago,
Na ro sian tano Marikin?

Mangalus Nasotardago,
Parkoumanta do da-i;
Nada i halak pangago,
Tai halak na hutanda i.

Anak ni hula donganta,
Anak ni na mauli bulung;
Tanda-tandaan ni amanta,
Bayo na lambok marlidung.

He, he, rap ni halahi,
Patunda ni homang ni roha;
Tai adong tanda di bohi,
Roha na marjaha-jaha.

Lalu halahi tu bagas,
Dilehen ma sude silua;
Tu siuncok bayo na ringgas,
Anso torkis sayur matua.

Disapaan ma Nasotardago,
Sanga ise do na marsilua;
Ulang pola paago-ago,
Nada pola jabat mahua.

Aha he sai sihiran,
Ninna mangalusi hata;
Nada i pola habiaran.
Tai sisolkot ni amanta.

Uloskon hamu ma tu siuncok,
Kuwena i mare tapangan;
Silua ni bayo di carocok,
Rajoki ni siuncok dongan-dongan.

Mangkuling ibotona,
Tu dia kehe halahi?
Sugari tu son ma ro ibana,
Ma dung pade marsuo bohi.

Denggan ni aha dong nangkin,
Marborngin halahi di son;
Bope iba halak na miskin.
Aha salana ro tu son?

Mangalus Nasotardago,
Porlu langka ni halahi;
Hami oncot do gogo,
Pinomat hum marsuo bohi.

Tai nada ra nasida,
Mamulus do tu lopoan;
Manjalahi na nitanda,
Tu si do kehe maradian.

Ah naporan ma ibana,

Ning nampuna bagas i;
Sugari aha ma salana,
Dung sidung mangan ke tu si.

Taringot tu Jasingkoru,
Na marborngin di kode nasi;
Nada be ke mijur tu toru,
Mabiar ro na manangkasi.

Dung torang sidumadang ari,
Manaek ma ia tu bendi;
Manuju tu kampung nagori,
Inangan asal mula jadi.

Satontang tu Nasotardago,
Nada sonang be rohana;
Diambat ma tu sopo jago,
Anso marsuo dohot angkana.

Jongjong ia di sopo jago,
Painte-inte Jasingkoru;
Nada mabiar hamamago.
Na mangonjap di topi duru.

Na so niambang-ambang,
Ro ma kudo matupakpak;
Marlojong songon unggas na habang,
Maroban barang dohot halak.

Hum tangkas diida mata,
Halak na di bagasan bendi;
Nada hoti be angkanta,
Bayo panyahatan ni tondi

Maradian hamu jolo,
Maradian hamu jolo;

Ulang hamu songon na gilo,
Di son au mangalo-alo.

Maradiañ bendi i,
Patangkas halak na manggora;
Anggo ning roha ni saisna i,
Tauken halak na marmara.

Hape halak Nasotardago,
Giot marsuo mangulahi;
Mangambat di sopo jago,
Jongjong di topi suhi-suhi.

Bo aha do haporluanna,
Baen na ro honggi tu son?
Songon on ma bo lungunna,
Aha na giot patangkason?

Adong saotik sapaanku,
Ning bujing Nasotardago:
Na tuari lupa do ingotku,
I ma so ro tu sopo jago.

Aha dehe na satutuna,
Baen na mulak ho sannari;
Songon on ompot-ompotna,
Suang songon na jalang rari.

Lolot de ho di hitaan,
Anso huboto patibuhon mulak;
Bia do hata ni parjanjian,
Ma dung sar diboto halak.

Bia dehe pandanta i,
Pandan antuno do roa i?
Bia dehe padanta i,
Padan na tulus do roa i?

Nada podo binoto pudung,
Numma bonggal parirana;
Nada podo binoto tulus,
Numma bonggal jamitana,

Soban ni Nandori Moka,
Nadung dibolak diharkari;
Tanda ni togu ni roha,
I ma so ro au sannari.

Ho do na porlu hualap,
Ning Jasingkoru manguduti;
Nada pola marsigolap,
Janjinta do na hutopoti.

Soban taparsoban,
Ulang ho ra marsoban laklak;
Hobar taparhobar,
Ulang ho ra diganggu halak.

Anggo i do topotonmu,
Dohot ma au saonnari;
Songon dia do giotmu,
Dokkon ma so hupikiri.

Ah, ulang songon i,
Ning Jasingkoru mangantahi.
Siuncok ma gonan dongani.
Dung ro ma ho anso tatahi.

Kehe ma ho mulak tibu,
Agoan naron halak di ho;
Bo burbar sora ni tabu,
Guntur halak na humaloho.

Dung sidung harejomu,

Torus ma ho markiro mulak;
Sonang do roha ni angkamu,
Nada jabat mangupet halak.

Di son ringgit baen tambangmu,
Ulang be ho marloja pat;
Antong pasonang ma rohamu,
Dohot sobar marganda lipat.

Mulak ma Nasotardago,
Mardalan halak Jasingkoru;
Langka ni kudo pe manggogo,
Lopus lalu tu Batang Toru.

Sian i tu Sidimpuan,
Adong ma bendi na imbaru:
Maroban tu Huta Balian;
Kampung ni halak Jasingkoru.

Marayak sundut mata ni ari,
Lalu ma tu Huta Balian,
Marroan ma dongan sanagori,
Manyungkun barita ni Medan.

Binoto ma na baru ro,
Halak na mulak sian ranto;
Bahat muse hata siloro.
Mangengen tapi dohot ato.

Deba hum tandang mangidup,
Mangalsik timbako sek;
Na so unjung saumur hidup,
Mandai timbako na mesek.

Barita na mulak sian Doli,
Nangkon be hita paginjang;

Angke bahat pasili-sili,
Incak markaranjang-karanjang.

Taringot tu Nasotardago,
Tolap ma da ia tu bagas;
Na mulak sian sopo jago,
Nada adong halak na ngusngas.

Angke nada dong mamboto,
Ato marnida ia langka;
Inangna sanga na iboto,
Bope koum sanga na angka.

Dung saborngin dua ari,
Didokkon ma adop inangna,
Mulak ma hita saonnari,
Didokkon magis pamatangna.

Mangkuling ibotona,
Na mopop ma na mulak i;
Nada dope sabo lungunna,
Digogo ma na mangantahi,

Di son jolo hamu ito.
Dongan ni ama na posomu;
Panahit-nahit palito,
Hutabusi pe abitmu.

Aha ma na niopopan,
Mulak tu Janji Matogu;
Na dung sidung do baboan,
Di son ma dua tolu minggu.

Bancut Nasotardago,
Mamurenges tu inangna;
Didok manangging ari logo,
Hiang saba aha labona?

Tibu pe ro hami tu son,
Dung sidung eme disabi;
Hum iba do na parbaga on,
Mulai sian eme na bibi.

Mangkuling ma inangna,
Mulak ma jolo da tu si.
Huantahi pe ibana,
Dipupu do na mandasdasi,

Bia dope binaen i,
Mulak ma tu si ancogot;
Nada pade na martangkangi,
Marhobas ma hamu sumigop.

Sidung dihobas siobanon.
Dohot silua ni dakdanak;
Marragam sipangan-panganon,
Rambutan na lunak-lunak.

Langka ma na mulak,
Di oban bendi pasang dua;
On dope ia so tarkalak,
Tai nada jabat mahua.

Pendek jolo hata dohonon,
Lalu ma halak i tu huta;
Sagaman barang sipanganon,
Dilehen laho marjamita.

Torkis do ama na posonta,
Na sorang di Sibolga i;
Bahat do ro koum-koumta,
Mangankon na hami oban i;

Nada dope ginjang jamita,

Tarsingot ma tu Jasingkoru;
Ho ma inang palalu hata,
Marsipurpur jolo au tu toru.

Sura-suraan di mata,
Haroro ni halak Jasingkoru;
I ma enso mijur ibana,
Manatap-natap-sian toru.

Homang halak patundana,
Nada martontu harejona;
Nada binoto aha nyaena,
Murmarnyang pamatangna.

Muda marayak andos potang,
Madung jongjong ia manindo;
Tu dalam dipatontang-tontang,
Henceng songon anak ni kudo.

Tapasirpang jolo hata,
Salaho tu Jasingkoru;
Disisik ma hobar jamita,
Tu dongan partopi duru.

Dompok topet di ari poken,
Marsuo dohot Jakulabu;
Dompok mangetong mangareken,
Arga ni timbako Payakumbu.

Bo nandigan do ho ro,
O puang Jasingkoru;
Hupasidung jolo kiro-kiro,
Panggarar ni timbako Payakumbu.

Ro ho le tu hami an,
Madung mulak na mardalanan;

Songon na manungkir sibunian,
Di haposoan na robian.

Mangidup hita jolo,
Ning bayo angin Jasingkoru;
Ulang oldeng au songon lalo.
Hauanta dadaboru,

Hahua he laklak singkoru,
Marrebeng-rebeng bulung suhat;
Hahua he mambuat boru,
Malo do au manduda muhat.

Idup gonan timbako on,
Timbako tonggoan sian Doli;
Sanga rokok Manila on,
Nada marimbar bolas pili,

Ro pe au da tu hamuan,
Marsuo dohot ama inanta;
Bo he suada na nioban,
Pinomat hum marsuo mata.

Betak tibu do iba mulak,
Tu tano pangarantoan;
Mabiar iba mida halak,
Ampot disoluk pangomoan.

Painte hami di adu,
Ancogot sanga na haduan;
Sadiohon kopi na kodu,
Patorang-torang parnidaan.

Pade ma i ning Jakulabu,
Laho mengalsik timbako jau;
Tama ma roho tartumibu,
Baru manjala dope au.

Adong di si sangkibul mera,
Dompok satonga markar sale;
Ginjangna sungkot di abara,
Tabo ma i ambaen gule.

He, he, ning Jasingkoru,
Laho mamondutkon ijurna;
Jurur ma i di aru-aru,
Butong ma boltok pambaenna,

Ulang lupa ho di ngiro,
Bope pege hombu-hombu;
Muda tulus hami ro,
Angkon butong martombu-tombu.

Sasanoli do antong,
Rap hita mangan mangere;
Tama ma i hita pabutong,
Anso mamokmok simanare.

Sagiotmu do kahanggi,
Singkop ma i sude hubaen;
Bumbu pege ngiro na tonggi,
Singkop ma dongan ni gulaen.

Antong muda na songon i,
Mulak be ma hita jolo;
Ulang be dong na mangkalangi,
Anso dapot tonggi ni gulo.

Marsijalangan halahi,
Laho marsirang mulak be;
Baen madung marsuo bohi,
Numayang ma tangan mangambe

Dung torang sidumadang ari,
Langka ma halak Jasingkoru;

Nada adong be dipikiri,
Sian na manyapai boru.

Dipake ma sedeng manurun,
Dohot baju tariko Doli;
Dipispis dohot minyak orun,
Pahuskus na poso na doli.

Muap sitaralam-alam,
Muap sitarolum-olum;
Muap hunya-hunya tombak,
Muap garang-garang laut,
Ise manganggo butong mangan,
Na marnyae bulus malum,
Nangkon sai mardongan ubat,
Matorkis badan pitunsundut.

Hadang abit sutara locan,
Doser saraor ragi mereng;
Sipatu kilau-kilauan,
Segar sisik tingkos maneleng.

Arloji omas rante sere,
Alit di saku ni bajuna;
Denggan sajo marire-ire,
Sonang ma mata mangidana.

Dipio ma halak Jagurese,
Langka tu Janji Matogu;
Manungkir boru na disise,
Manyunggul padan janji natogu.

Tama ma i kahang doli,
Ning Jagurese mangalusi;
Nada adong na manjanggali,
Keta ma hita tangkasi.

Adong dehe dioban ho,
Baju potong toluk balanga;
Pakean kehe marlaho-laho,
Na tama obanon tu tonga.

Dohot detar serong Jawa,
Asa saraor panci Cina;
Dungi piso ato cewa,
Na tama gabe angkupna.

Muda jabat i hupake,
Diambang halak ma pangingkar;
Nada be dipaeke-eke,
Mabiar ma hutenu mabungkar.

Ha, ha ning Jasingkoru,
Laho paruarkon pakean;
Sanga lupa na niguru,
Ulang silap diparlangkaan.

Dung mamake Jagurese,
Langka halahi mardalan;
Nada dong na manggorak manyise,
Di golap bo di torang bulan.

Lalu tu Janji Matogu,
Sagala nari do ma ari;
Horas nada diambat begu,
Bujur dalam ditaripari,

Hum samon mata ni ari,
Lalu ma tu bagasan jabu; (bagas)
Nada tartuktuk, tarduri,
Denggan dijagit Jakulabu.

Dung sonang marsijalangan,

Kehe mangambe mangalaos;
Pagayung-gayungkon tangan,
Songon na marlaos-laos.

Lalu tu alaman na bolak,
Tu alaman silangse utang,
Utangan sala madenggan;
Parmayaman ni sude halak,
Ganop-ganop di andos potang,
Tonduron ni siboru enggan.

Tarpaida tu nasida,
Halak bujing Nasotardago;
Dompok mangkait-kait renda,
Dipaombus-ombus alogo.

Ia halak Jasingkoru,
Marpupu mintop timbakona;
Tongkin jongjong ke tu duru,
Manutung pangidupanna.

Tai mangarti do da hita,
Akal ni bayo siparlungun;
Muda dapot marsuo mata,
Lobi na butong mangan minum.

Madung sude api-api,
Laing so nahit pengidupan;
Angke tongtong do dipasipi,
Ditutung na so panutungan.

Jabat mosok salibonna,
Hona jilam ni api-api;
Nada diampirkon ibana,
Mur ro tanganna mangkiapi.

Tapadangka jolo hobar,
Taringot tu Nasotardago;
Tongkin juguk mimbar-imbar,
Songon na parsudehon gogo.

Dao dope madung ditatap,
Na mangambe mamolusi;
Songgang ia laho mangucap,
Laho manatap manangkasi.

Dung pe dipaingot-ingot,
Pangalangka ni bayo angin;
Di si pe ia so tarsonggot,
Songon na marnipi borngin.

Dibaen akal dohot bisuk,
Dihiapkon basaenna;
Ro ho anso hupamasuk,
Nada adong na mangambatna.

Mangarti Jasingkoru,
Di akal ni Nasotardago;
Songon halak na sagoru,
Rap tau di langka tigo.

Kehe ma halak Jasingkoru,
Tu bagas ni orang kaya;
Didapot juguk do di toru,
Inangna na gogo markaya.

Bo ho de i inang tobang,
Na juguk di alaman i;
Laing poso do da pamatang,
Songon na hutinggalkon i.

Di dia amantua,

So jawet solom hami jolo:
Horas dehe nada mahua,
Dung na marsirang na jolo?

Mangalus na tobang-tobang i,
Ise do ho antolismu;
Songon na muap minyak wangi.
Aha do na niamalmu?

Bo ho de i Jasingkoru,
Aha do mang dioban ho?
Ulang pajuguk be di toru.
Dumenggan ma manaek ho.

Aha ma he inang silua,
Na huoban sian Doli;
Iba pe nian ulang mahua,
Madung sumonang holi-holi.

Uyup-uyup parupuk,
Na solot di sopo saba;
Hum holi-holi do mapukpuk,
Na niomo so suada,

Kacurian do di tongandalan,
Boti rugi na markode;
Umpe saotik hatinggalan,
Hohos madung tu pajak gade.

Mangalus na tua-tua,
Martata gonggong-gonggong;
Ulang au paua-ua,
Hutanda do suratan agong.

Ulang baen tipuh Aceh,
Huboto do gurindam Barus;
Muda biar roha maleceh,
Kehe gonan iba maporus.

Songon i ma habatan,
Hamu na sian Doli i;
Manggantang asap dot suhatan,
Mangirput iba songon i.

Haha bo ning Jagurese,
Na manangihon kecet i;
Ise hamu na jogal mise, (sisungut).
Au manondur manotnoti.

Mardomu halung dohot lepe,
Samo gait dohot paor;
Songon lomang dohot katupe,
Holpu muda denggan panggaor.

Mana jolo husolatkon,
Juguk tu tonga-tonga on;
Anso laho huparpayakkon,
Isi ni na huoban on.

Di son di ho inang silua,
Na dioban sian Doli;
Ulos-ulos ni na matua,
Sada abit urat na ngoli,

Di son di ho amantua,
Sada baju lakan gudang;
Matorkis ho maroban tua,
Saulak nari tapagodang.

Di son di ho Jakulabu,
Sada arloji dohot rante;
Ulang matobang ho tibu,
Anso sumonang ate-ate.

Pambungkusna on kehe tu au,

I ma abit kain kasah;
Saotik pe anggo di au,
Tuk ma i pangubung hosa,

Dijagit ma sude silua,
Dohot sagodang ni rohana;
Mengkel-engkel na matua,
Mikim-mikim dohot anakna.

Mauliate do di ho,
Amang doli Jasingkoru;
Tuhan mamalosi tu ho,
Tibu ma ho dapotan boru.

Mangan ma hita jolo,
Madung male hamu huida;
Adong do kopi na margulo,
Gulena lalat na diduda.

Dengdeng do pangaroncana,
Ursa sian Padang Bolak;
Salaku molkut do daina,
I ma na so tarsarihon halak,

Mangkuling Jakulabu,
Paruar inang meranta i;
Bope pege hombu-hombu,
Dohot ngiro donganna i.

Amang . . . inang . . . amang,
Ning Jagurese sian pudi;
Ise datu na got marmangmang,
Pasusur aji patulidi?

Nada le amang adong,
Halak na giot pasusurkon;

Langkamunu do na tondong,
Dapot mera na dipayakkon.

Antong anggo na songon i,
Bismillah hita de dongan;
Nada sobar au manahani.
Tapatibu ma na mangan,

Mangan na halahi sude,
Taru marsitorjak di bana;
Salaku marindabe-indabe,
Mera, ngiro dohot bumbuna.

Paginjang umurkon,
Ning Jagurese mangulahi;
Muda dapot na di rohangkon,
Tapabutong pe saulak nari.

Dung sidung mangan borngin,
Mijur halahi tu toru;
Taringot tu sibayo angin,
Madung sai manduru-duru.

Didokkon ma tu Jakulabu,
Keta hita marujar-ujaran;
Mangido tu na marbaju, (bujing-bujing)
Pasuang-suang na robian.

Keta hita jolo mangido,
Tu bagas na godangan;
Anggo so pola hona dando,
Mangkoloskon paruntungan.

Aha ma angkon mangido,
Ning Jakulabu mangalusi;
Hum pasude-sude gogo,

Mangkusipi suhi-suhi.

Tapangidohon mangulahi,
Tu bagas na godangan;
Giot ro pasuo bohi,
Aha ma pola alangan.

Adong ma da porlu gunana,
Ninna halâk Jasingkoru;
Mangaligi akal bisukna,
Sinaloan ni dadaboru.

Langka sudena halak i,
Tumopotkon bagas na godang;
Mangido sian suhi-suhi,
Didongani hundangan podang.

Jumolo dipatangi-tangi,
Sanga na ngot do pangidoan;
Dung i pe anso dimulai,
Paruar nasa sinaloan.

O bujing-bujing,
O bujing parkouman;
Bia dehe bujing-bujing,
Tontang sarihon hami on.

Bia de jo bujing-bujing,
Sonduk hariari behe jolo,
Indahan na di dapuron;
Tontang sarihon behe jolo,
Hami na di toruon.

Bia de jo halalungun,

Bolas dehe parincaran,

Di bondar ni saba julu;
Bolas dehe pangidoan,
Tu badan simanaremunu.

Sambut saluangi behe jolo,
Hata ni na dangol di andung;
Nada hami sadia malo,
Pabajan patupahon lidung.

Marumbak kayu ara,
Tiang taloto tolong barbari;
Muda hami na hurang roha,
Badan na oto tolong ajari.

Bia de jo bujing-bujing!

Dirambas pilo-pilo,
Di soksoek ni aek na bara;
Muda dibaen na mangido,
Tola adong tola suada.

Tai da boto hamu,
Anggo na kobul pangidoan;
Tolong do alusi hamu,
Anso mulak tondi tu badan.

Bia ma pambaen martopap,
Anggo dohot sabola tangan;
Bia ma panahi pamokat,
Anggo na so marsialusan.

Bia de jo halalungun!

Muda dipaula so dibege,
Hata na binege ni pinggol;
Lohot do pamatang tu lage,

Simanangi tumpat maingol.

Hapas-hapas hulembang,
Hapas ni sidingding ari;
Muda ro hata na denggan,
Ro hami marpangulahi.

Mulak-ulak ninna hosa,
Roha pe angkon marpangulahi;
Malua iba sian dosa,
Nada digusari Ilahi.

Bia de jo . . . na so ra partaonan!

Anggo na ngot nada tarngoti,
Haru ditektek pe juluan;
Roha martamba marngotngoti,
Tangis hata so nialusan.

Salang aek na manuntun gotosna,
Ra do i mulak pahulu;
Muda dapot di husorna,
Demikian ma jolma na mangolu.

Mandokkon mulak pe nian,
Madung adong ubat ni tondi;
Malum ma pat na marngalutan,
Adong ma ingoton di pudi.

Bia de jo bujing-bujing!

Pinomat hum mandokkon mulak
Anso langka simanjojak;
Bohi pe nada tarpatalak,
Udan got ro ma manangkajak.

Tapasirpang jolo hata,
Taringot tu bujing-bujing i;
Nada dope papitpit mata,
Torang do dibege simanangi.

Hum adong halak humeres,
Dipati ni bagas podoman;
Bulus markusip mamurenges,
Mandokkon ulang dialusan.

Haranan ro naron bayonta,
Na boru ro sian dalanan;
I do jolo pamasuhonta,
Laho manyunggul parjanjian.

Halak na di toru i,
Na hum giot mangaraori;
Aha gunana dialusi,
Janggal haporluan sandiri.

Bagia pe didokkon halak,
Hita na so mamboto adat;
Di pudi ni ari tapasulak,
Nada hita na got manyundat.

Muda dibalos sada hata,
Mangido ma mandokkon dua;
Mur maginjang ma barita;
Mantak ma ro na marsilua.

Antong, tole marrobu-robu sip,
Muda mangkuling hona gotil;
Muda humusor hona gasip,
Ulang didok na so diuntil.

Mulak jolo hata,

Taringot tu Jasingkoru;
Sobar do marnolnol mata,
Mangkusip dingding sian toru.

Bia de jo bujing-bujing!

Ile baya tondi pangko,
Na so giot simbora;
Ile baya tondi mago,
Na so giot mamora,

Gari tardok baya di pantar hodong,
Ulang marpangko marsuligi;
Gari tardok di mata simanyolong,
Ulang manangko manaili.

Muda pahu do baya andilo,
Mamanjang do di Pangarongan;
Muda au do baya mangido,
Mamanjang do na so dapotan,

Muda salak do andilo,
Gunung Tua Batang Onang;
Muda halak do mangido,
Haldungan na hurang godang,

Mangkuling Jagurese,
Na poran ma na modom i;
Taru so manggorak manise,
Mangalusi hatami,

Huboto ma akal bisukna,
Anso mangarti halak i;
Na so taripar do rohana,
Na ro hita pasuo bohi.

Tapispiskon jolo minyak bunga,
Anso mangarti halak i;
Bursikkon deba tu tonga-tonga,
Dohot tu sabola tu suhi.

Hum muap minyak bungo,
Merkusor ma na modom i;
Manaili rango-rango,
Aropku i do lungunmi.

Na mangkail-kail sipuntung,
Marompankon salimbatuk;
Mangido mancubo untung,
Palepe-lepehon tanduk.

Alusi be kele,
Nadung bagas do borngin on;
Dokkon denggan tu ale-ale,
Ro nipi paoto-otohon.

Mangalus bujing-bujing,
Mandokkon ise de hamu;
Na mangido di balik dingding.
Aha giot dokkononmunu?

Mangido maaf di hamu,
Patunda ni nono ni mata;
Ampot na loja pe hamu,
Nada suada ni rohanta,

Mangalus Jasingkoru,
Mandok loja ni namangido;
Ampiran pat jongjong di toru,
Ise pe so adong manindo.

Tai bia pandok tu untung,

Nadung tarsurat do bagian;
Tu ise iba marsigantung,
Tangga suada panaehan.

Songon ruhut ni pege lambang,
Dohot sira pe burburon;
Songon untung ni anak tambang,
Udan so udan pe boluson.

liiiiilenggang . . . ning Nasotardago.

Ulang ma pola songon i,
Nadanggo suada ni roha;
Na sala do pinggol simanangi,
Dohot baen nono ni mata.

Jora-jora ni halumpang,
Jora-jora ni siala;
Jora ma au le angkang,
Ampot adong hata na sala.

Jora-jora ni balimbing,
Jora-jora ni sibatangi;
Jora au di pangkuling,
Bo pe ingol ni simanangi.

Jora-jora ni paya poring,
Jora-jora ni suhat doli;
Jora au di bayo angin,
Muda na sala panaili.

Jora-jora ni tintin sere,
Jora ni tintin suaso;
Jora do badan simare,
Muda sala di baso-baso.

I pe dia do tahinta,
Na tama pasonang roha;
Baen madung sala di mata,
Ulang be dipanjaha-jaha.

Mangkuling Jasingkoru,
Anggo na bolas pangidoan;
Nada tartaon rongit di toru,
Tola de tu ginjang maradopan.

Muda holong do rohamunu,
Jagit ma jolo api-api;
Panutung ni lampumunu,
Anso juguk hami di topi.

Anggo i do makasudmu.
Ning bujing Nasotardago;
Talak do pintu bolusonmu,
Aha angkon marsude gogo.

Mangkuling Jasingkoru,
Keta bo hita manaek;
Ulang tarpurnuk be di toru,
Madung dapot huelek-elek.

Masuk halahi sude,
Juguk tu amak lampisan;
Adong deba juguk di bide,
Ulang marsiogos-ogosan.

Dung juguk na dua tolu,
Lalu disurduan timbako;
Ro muse ma sian julu,
Panyurduan marisi roko.

Nada be mandenden ende,

Bulus do ma denggan mangkobar;
Diparuar ma sude,
Surat dohot gambar-gambar.

Diparuar Jasingkoru,
Surat sian Nasotardago;
Ho do mandokkon marsuru,
Manongoskon tu alogo?

Diparuar Nasotardago,
Surat ni halak Jasingkoru;
Na ditongoskon tu alogo,
Anso dioban di pataru.

Songon na songgan haduana,
Rap maila mida bohi;
Lalu didokkon ma hatana,
Dumenggan tapatumbuk tahi.

Mangkuling Jasingkoru,
Dohot hata na marsitutu;
Bia do pangidoan ni namboru,
I ma tahobar nomor satu.

Padang ni pidori,
Mare tasurkut saonnari;
Padan janji na robi,
Mare tasunggul saonnari.

Ulang be marhotang na ginjang,
Tapaujung hobaron;
Hosa do pade guminjang,
Hagiot di portibi on.

Ditaba horas taji,
Bulungna i pade lopian;

Dumenggan tapaujung janji,
Hata ni padan na joloan.

Mangalus Nasotardago.
Padua sora na ungut;
Anggo so dalan hamamago,
Pade di son sude marlagut.

Manangkok tu galangan,
Manuat tu Jasilaia;
Dumenggan tasapai damang,
Ulang pajongjong hahaila.

Antong tapio ma na tobang,
Anso torang marsidohonan;
Ia do ma nangkan manimbang,
Sanga na patut do oloan.

Dipio ma ama ni boru,
Bope dohot halak inangna;
Mangkobar dohot Jasingkoru,
Rap dohot sinuan bojuna.

Ro ma halahi na dua,
Tu pantar tonga-tonga i;
Songon na so marrodidia,
Holos-holosan songon i,
Dung juguk markombang sila,
Disurduhon ma burangir;
Nada adong be na maila,
Siparatang dohot parsingir.

Mangkuling Jasingkoru,
Mandokkon hata somba-somba;
Adat ni na manyise boru,
Nada'nggo dipauba-uba.

Songon on ma da tulang,
Bo pe inang simatuangku;
Ulang dok hamu au pangkilang,
Baen hara ni jarojongku.

Nada nian adong jungada,
Songon pambaenankon;
Tongtong do mangihut tu poda,
Muda adong holoskononkon.

Nada lupa au di adat,
Sanga na sala pangalaho;
Dibaen nada be tarsundat,
I ma so husurdui timbaho.

Baen nada tuktuhon batu,
Asa dakdahon simbora;
Nada tuturan bayo datu,
Asa ajaran anak namora.

Ama do da tulang,
Parinaon simatua;
Ulang adong bondul mangkalang,
Maradopkon hamu na dua,

Ditiptip ipon partoru,
Parginjang diodang-odangan;
Huboto do adat mambuat boru,
Dioli digondang-gondangan.

Taringot tu halak angingku,
Halak bujing Nasotardago;
Anggo ninna pikiranku,
Madung tumbuk dongan sagogo.

Ro pe au sian Doli,

Parmisi hum mangalap ia;
Nada'nggo mangasahon boli,
Tai pasahat na so sadia.

I ma anso hupasolkot,
Anso tibu marujung hata;
Ulang nian marlangkot-langkot,
Ulang siloan dohot mata.

Santongkin do au parmisi,
I ma dalanna hupapondok;
Anggo hata na so marisi,
Nada jabat pola hudok.

Taringot tu anggingku
Na dung tumbuk do rohania;
Dohot mangihutkon au,
Barang tu luat dia.

Mangalus ma raja na tobang,
Dohot saripe parsondukna;
Nada malo hami manimbang,
Marsuhat di sia do putona.

Di roha nada dioloan,
Madung tumbuk tahimunu;
Danak on na so marsinaloan,
Betak manyosal rohamunu.

Marpikir halak i na dua,
Sungkot ngal di ate-ate;
Dipahusor pe tu dia,
Mur ngotngot margete-gete.

Didokkon halak ma da hita,
Sioloi hata tektek jus:

Hum sada on do pe borunta,
Dijagit ma hata bulus.

Tai muda nada dioloan,
Mambaen rohana halak i;
Mur martamba hailaan,
Nada tarpatalak bohi,

Dumenggan do ma dioloan,
Tai angkon maratar-atar;
Anso mago hailaan,
Maradopkon halak na pistar.

Antong ale Jasingkoru,
Anak babere ma hamu;
Taringot tu hata ni boru,
Hami jagit ma hobarmu.

Tai on dope borungku,
Na kehe tu bagas ni halak;
Angkon paihut do giotku,
Anso ulang marulak-ulak.

Dipabuat dohot horbo,
Horbo dapoton di adu;
Mangkuling bobak ni imbo,
Ogung marsiadu-siadu.

Muda manjadi songon i,
Suru hamu na tobang-tobang;
Anso hami pardokkoni,
Sahat lalu tu luat lombang.

Pade ning Jasingkoru,
Pandokkonmunu ma tulang;
Tibu pe na tobang husuru,

Nada be markolang-kolang.

Dipaadop ma tu boru,
Sudena hata haputusan;
Pangidoan ni Jasingkoru,
Pade inang marsialusan.

Torus dehe inang rohamu;
Na matua bulung i;
Na poso dope pamatangmu,
Hami nada manghalangi.

Mangalus Nasotardago,
Marsuhat di damang dainang;
Anso ulang dalam hamamago,
Nada tartulak na maminang.

Antong ale Jasingkoru.
Na dung tumbuk ma da i;
Tumibu ma halak i disuru,
Na paujungkon hobar i,

Tai ulang hamu manyosal,
Pade pikir marbotul-botul;
Ulang ro hobar manyincal,
Na bahat halak sipangantul.

Sibat ni ramba na poso,
Jarang do i tubuan lata;
Angke diharuni duri,
Songon i danak na poso,
Na so adong mamboto hata,
Ringgas hamunu mangajari.

Mangalus Jasingkoru,
Laho manarik hosana;

Tulangku do na jadi guru,
Hami anak siseanna.

Tondimunu do manjago,
Parorotkon tondinami;
Ulang kehe tu dalan hamamago,
Hamu ma mangondingi hami,

Antong mulak hami jolo,
Rap ma hita patupahon;
Ampot hami na hurang malo,
Hamu ma patama-tamahon.

Mulak halak tu sopo.
Lalu modom manapurur;
Nada pola nian magopo,
Langkana i madung marjurus.

Ia halak Jakulabu,
Nada tardoksa bagi aha;
Madung songon na hona bubu,
Jumolo ia tarpangan roha.

Anggo nian na sapetona,
Ido na giot parsondukna;
Ning ama dohot inangna,
I do rongkap ni tondina.

Tai ma dung ro songon hata ni umpama,
Songon na mangan pining siungkotkola;
Muda di pangan mate ama,
So pinangan mate ina.

Tai ma dung tartaha dugul,
Tu ise giot disosalkon;
Di roha pe giot disunggul,

Tumaram do paila-ilahon.

Sude hatuk dilala ia,
Songon burangir na bingkas sala;
Dioban ia pe tu dia,
Hum mambaen hahaila.

Dung torang sidumadang ari,
Ro na marpio na mangan;
Songon somal suat ni ari,
Nada be maralang-alang,

Dipapondok hata i;
Sidung ma na mangan i;
Diulahi mangkatai,
Taringot tu na potang i,

Songon on ma da amangtua,
Ning Jasingkoru mamulai;
Tangi ho da inangtua,
Muda sala tola-tolai.

Ma dung hubaen na potang i,
Utang ni hamu na tobang;
Hucubo huparsianyangi,
Manyise dongan angkup matobang.

Hami sise boru ni raja i,
Baen dongan saparkancitan;
Ra do ia mangoloi,
Jadi hami madung dapotan.

Hami palalu do bulus,
Dohot tu ama inana;
Tai denggan do dipatulus,
Asal mangihuthon giotna,

Nada adong be na huharop,
Lain sian amantua;
Bagia na dalan maroprop,
Ulang be hita palua.

Ho ma sidapotonnami,
Pature-ture hobar on;
Husuru pe kahangginami,
Dua tolu ari on.

Huida hagirot ni tulang,
Angkon na maratar-atar;
Ulang ning halahi dilanglang,
Angkon jabat do humotar.

Marpikir orang kaya,
Tarsigoro dilalasa;
Iba do loja markaya,
Anak ni halak mambuatsa,

Tai bia dope binaen,
Rap do dohot Jakulabu;
Dipalua do halak parumaen,
Tu untung do ma mardabu-dabu.

Bayo on nadung marpangkat,
Dipatama ma dumenggan;
Nada ia halak na jungkat,
Bahat hagirot na legan.

On ma bo indi,
Madung iba marbaju lakan;
Muda pola on manjadi,
Tontu bahat dope ulahan.

Pade ma i amang,

Ning orang kaya mangalusi;
Ulang be pola ho gamang,
Tapajadi ma tu si,

Antong muda na songon i,
Kehe hami jolo mulak;
Anso hami pandokkoni,
Tu dongan hombar sasahalak.

Mulak halak Jasingkoru,
Tumopot ama inana;
Lalu mangetong-etong taru,
Sadia sere tulahonna.

Nada diboto be na loja,
Didipuk ma na mardalani,
Nada do pe tarida sonja,
Madung lalu halak i.

Lalu tu Huta Balian,
Bulus dipio ma kahanggi;
Laho papulu partahian,
Sanga sadia hararugi.

Songon i tu anak boru,
Dipabotohon ma sude;
Ia langka ni Jasingkoru,
Madung maroban na pade.

Dijujur ma da ari,
Sanga andigan na tama;
Disuru ma na manjomuri,
Ulang be kehe tu hauma.

Dapot ma ari na denggan,
Ari minggu paopatna;

Muda dibuat tu na legan.
Dao dope dumpang arina.

Antong disuru ma sahalak,
Kehe tu Janji Matogu;
Terus ia marsibalik ulak,
Anso ulang hita ganggu.

Muda tumbuk ma di si,
Anso disuru na marontang;
Pade saulak taabisi,
Anso ulang dua noli marutang.

Santampul dua lancimna,
Sanduruk dua marobo;
Mangkobar manulak serena,
Lalu taupa dohot horbo.

Horbo pabuatkon sian i,
Horbo dapoton ma baenon;
Antong muda na songon i,
Marhorja godang hita on.

Mulak na nisuru,
Na kehe tu Janji Matogu;
Sasue do ari ni guru-guru,
Nada pade be na martanggu.

Antong dibagi na marontang,
Kehe tu jae tu julu;
Lalu tu balik ni Sihitang,
Asa tu Angkola Julu.

Ditangkup ma horbo borotan,
Dipasadio rompayanna;
Ulang ancogot marhalutan,

Nada martontu tu ujungna.

Dibaen para dohot pagu,
Inganan ni na margondang;
Dirabut sude togu-togu,
Bo na menek bo na godang.

Mangalus Jasolodja,
Bandaharo na di huta i;
Di au ma sahat ni horja,
Hamu ma kehe mangkatai.

Markobas ma kahanggi,
Dohot sudena anak boru;
Sudena hepeng hararugi,
Singkop dilehen Jasingkoru.

Ulang hamu alang-alangan,
Garar hamu sude utangta;
Tuk do cukup sinadongan,
Nada pola marutang hita.

Hundulan unkap ruji,
Ulang marjanto i digarar;
Hum didok sadia jaji,
Bulus ma hepeng diparuar.

Halak hundangan halak bujing,
Tontu i ma dipatibal;
Ulang hamu gumanjing-ganjing,
Resek hamu sadia tobal.

Na tu unjuk na tu tulang,
Garar hamu ma sasude;
Ulang dibaen alang-alang,
Anggo mambaen na pade,

Upa mangkudukkon api,
Ulang lupa baen hamu;
Tutup uban ulang sipi,
Jojo sude baen hamu.

Na muhutna pe sude,
Disalosehon ma di si;
Anggo na tu halak na pande,
Halak i do ma tu si.

Tangkas-tangkas baen hamu,
Ulang ro mata manyirik;
Salaku jojo isi hamu,
Ro di lubang ni sikirik,

Dung dijagit sasudena,
Langka ma tu Janji Matogu;
Singkop sude dohot sendena,
Nada adong be na martanggu,

Pendek ni hata dohonon,
Lalu ma tu Janji Matogu;
Tu orang kaya disorahon,
Ibana do na umboto lagu.

Torang ari ma dihobar,
Tu sopo sio rancang magodang;
Dipio sude dongan sahobar,
Gok do ma pantar na bidang.

Songon i ma da indokkon,
Ro ma na nidok nangkinan;
Orang kaya do ma patupahon,
Anso ulang maratuengan,

Taringot tu boli ni boru,

Nangkon pola tajamitahon;
Tuk do dilehen Jasingkoru,
Momo sajo do patupaon.

Dung sidung hobar boru,
Marekelan raja-raja;
Sonang do ma manjagit taru,
Nada pola marloja-loja.

Bulus dibagi ingot-ingot,
Tanda na sidung hobar boru;
Anso ulang halak tarsonggot,
Halak di tonga bo parduru.

Panganon ni na mangkobar,
Disambol sada parkupangi;
Mangan bayo dongan sahombar,
Dohot sude panangi-nangi.

Sidung mangan raja-raja,
Dohot situan na torop;
Ditaringotan ma tu horja,
Andigan do ari na totop.

Lalu didok ma tongkini,
Pabuat boru ari minggu;
Disuru ma na mandokkon i,
Anso ro tu Janji Matogu.

Pasingkop hamu ma sasude,
Aha na tama baenon;
Marluhut na tobang na pande,
Patupa halak sisuruon.

Ditangkup horbo habuatan,
Dipasingkop ma sudena gondang;

Barang pusako paralatan,
Hohos sere payung godang.

Barang ni Nasotardago,
Dipasadio ma sudena;
Rencong dohot tapak kudo,
Rap dohot samban-sambanna.

Jarunjung bulang tolu,
Ponding dohot loting-loting;
Dohot pasak sanggul ni ulu,
Asa kurabu anting-anting.

Tintin dohot sisilonna,
Sian sere habatanganna;
Abit gok sude potina,
Dohot sude hasur lagena.

Salaku gok sude marjolnang,
Nada binoto patotorkon;
Na kasar bo na alus bonang,
Nada binoto sipilion.

Dapot hatiha arina,
Ro ma halak Huta Balian;
Mangalap tuhor ni serena,
Boru ni namora oloan.

Hum di balian ni huta,
Markobas na tobang na poso;
Denggan do ma diida mata,
Diatur songon na biaso.

Diligi tu sidara bujing,
Dohot tu sidara doli;
Maridopan omas sigumorsing,

Mangambei sulang sali.

Anggo halak Jasingkoru,
Nada mamake saro adat;
Dipake do pakean baru.
Saro tuangku berdaulat.

Lokot baju dubbel Paris,
Asa kupiah potong Penang;
Saraor potongan Inggiris,
Dohot sipatu na marlinang,

Dipasang dasi dohot rompi,
Asa kameja dohot karah;
Denggan doma marlapa lopi,
Tangkup ma tu boru namora.

Mangkuling tunggu-tunggu dua,
Dohot gondang marunung-unung;
Sikudidit Batu na dua,
Salempong jau Simalungun.

Jongjong tonggol panji-panji,
Lipan-lipan manaek mijur,
Siararabe maridopan;
Are eru situan na jaji,
Sora ni tabu gumadobur,
Mongmongan marsibalos-balosan.

Martanak manggule dadaboru,
Panganon ni situan na torop;
Manjagit haroro ni Jasingkoru,
Torkis horas nian diharop.

Dipabuat ma Nasotardago,
Sian bagas na godang i,

Manurut adat limbago,
Nada adong be dihurangi,

Pakean ni boru namora,
Sere marsisambut-sambutan;
Marsamban-samban abit sutora,
Dohot rante maralitan.

Pasak sanggul silang-manyilang,
Jarunjung sere marurdengan,
Songoni ponding dohot golang,
Dohot tintin di jari tangan.

Lalu halak Huta Balian,
Tu bagas sio magodang;
Manortori marerjapan,
Dihutkon sora ni gondang.

Ditortorkon somba-somba,
Manyomba-nyomba hula-hula;
Dibalos mora kan bariba,
Manortorkon tua dohot sahala.

Tasolotkon jolo saotik,
Panatapan ni sipanondur;
Di hobar-kobar na tarbotik,
Dioban na manaek mijur.

Taringot tu Jasingkoru,
Dohot halak Nasotardago;
Samo ginjang dohot boru,
Samo jogi dohot bayo.

Nada malo iba mandok,
Sanga manodo na dumenggan;
Angke satimbang samo dokdok,

Bayo dohot siboru enggan.

Songon bulan ampat bolas,
Di tonga ni bintang di langit;
Baen cahayo ni barang hoas.
Juguk di toru langit-langit.

Mangkobar ma bayo na ro,
Mangido sipangidoonna;
I ma makasud ni haroro,
Mangalap halak parumaenna.

Hata marsialus-alusan,
Lalu dipabuat boru;
Langka ma sian bagasan,
Kehe tumopot Jasingkoru.

Mangandungi ina-ina,
Marende dongan na poso;
Marsidokkon di na hancitna,
Hum pagodang-godang holso.

Ditumbas Nasotardago,
Andung ni na dua tolu;
Mangido ia marsigogo,
Anso ginjang umur mangolu.

Disurduhon simanggurak,
Simanggurak gonti ni lidung;
Parsirangan laho marsarak,
Pamunan laho matua bulung.

Ulang ginjang be tahobarkon,
Taringot tu na mangandungi;
Di pudi ma hita totorkon,
Horas ma sipanangi-nangi,

Adong do na tama ingoton,
Ende ni bujing-bujing;
I ma dumenggan tatangihon,
Mayam-mayam ni simanangi.

Landit na do porkotna,
Na disihit ni ria-ria;
Hancitna do ngotngotna,
Na marsiajar ina-ina.

Hamu na tu gasgasi,
Malo-malo martaba libung,
Ulang marumbak tu paya;
Hamu na marbagasi,
Malo-malo sumambut lidung,
Ulang malantuk magaya.

Muda malo martaba libung,
Denggan do i rumbak pahulu,
Nada adong na manyangkoti;
Muda malo sumambut lidung,
Sonang ma tu jae tu julu,
Nada adong na mangambati.

Ditumbas Nasotardago,
Dohot ende pasu-pasu;
Sude halak mardabu holso,
Marngotngot tu bagasan pusu,

Horsik ni pasir Barumun,
Obanon tu Sigalangan;
Matorkis na malungun,
Salamat hami na mardalanan,

Tolu silantoyung,
Nada tarantak layang-layang;

Haru tolu sinuan boyu,
Nada tarantak na marmanyam,

Muda mandurung ho di pahu,
Toskon simarbonang-bonang;
Muda malungun ho di au,
Tongoskon di unggas na habang.

Lasiak di Roburan,
Bolas mardangka pe suada;
Na sirang di pardomuan,
Bolas marhata pe su ada.

Sidung marsibalos-balosan,
Lalu marsiolat-olatan;
Na paintehon mangasngasan,
Mangida na marsiambatan.

Nada dipalua boru,
Laing ditahan digogohon;
Anggo so digarar Jasingkoru,
Hepeng upa pataruhon.

Anggo i do nguasmunu,
Ning marapule Jasingkoru;
Na bo, indon jagit hamunu.
Ringgit dohot wang suku,

Mardalan ma boru namora,
Tumopot huta ingananna;
Torkis horas nada marmara,
Lopus di jagit namboruna.

Tapasirpang jolo hata,
Taringot tu Huta Balian;
Dipaia ma da Huta Balian,

Jana digaba-gabaan,

Dipaias sude dinding,
Sanga dia na marmenggong;
Dihoiis dohot lading,
Sudena na marsurat agong.

Deba kehe mangalo-alo,
Tu ruar ni huta i;
Adong muse muli jumolo,
Maroban jamita i.

Ro ma da na ro,
Dikicak gondang unung-unung;
Marsurak badoro-doro.
Marjolol sora ni ogung.

Cakicaki bololooong jeit

Beka-beka le tu gasgas julu,
Maroban ampang dohot jual;
Beka-beka le hita pahulu,
Maroban sangap dohot tua.

Diudurkon ma tu huta,
Digondangan sian pudu;
Humalsuk lumuta-luta,
Manjagit upa ni tondi.

Dobur-dobur sora ni tabu,
Marjolol tawak-tawak;
Disampakkon dipatibu,
Dahanon na gorsing maturarak.

Horas ma boru na ro,
Torkis ma na nidapotkonna;

Riburna nada na tarkiro,
Maol patotor jamitana.

Lalu ma boru tu bagas,
Disisirkon dahanon tu uluna;
Marsapa ma nampuna bagas,
Aha do na nitopotna.

Sanga na hum marlaos-laos,
Malungun di namboruna;
Singga santongkin mangalaos,
Mangagohon halalोजना,

Muda na laho-laho tandang,
Torang ma da dokkon hamu;
Muda na langka laho matobang,
Ise na ditopotkonmunu.

Unduk Nasotardago,
Mangadop tu suhi-suhi;
Tu pandongani marsigogo,
Anso di alusi halak i.

Mangkuling pandongani,
Na langka matua bulung;
Aha gunana marsibuni,
Tumopotkon na uli bulung.

Tumopotkon Jasingkoru,
Ro tu bagasmunu on;
Baen siangkup ni namboru,
Panyahatan ni sibaenon.

Antong muda na songon i,
On ma bagas ingananta;
Nada hape na mardalani,
Tai tumopotkon anakta,

Horas ma da parumaen,
Horas sude na nitopotna;
Ulang be kehe tu na laen,
Di son ma bayo sonduhonna.

Dituktukkon pira manuk,
Asa dipagugukkon sira;
Di pinggan pasu dipasuksuk,
Laho mandok simora-mora.

Lalu dijomput Jasingkoru,
Pira manuk dohot sira;
Songoni ma dohot boru,
Diurupi pandonganina.

Dung sidung songon i,
Kehe maradian tu bilik;
Langka ma na mandokkoni,
Dohot burangir na dititik.

Andos potang dipataon,
Badan tondi ni na upaon;
Dohot na patuaehon,
Bo pe na ginjangan ipon,

Dipayakkon mutik hube-hube,
Asa santan pamorgo-morgoi;
Dalan mangido hagagabe.
Horas ma badan dohot tondi.

Disurduhon ma burangir,
Tu bayo, bo dohot tu boru;
Dung i mardalan ma margilir,
Tu tonga, bo tu topi duru.

Dung ganop sude dakdanak,

Asa na ginjangan ipon;
Didokkon ma hata na demak,
Pasahat hata taon-taon.

I ma da Jasingkoru,
Bo pe halak Nasotardago;
Mangihut tu adat na tatiru,
Pataon tondi anso marjago,

Marjago badan dohot tondi,
Ulang nian morot madao;
Muda na dong tinggal di pudi,
Ro ma tu bagas marsisio.

Muda adong dope dakdanak,
Na dompak di pargincaran;
Dihurtuk ma anso majinak,
Juguk tu tonga hahisaran.

Muda dompak di pandurungan,
Sanga di padang panjomuran;
Ro ma tu tonga ni inganan,
Anso dohot disurduan.

Muda di tombak parsobanan,
Sanga di lubuk pangkailan;
Dipadonok ma tondi tu badan,
Anso ulang maratuengan.

Dibaen aha i nangkin,
Hami giot mandokkon hata;
Dipasonang ma santongkin,
Laho mangido sinta-sinta.

Di ari na ancogot i,
Hamu nangkan upaonnami;

Ulang nian muba markoti,
Anso sonang di rohanami.

Na danggan ipon lehenon baja,
Na danggan bohi lehenon minyak;
Di jolo ni raja-raja,
Di tonga ni halak na bahat.

Di son ma bo, itak na gurgur,
Asa santan pamorgo-morgoi;
Anso gurgur hamamora,
Jana borgo begu tumahi.

Na menek na godang,
Jama hamu ma santan i;
Dipukul ma mulai gondang,
Horas ma badan dohot tondi.

Sidung na mangan santan,
Lalu dipasimpan pinggan;
Diparuar barang peralatan,
Diatur dipadenggan-denggan.

Manortor suhut sihabolonan,
Manotorkon hata ni baga-baga;
Dipangido tu ompu na hinanan,
Anso dipatorop na so piga.

Dipaelpas tu kahanggi,
Lalu tu anakboruna;
Denggan sude disagi-sagi.
Mangihut tu pertama-tamana.

Manortor ma bayo pangoli,
Dohot boru na baru ro;
Lalu tu bujing doli-doli,
Riburna nada na tarkiro.

Dung i tu parina-inaan,
Sasudena na marambit;
Sude do dapot maragian,
Bo hum sangordot sangurbit.

Dung ganop na porluna,
Maradian na margondang,
Harana ro bahat bayona,
Namora bo halak na godang.

Hum potang sidumadang ari,
Tarida ma bayo na ro;
Namora, raja bo menteri,
Dohot datuk bandaharo.

Dapot ma hatiha mangan,
Marlagut ma namora-mora;
Dohot sudena hula dongan,
Bope sanak saudara.

Tu bagas ni Jasibola,
I ma suhut sihabolonan;
Deba tu bagas sabola;
Ulang adong na hatinggalan.

Sidung mangan ro burangir,
Di bagasan panyurduan;
Lalu mandokkon utang singir,
Dipasahat tu harajaan.

Lalu burangir timbahona,
Tu sude namora-mora;
Dia do nangkat dia ultopna,
Dia do hata, dia na nidokna.

Mangkuling doal alok-alok,
Mandok mulai na mangkobar;

Tua luat lombang Angkola dolok
Dohot sude dongan sahombar.

Mangkuling suhut sihabolonan,
Patupa hata dohononna;
Muda na dilapangkon Tuhan,
Giot markaroan anakna.

Tai roha do na giot,
Gogo nada adong saotik;
Hum adat do na hami ingot,
Maniru tu uhum dohot patik.

Mangihutkon adat ni ompunta,
Hita sahorja saharejo;
Ima pasahatonnami tu jolonta.
Muda manjadi so talajo.

Hami on pisang ganaon,
Tudoskon ni bonang na bontar;
Tu jolomunu disombahon,
Hqmu do na pande na pistar.

Pangidoan gogo pangurupi,
Paganahon na dapotnami;
Muda na hurang digonopi,
Na pasahatkon ma da hami.

Mangkuling alok-alok,
Paelpas hata tu harajaan;
Tu luat lombang Angkola dolok,
Anso dipunpun partahian.

Mangalus raja-raja,
Marsidokkon dipandapotna;
Tahi patupahon horja,
Sahata lalu tu ujungna.

Satahi do sude na mora,
Nada adong na mangambati;
Putus hobar kira-kira,
Tahi nada muba markoti.

Antong madung marujung hata,
Ning suhut sihabolongan;
Adong dope uti-utian ni ompunta,
Pusako ni halak na joloan.

Pade ma da, dihertek gondang,
Anso malayang raja-raja;
Na tu idang samo idang,
Na mangatur manggana horja.

Dikicak gondang alap-alap.
Sialap hula dohot dongan;
Bo nonat di ari golap,
Nada adong na markalangan.

Diatur na manortor,
Sian suhut tu anak boru;
Maruli do sude jojol.
Lalu dohot tu dadaboru.

Melpas ma tu harajaan,
Tu namora tu na gabe;
Diatur manurut anggaran,
Denggan sude marsabe-sabe.

Dipatortor parapule,
Dihobas dohot barang sere;
Boru disanggul marsilile,
Marbulang, marjarunjung sere.

Mamake puttu dohot golang,
Dohot tintin di jari-jari.

Marjolnang cahayo ni bulang,
Songon bintang mata ni ari.

Marrencong martapa kuda,
Marjarunjung obur-obur,
Marabit surto tulis purada,
Marbaju sikin na ditabur.

Manortor di tonga galanggang,
Palontik tangan jari-jari;
Huhul diambang na tinggang,
Hape na urdot manceceri.

Digora-gora sipanjeir,
Dohot logu marenet-enet;
Dipalaing dipagair.
Manombo dipadangget-danget.

Beka-beka le huoban jongjong,
Anak ni siraja ni olang;
Tortorkon ma tortormu.
Tortor rayap halihi,
Anak ni siraja Olang;
Ondotkon ma ondotmu.
Ondot marondot tano,
Anak ni siraja Olang,
Ambehon ma ambemu,

Ambe palapang dalan,
Anak ni siraja olang;
Cecerkon ma cecermu,
Cecer marbalun bide,
Anak ni siraja ni olang;
Tuduhon ma tudumu,
Tudu lumindak laut,
Anak ni siraja ni olang

.....

Sidung manortor marapule,
Dipatortor bujing-bujing;
Sude marsanggul marsilile,
Mangordoti gumanjing-ganjing,

Disembar na poso-poso,
Dijer bayo sipanggora;
Salaku margoso-goso,
Holosan na dangol na mora.

Songon i ma da margonti-gonti,
Lopus marsitorang ari;
Manyeceri mangurdoti,
Palontik-lontik jari-jari.

Dung torang sidumadang ari,
Disuhung ma horbo borotan;
Di tabatan na di jagar-jagar,
Payak di ginjang ni rompayan.

Halak na ginjangan ipon,
Dilehen mangan dihobasi;
Tu sopo godang do tiptipon,
Sada-sada ma di orgosi.

Halak na giot goaron,
Manyogot i ma disingkoan;
Giligi sikko tari godang,
Pitu sundut su ada parmaraan.

Disambol ma horbo borotan,
lalu dilapa ditanggoi;
Sandok na margoar-goaran,
Denggan sudena dijagoi.

I ma na gabe pangupa,
Dung mulak boru sian aek;

Na asing i pe dipatupa,
Tu panggulean dipanaek.

Marayak hos mata ni ari,
Dihobas na giot tu aek;
Na dipataon na tuari,
Dohot sude danak na menek.

Sandokkon na marambit,
Marjagar-jagar ria-ria;
Denggan sude marulos abit,
Pakean ni namora-mora.

Sandokkon na tobang-tobang,
I ma songon ihutanna;
Marulos sadun tulis sijobang,
Mangihut tu parobananna.

Anggo boru dohot bayo,
Di pudi do lambat mardalan;
Gondang taru mariyo-iyoy,
Nada adong na marampalan.

Mardalan na tu aek,
Mudur-udur marihutan;
Lalu tu bagas manaek,
Nada adong na haolatan.

Di sirpang dalan laho mulak,
Di soda ma nangkan upaon;
Ulang tarsambar ke tu halak,
Pangupa na giot pasahaton.

Laing songon i ma mudur-udur,
Lopus mulak ro di bagas;
Denggan diida sipanondur,
Sude mandokkon horas-horas.

Sigiringgiring gusta-gosta,
Mariring-iring parompa-ompa;
Dao sical dao sapata,
Horas mandapotkon pangupa.

Dungi di bagas sasudena,
Jongjong satongkin maradian;
Pangupa pe madung rade,
I ma dalan parsaulian.

Manortor halani sangombas,
Mangkuliang-kuliangi pangupa;
Di si ma indahan na milas,
Na dung diatur dipatupa.

Diadopkon ma pangupa,
Tu jolo ni Jasingkoru;
Songon i tu na marompa,
Bo pe tu tunggane boru. (1)

Disurduhon ma napuran,
Tu sudena na upaon;
Mangihut aturan geleran,
Tu angka na dung dipataon.

Dung hot sude parjuguk,
Dipasahat ma pangupa;
Indahan na dung dipagukguk,
Na dung tabo sude dilompa.

Bo songon i ma da amang,
Bo pe hamu parumaen;
Songon i dohot angka dainang,
Dohot dakdanak na laen.

Na tuari disuan baga-baga,
Mangupa hamu sadari on;

(1) Tunggane boru = dongan sabagas = istri.

Salamat do antong lalu tu tangga
Lopus lalu tu bagas on.

Payak di son pangupa badan,
Dohot pangupa ni tondu;
Mangihutkon hata ni padan,
Na dibagahon na tuari.

Baen upa-upa`magabe,
Asa sinta-sinta mamora;
Anso satumtum sapangambe,
Silang sae suada mara.

Sai horas sayur matua,
Dumpang ma parsaulian;
Marsahala ma matua,
Juguk di tonga hadamean.

Di son ma santan pamorgo-morgoi,
Rap dohot itak na gurgur;
Anso borgo begu tumahi,
Salamat hita maginjang umur.

Palu-palu ni mengmeng.
Godangan palu-paluna;
Na menek dope pangupaon,
Tai godang na pinasuna.

Siaganda sigandua.
Di toru ni podom-podom;
Na sada gabe dua,
Asa na tolu gabe onom.

Laklak di ginjang pintu,
Singkoru digolom-golom;
Maranak sampulu pitu,
Marboru sampulu onom.

Horbo ni Naga Saribu,
Manyosop tu ramba tamuse;
Marhorbo marribu-ribu,
Maringgit-maruse-use.

Antong malalu baga-baga,
Hata palaluhon pangupa;
Haru pe on bahat so piga,
Jojo do nada dong na lupa.

Majomput sira ma hamu;
Sareto mangankon pangupa;
Anso butong badan tondimunu,
Tibu magodang na diompa.

Mangan sitarang-anang,
Mangan sitaronang-onang;
Ulang maila hak dainang,
Bo pe dohot halak daamang.

Dompok mangan na niupa,
Dipuntar ma mata ni horbo;
Manyungkun songon na parsapa,
Sanga dumpang dope labo.

Mangaligi uti-utian,
Uluhan ni bayo datu;
Hasomalan sian narobian,
Mangihut tu adat na tutu,

Muda manyampak do denggan,
Aek ni mata ni horbo;
I ma tandana hagabean,
Di pudi ni ari nangkan tibo.

Muda besut asa longko,

I ma tanda na hurang pade;
Haruruncur ni anak bako,
Nada dumpangan hagagabe.

Disurduhon simanggurak,
Simanggurak laho marlidung;
Mandokkon salamat marsarak,
Na dipajojor dohot andung.

Sude halak marsigoitan,
Marnida halak Nasotardago;
Mangaligi omas na maralitan,
Dohot golang kapalo nago.

Mangerbang baju kobayak,
Cita galas buatan toko;
Di uluna pe madung payak,
Undung-undung kain Batu-Baro.

Doser di toru, lasam Jokja.
Kotukna sere maralitan;
Nada be halak marnaloja.
Marnida ganjil ni buatan.

Suang halak na sian Doli,
Nada tanda na baru-baru;
Sonang do mata manaili.
Pambaen ni Jasingkoru.

Anggo dongan ale-alena,
Madung sude marimpol mata;
Mangida untung ni siadosanna.
Marbagas tu na bahat arta.

Dipapendek do mat hata,
Mulak ma tu Huta Balian;

Salamat do lalu tu huta,
Nada diambat parmaraan.

Singkop balanjo di dalam.
Langka ma halak Jasingkoru;
Mulak tu pangarantoan,
Rap dohot tunggane boru.

Di ari paduana,
Lalu ma tu huta Sibolga;
Topo bagas ni tungganena,
Tu si ma jolo ia singga,
Lalu patandahon tompana.

Tarsonggot halak di Sibolga,
Marnida Nasotardago bulus ro;
Mamake golang kapalo nago.
Songon boru na baru ro.

Bulus ro ma Jasingkoru,
Manjalang halak tungganena;
Ia ma sibuat boru,
Na gabe lae tu ibana.

Nagiot mulak ma tu Doli,
Tumopotkon pandaraman;
Ima so marsiopot muli,
Maninggalkon tonga ni alaman.

Di son do surat ni amanta,
Sian huta Janji Matogu;
Di si do dibaen jamita,
Ulang pola hamu ganggu.

Mabiar tungganena,
Ampot ro buaya Doli;

Didokkon Jaksa do pangkatna,
Dung di Doli gabe kuli.

Disise surat ni amana,
Baru tangkas diboto ia;
Nadenggan buat do ibotna,
Jasingkoru ma na ditopatna,

Di si dope so sonang roha,
Manjagit haroro ni laena;
Dijama ma barang na aha,
Ambaen silehen-lehenna,

Ia halak Nasotardago,
Kehe tumopotkon edana;
Nada da i bayo pangago,
Na marpangkat do ibana.

Ia do na marsilua i,
Di sidamang na posongku;
Roti dohot salendang i,
Nadango tuhor ni hepengku.

Sudena barang-barangkon,
Ia do manobusi on;
Di Doli do on dipatompohon,
Sandokkon na hupakeon.

Ido so mulak au tibu,
Na manungkir na sorangi,
Dilabu nian so tarlabu,
Manninggalkon siuncok damangi.

Pandok nia dicarocok,
Angkon tibu do au mulak;
Anggo taringot di si uncok,
Sonang do dipararot halak,

Saotik do parmisinia.
Sakadar hum mangalap au;
Ima anso disosak ia,
Ulang tarlambat be di au.

Walang na honok do da i,
Nada na' dumpang di dalanan;
Ima so nada targagai,
Ulang ro sogot hangalan.

Dompak hatiho songon i,
Ro ma bujing-bujing na jolo,
Batuk laho mangehemi,
Songon na mangalo-alo.

Marsigoitan halahi,
Ido bayo na jolo i;
Hape walang ni donganta i.
I ma so mopop ia muli.

Au pe antong so au,
Huihutkon ma da i;
Nada be maila au,
Hutopotkon ma da i.

Pendek ni hata dohonon,
Mandokkon hata halah i;
Songon na papasu-pasuhon,
Dohot sian lan ni bohi.

Horas ho da siadosan,
Na kehe martano Doli;
Sai dao ma parmaraan,
Sai dumpang ma na uli.

Dapot ma tingki ni kopal,

Marlayar ma na dua sajoli;
Tu laut na sangkot ni napal,
Aluan manuju tu Doli.

Laho manaek tu kopal,
Marsianyang Jasingkoru;
Ulang ho tarsonggot tarkuntal.
Madabu ho naron tu toru.

Diumpat padang togu,
Mangihut sipatomu dalan;
Beta huambit hutogu,
Na bagas aek siborangan.

Gurgur aek margudekdek,
Na mardahan ditopi gasgas;
Togu au di na pejet,
Lange-langehon di na bagas.

Tasolotkon jolo hata,
Taringot tu Jagurese.
Dipataru ma donganta,
Lopus marlayar salose.

Dompok di sada tempo,
Pio-pio ma Jasingkoru;
Tu bagasan sada lopo.
Dompok singga di Batang Toru.

Ia boti Jagurese,
Donok do ma ari marsirang;
Di son sada saraor jose,
Tonunan ni halak siborang.

Sada baju kain Tariko,
Tompoan sian tano Doli;

Di son hepeng paisi roko.
Sanga na tu timbako tali.

Sada abit Pekalongan,
Dohot kupia potong Johor;
Upa ni dongan haholongan,
Di haloloja na so tarpajojor.

Humusor Nasotardago,
Manyurduhon lasam cumpago;
On ma anggi tumbas ni gogo,
Tandana songon pago-pago.

Sada sarubeta sutora,
Na martopi abit na rata;
On ma jolo simora-mora,
Lolot be nangalu hita.

Mangalus Jagurese,
Laho manjagit upa loja;
Juguk ia gumarse-garse,
Songon halak na baru loja.

Hujagit ma sudena on,
Dohot bontar ni ate-ate;
Taringot tu siluaon,
Tola ingoton lopus mate.

Anggo rohana di bagasan,
Nada be natandodo halak;
Laing tong ma ia na ngas-ngasan,
Sai na hurang tibu ma na mulak,

Dung lalu tu hami an,
On ma da bulus huerges;
Muda dapot di haramean,
Pakeankon ma na jume ges.

Sarubeta na rata on,
Hualitkon tu tolonan;
Mardomu ma tu lasam on,
Dohot tu baju tompoan on.

Ise halak na songon hita,
Tai ulang sidok goar;
Ulang disobut bapa kita,
Hurang saotik tapadiar.

Tapasirpang manguhahi hata,
Taringot tu Jasingkoru;
Dung mago darat sian mata,
Ombak pe tu ginjang tu toru,

Tai maruntung halahi,
Nada ombak marhalingsung;
Nada ro be manguhahi,
Angin sipitung baliung.

Sonang do halahi di laut,
Jumojori sude labuan;
Nada pola sadia halut,
Denggan do manuju aluan.

Dung lima bolas ari,
Lalu ma kopal tu Belawan;
Di hos guling mata ni ari,
Manaek ma tu tano daratan.

Manaek tu kareta api.
Torus lalu tu huta Doli;
Sude tangsiun diganupi,
Riburan halak maraer muli.

Lalu tu bagas inganan,

Horas nada bagi mahua;
Diligi barang sinadongan,
Madung tuk sude sadia.

Torang ari dung di si,
Mangadap halak Jasingkoru;
Hurang do pe nian parmisi,
Pade tedak tangan di toru.

Mangkuling ma Konteler i,
Ma ro hamu Jasingkoru,
Sonang do na marlayar i.
Tulus do ho dapotan boru.

Mudah-mudahan nian tuan,
Salamat do sude di dalan;
Madung dapot partomuan,
Nada be dong na margailan.

Disurduhon ma burangir,
Di salapa gumba sere;
Mandok salose utang singir,
Taradop tu badan simanare.

Di son burangirnami,
Dohot dongan sapanganah;
Songon on do tuan saro di hami,
Mandokkon nadung maringan.

Dijagit konteler i,
Dohot sonang ni ate-ate;
Torus marhata mangkobari;
Lalu mandok mauiate.

Denggan ma da Jasingkoru,
Dung dapot dongan sakongsi;

Sandokkon na tama ditiru.
Togu disimpan dimomosi.

Mata do da guru,
Roha gabe anak sisean;
Ulang iba songon Raja Pangiburu,
Marjeng dibaen parserean.

Horas ma hamu sayur matua
Tubuan laklak tubuan singkoru;
Marsangap jana martua,
Tubuan anak rongkon boru.

Tubu ma sanggar di napotpot,
Tubu singkoru di na napa;
Tubu anak holan na mokmok,
Tubu boru sidenggan tompa.

Salumpat hamu saindege,
Sapangambe sapanaili;
Ido mula ni hagagabe,
Asa dalan gabe na uli.

Songon siala sampagul,
Rap tu ginjang rap tu toru;
Dapot jagar-jagar ni sanggul.
Ima anak dohot boru.

Marsere omas sigumorsing;
Marhepeng ringgit rupia,
Ulang tarolat tarasing,
Sian dongan sabanua.

Horas ma di pakarejoan,
Salamat dunia akhirat;
Songon i ma ujung ni hobaran,
Ninna bayo sipanyurat,

Marujung ma hata ni ende,
Barita ni Nasotardago,
Muda adong na hurang pade,
Ulang au nian didorgo.

Jasingkoru do mula ni hata,
Dohot bujing Nasotardago;
Tu si ma tasungkun barita,
Nada pola i dipogo.

Ungut-ungut borong-borong,
Mangangit jala Jasomalim;
Muda adong hata tardorong,
Mangido maaf lahir batin.

Matolbak tombang sere,
Horu aek tu Pidoli;
Ulang be da lalat di sere,
Tatuhor ma ende na uli.

Hamu ma palaluhon tona,
Tu dongan na dua tolu;
Dokkon hamu ma tu ibana,
Ende madung mulak mangolu.

Naso jung ada dipatupa,
Sian narobi tu sannari;
Dibaen i ma ulang lupa,
Tonahon hamu ma saonnari.

TAMAT

Pematang Siantar, 1940



PUSAT BALAI PUSTAKA — JAKARTA



Perpustakaan
Jenderal